

*ASO LULU, 25 IANUARI 2023*

*Na toe amatalia Taualumaga a le Fono Aoao Faitulafono i le itula e 2:00 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatautauina o Tupe Faaopoopo 2022/2023.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoao Faitulafono.

Ou te talitonu ua maua se faasiligamalosi i le paia o le tatou Maota. E tapena lava le supo aemaise foi o le faalifu fai vaeatu le paia o le Maota ma le faafogafoga mai a le atunuu, aua lava le aoauli faapenei aua le tatou folau atu. O le fautuaga foi a le Nofoa, ia toaaga e tausami le meaaano, aua tatou te toe fetagofi i le araisa, leaga e malosi le masoa. Ia o faaeleeleaga na a le Susuga i le Failautusi mai Aleipata lea ua tali ai la outou sua i lenei aso. O le mea lea, faamanuia le Atua i le Susuga i le Failautusi ma lana faatoaga.

E faia le tatou malologa, o lo o faaauau lava le saunoaga malu a le Afioga i le Minisita o Galuega Tetele. O le mea lea, se i tulai mai lau Afioga e faaauau le saunoaga.

**Tofa Hon OLO FITI AFOA VAAI:** Ia, e faafetai atu i lau Afioga i le Fofoga Fetalai, ou te talitonu ua saoialo le taliga o le sua i se faasiligamalosi i lau Afioga faapea foi sui usufono mamalu o le Palemene nei. Ia, e momoli atu foi le agaga faafetai i le Afioga i le Failautusi ma le mamalu o le Matagaluega o le Fono Aoao Faitulafono. Afai o le Afioga i le Failautusi lea sa aao i i le taumafataga, ia o le a faamuamua lava oe i lou itumalo. Ae faafetai o lea o le a toe faaauau atu se matou tala.

Ona matou oo mai lea i le Pulega o Felauaiga i le Laueleele lau Afioga i le Fofoga Fetalai, e pei lava ona avatu sa matou tala, o le aso Faraile nei o le a faapea ona matou agai uma atu ai lava ma le Pulega o le LTA, o le Eletise, o le Vai, ma Pulega uma lava lea ou te galue ai, o le matou asiasiga lena o le a faatino nei i le aso Faraile e taamilo i totonu o Tumua nei. Ia ae o Salafai i le vaiaso fou. Ia o le tatalo lava ia lau Afioga i le Fofoga Fetalai i le mamalu o le tatou atunuu e tauala atu i Afioga i sui usufono, ia maua

pea le lavapapale i lo outou mamalu, ae o lea lava e tau posiposi si a tatou seleni e mafai ona faataunuu ma faatino ai mea uma e pei ona manaomia. Ia manatua foi lau afioga i le Fofoga Fetalai, afai e 51 itumalo i totonu o le tatou atunuu ae tai 2 auala galue, lona uiga e 100+ auala e tataua ona faia i ai se galuega, ae e le o lava se seleni e faatino ai. Ae le tuua ai foi le silasila i le tatou poloketi miliona lena pe afai e tou te naunau lava e faatino atinae a outou itumalo e faaoga ai foi se isi seleni e pei ona taua foi e le Afioga i le Minisita o le Siosiomaga. Ia, o le mea lava lena e fetuutuunai i ai le tofa ma le faautaga.

E amata atu se matou tala lau Afioga i le Fofoga Fetalai, o lea foi sa taua foi e se tasi o sui usufono mamalu le tulaga lava lea ua o oi ai se faamaite a lenei vaega i le aoaoina lea o le tatou Bachelor of Engineering i le USP. Tasi foi lena o fuafuaga sa...

**Afioga Hon Lautafi Fio Selafi Purcell:** Lau Afioga i le Fofoga Fetalai...

**FOFOGA FETALAI:** Ia, malie lau Afioga i le Minisita se i tuu atu le avanoa i le Afioga i le sui usufono mamalu mai Satupaitea.

**Afioga Hon Lautafi Fio Selafi Purcell:** Faafetai, faafetai mo le avanoa. Sa le fia faalavelave i le Afioga i le Minisita, ae leaga o lea ou te faalogo atu pei o lea o le a see ese ma mea ia o vaitumaoti. E silafia foi o lenei itumalo na ola mai lava i le vaitumaoti e oo mai i le aso. Ma o lea e faalogologo atu e i ai le asiasiga a le Afioga i le Minisita ma le latou Matagaluega, e le taumate e asia foi le vai o lenei foi itumalo. Ae na pau le... o le faamautu, o matou e i ai le matou Komiti o le Vai, e mafai ona o ifo e tou te afifio ia ma tali foi ni fesili e manaomia e lau Afioga ma le mamalu o le Matagaluega. Aua o lo o i ai lava le vaega foi lea e vaai vaitumaoti, e pei la o latou ia lea e fesootai ma le Komiti o le Vai a le matou nuu, a o lea o le a afio atu lau Afioga ma le Matagaluega, e manaia le faamautu mai o le aso e tou te afifio atu ai i le matou nuu ona ave lea o se feau i le Komiti i le Peresetene o le Vai ma le Komiti e faatali mai tou te afifio i uta i le mea o lo o i ai le faatanoa a lenei nuu.

Ae o le talosaga lava ia ona e faamanuiaina lava si o matou nuu i le vai, ona e le maua ai le mea lea a tetele timuga ua tatafe ua palapala. E le maua la i le matou vai, o le a silasila foi i ai pe a afio atu i ai. Ae na pau le auaunaga e naunau ina ia maua pea lau Afioga, o le vaega lea i le Ofisa o le Soifua Maloloina, o le o foi lea e test le vai, sa masani lava ona fai. O le mea foi lena sa taumafai ai lava ina ia lelei le auala e alu i uta e tau i le mata o le vai lea e i ai le faatanoa ina ia faafaigofie ai i le Matagaluega o le Soifua Maloloina ona o e aumai samples foi lea e test. Ia na o se talosaga ia faaauau pea lea vaega, ae o se talosaga atu lena pe afai e faamautu le tou

asiasiga, ia ona logo mai lea lau Afioga. Faafetai i lau Afioga i le Fofoga Fetalai.

**FOFOGA FETALAI:** Faafetai. Ia, se i tulai mai lau Afioga i le Minisita.

**Tofa Hon OLO FITI AFOA VAAI:** Faafetai atu i lau Afioga i le sui usufono i le tulaga lea. Ia e i ai lava le faaeteetega. Ua ou toe manatua e i ai lava le faaeteetega ia te au faaletulafono, ona o vai ia tumaoti, o lo o i lalo o le faamalumaluga a le Matagaluega o Tina ma Tamaitai, ae vagana vai ia a le tatou SWA, o lo o i lalo la i se matou vaavaaiga. Ae o le a le afaina lea. Ou te talitonu lava o le Tulafono foi ia o le a faataoto atu faapena e fua i tiute ma matafaioi, ae o le manatu lava i le mamalu o le atunuu i le latou fofoga taumafa o le a mafai ai ona matou asiasi atu ma avatu le fautuaga i ni mea e faaleleia atili ai le suavai taumafa o so o se alaalfaga. Ia na ona ou toe faamanatu atu foi i le tulaga lea, ina ne i manatu foi lea ona o tulaga lava ia sa tatou feola mai ai i aso ia...

**FOFOGA FETALAI:** Ia, malie lau Afioga i le Minisita se i tuu atu le avanoa i le sui usufono mo Lefaga ma Faleaseela.

**Afioga Masinalupe Makesi Masinalupe:** Faafetai i lau Afioga i le Fofoga Fetalai mo le avanoa. Ia, e faamalulu atu foi i lau Afioga i le Minisita, o lea ua amata ona see lou sa. Ia, o lenei foi itumalo pei lava ona silafia pei lava ona e faamanatu mai i le taeao, o la e i ai le vaitumaoti, ae ua tele lava ina vili vai o nisi aiga. Ae o lau foi faamalosiau lea i ai e lelei le soifua maloloina i le suavai ua uma ona togafiti ma ua uma foi ona faamamaina, ae pei o le agaga lea, se i afea ifo i la outou asiasiga. Atonu e taua foi la outou tuualalo ina ia faapea ona malamalama ma sologa lelei ai lea vaega. Ma le faaaloalo lava.

**FOFOGA FETALAI:** Malo. Ia, lau Afioga i le Minisita, faaauau le saunoaga.

**Tofa Hon OLO FITI AFOA VAAI:** Faafetai tele lava o lea lava ua faalogologo ma le manino atu i le tulaga o le lagolagoina foi o le taumafai atu o le Pulega o le tatou Suavai, aemaise foi o le silasila mamao o a outou Afioga i sui usufono i le saogalemu ma le soifua saogalemu maloloina o tagata o tatou itumalo.

Ia, e ao lava ona fai atu sau faamatalaga i le tulaga lea ne i faapea o tulaga o vaitumaoti o mea na feola mai ai ma soifua mai ai o tatou alaalfaga mai le tele o tausaga. Peitai, ua sui foi faiga i le tulaga lenei aemaise lava le afaina o le tatou suavai i le fesuaiga o le tau. Ia ma o lea lava e faataoto

atu se polokalame alualumamao ina ia tapenapena ai foi o tatou alaalfaga ma nuu o lo o i ai vai nei.

Ia, o le tulaga foi faapea ne i te i ua mita ma totogi le a ma le a, ou te talitonu lava, e tutusa lelei lava le mea lena e totogi i totonu o nuu ma pili o suavai lea e avatu e le tatou SWA. Ia, tailo i ai, ae o au ia e \$14 lau pili i masina uma lava. Ae o atu le matou SWA tipi lau paipa i lau \$42. Ia tasi foi lena mea, e oo lava ia te au o le Minisita, e faatino lava galuega a le matou Pulega i lalo o le Tulafono. Tuu le mea foi lea a le tatou Maota, o le vaai atu loa ua tipi alu atu loa ia te au faapea se i tau faapau ifo i lalo. E le mafai ona ou faia se tulaga faapena a outou Afioga.

Ona ou toe foi mai lea i i e faaauau atu se faamatalaga i le LTA. E pei o le mataupu lea sa laga mai, o se mataupu e sili ona taua. E pei foi lava ona fai atu sa matou tala, e fetufaai i manatu o le aiga lenei po o le sector foi lenei i tulaga e atiae ai le tatou atunuu, lea sa saunoa i ai le sui usufono tamaitai o Alataua Sisifo, i le faamaite lea avatu nei i le mafai lea ona aoaoina le Bachelor of Engineering i le USP i se faamaite foi a le tatou LTA.

O le tulaga lea sa talanoa i ai, faafetai i le Afioga i le Minisita o Tupe lea sa manino mai lana saunoaga o lo o i ai scholarship funds e mafai ona faatino ai nisi o vaega ia aua la le aoaoina o fanau aemaise vaega ia i aoga o matata eseese ia a tatou ma le Metotisi ma tulaga faapena. E oo foi i le aufaigaluega o lo o i ai foi inisinia e manaomia foi le toe aoaoina i Degrees mo le lumanai foi o latou. Ou te manatua le tulaga lenei i le tatou NUS i le Foundation, o le maualuluga ia o le average ua i ai le tulaga o le aoaoina o fanau i le tatou NUS. Faafetai atu i lau Afioga i le Minisita o Aoga. Ia o le average lea e masani ona i ai o le 80 ma le 82%. A o le toatele ia o alo ma fanau e i lalo mai i le tai 70 i le 80 ua latou le ausia maka e mafai ai ona latou maua avanoa e sikolasipi ai i Niu Sila ma Ausetalia ia ma Fiti ma tulaga faapena, ia ona oo loa lea pei ua faataatia e leai se galuega e fai ai, lea la ua i ai le faamaite lea, e aoga foi la e faaoga ai tatou ia tatou tupe ia i le sikolasipi aua o lea o le a taugofie. E le toe malaga atu i fafo, e leai ni accommodations leai ni alauni leai ni pasese, a o lea o le a nonofo lava i inei i Samoa ma aoga i ituaiga avanoa lea. Faafetai atu i lau Afioga i le Minisita o Aoga i le tuleiga o le ta mataupu lea.

O le tulaga i Tiavea i le auala lea sa saunoa i ai le Taitaifono o le Komiti, ou te talitonu lava o lea e molimau le Afioga foi i le sui usufono o Faasaleleaga 5 i le taimi sa faatino ai foi se atinae i tua, o i ina sa faatino ai le galuega i le agai atu i tai. Ae taua ia te au le mataupu lea i le auala lea agai i Tiaveatai, ona o se tasi foi lea o vaega o le atunuu e maoae foi ma matagofie se tulaga o le atinae e mafai ona fai ai mo turisi. Ia o lea foi e faafogafoga atu lava le Afioga i le Minisita o Turisi, ia o la e i ai lana atotupe mo le vaega lea ma ana funds foi e faatino ai le vaega lea lau Afioga i le sui usufono mamalu.

O le mataupu lea na laga mai e le Afioga i le sui usufono mo Gagaifomauga 2, faafetai tele lava i le Afioga i le sui usufono mamalu. O ituaiga lagona ia ou te talitonu o ni lagona e fou ma faufau ai se finagalo o le tatou Malo, o ni faamaite e fou, lea sa aumai ai ni mafaufauga e mafaufau faalauaitete e aoga i le mamalu o le tatou atunuu. Lea sa ia taua ai se tatou auala foi lea i le motu tele i Salafai ona o le tele foi, e kolosi mai le isi pito i le isi pito. E taua le mataupu lea ma le atinae lea ma mafaufau ia, ma o lea foi la ua talatalanoa atu i le Pulega, ia sailiili se auala e faatino ai le auala lea aemaise lava pe a faapea e oso atu i le matavanu mo turisi foi. Ia, o le tulaga la lena, faafetai mo le lagalaga mea lelei, o lea ua faamauina se tasi foi o manatu ma le tofa sa aumai i le mataupu lea.

Ona ou oo mai lea i le tatou cross island road po o le tatou auala lea e agai atu i Tanugamanono i Siumu. Mo le silafia e lau afioga i le Fofoga Fetalai ma le mamalu o le Maota, o lea ua talia e le o toe mamao le toe faafoi mai o se approval a le tatou World Bank i le valuation report lea ua tuuina atu ai i le lot.2 po o le vaega lea e amata atu i Tiapapata agai i Siumu, lea sa fai ai le tauofoga, ma o le vaega la lena o lea o le a faasolo atu ai le faatinoga. O le isi vaega lea mai Tiapapata agai mai lalo i Tanugamanono, lau Afioga i le Fofoga Fetalai, o lea ua talia le finagalo e faauma ai se faaiuga a le Kapeneta, ia ona faapena loa lea ona tender foi ma le galuega lea i se taimi lata mai nei lava.

E pei o le tulaga lena, ae faafetai lava foi i lea itu le lavapapale mai i le tatou atinae lea.

O se tasi o mataupu sa laga mai e le Afioga i le tamaitai sui usufono mo Gagaifomauga 1, o le tulaga lea o le solo o lo o tulai mai i Safotu i luga o le auala ona o le tulaga lava foi o timuga ma mea faapenei. Lau Afioga i le sui usufono mamalu, faapea foi le vaega lea i le tolotolo lea e agai i sasae, tasi lena vaega i Anoamaa o lo o i lalo le atinae lea i le tatou poloketi foi lea o le stabilization project, lea o lo o faatupeina e le World Bank ma le ADB vaega ia, ma o lea foi ua faasolo a tatou tauofoga o designs e faatino ai le galuega lena. O le poloketi foi lea o lea ua avatu se talosaga i le Ofisa Sili o le LTA pe mafai ona tuu i totonu le tatou alasima lea i Eva. Faafetai foi ua laga mai le mataupu lea, e tuu atu i ai le tatou galuega lena, ona o le galuega e le o se galuega taugofie le toe faaleleia o le alasima lea i Eva. E tilotilo le Pulega i le galuega lea e ova atu ma le \$5 miliona se tupe e faaaluina ai i le atinae lea, ae faafetai le onosai mai. Ia o le a tulitulimatagau lava le tulaga o fesoasoani nei e vave ai ona faataunuu manaoga o le tatou atunuu.

Tatou oo mai le west coast road, le auala lea e agaia btu ii ne i i Faleolo. E faamalulu atu o le auala lea o lo o talia se i lelei loa le tau ona faapena loa lea ona toe fana le tatou ta foi lea o le asphalt i le agai atu i Malua i Leulumoega. Ia, o lo o faapena foi ona faasolo le survey ina o le agai atu i

Leumoega agai le malaevaalele i le taimi lenei, ma e le o toe umi ae faatino lea vaega.

I le tulaga o tatou road maintenance ia lea e faatino lea e faasea foi i ai a outou afioga i le tulaga foi lea o le tanutanu i nai asuemu, e sao lelei a outou Afioga i le tulaga lena, ae malilie onosai mai lava ona pau lena o le fesoasoani e avatu i le taimi lenei o timuga, ona e manumanu foi le tatou Pulega i faata atu toe i ai timuga toe faaleagaina mea na, ona faaaluina ai foi lea o le tele o tupe a le tatou Malo. O lea foi ua tou silasila atu, o lea ua faasolo ina ua amata ona toe maua mugala tatou resealings i le tulaga o auala ma faapena foi lea ona faaauau maintenance a konekarate ua tofia. Ia e lelei foi lena o lea o le a fai toatele a tatou galuega lea ia outou silasila ifo i le performance ma le faatinoga e konekarate o galuega ona e le au atu i ai lau asiasiga i le tele o taimi, ina ia mautinoa o lo o lelei le faatinoina o galuega nei. Leaga e mamao loa ma tatou, ia ua tau topelau foi lea ae fai pepelo isi galuega. A o se galuega fai toatele e le tatou Malo ma lo outou mamalu, ia ona tatou fesootai foi lea. Ae aua ne i galo, ou te le moe, e i ai lava le taimi ou te asiasi ai i taimi uma ma vaiaso uma i le faatinoina o tatou galuega.

Ona ou oo mai lea i faailoilo. E taua tele i le Matagaluega lenei le road safety, saogalemua i luga o auala. E pei lava foi ona taua foi e nisi o sui usufono i le taumafai e fai ni tatou faailoilo o auala, ioe. E le faapea lava o faatamala le LTA i le faiga o tatou faailoilo nei. Peitai, o lena ua outou molimauina ma outou silasila i ai i le faaleagaina o nei faailoilo a o le taugata ia. E galo ia i latou e o lo o faia lea amio o tupe lava ia e faaalu i le toe okaina mai o tatou faailoilo, ia o tupe sa tataua ona sefe mai, atonu e oo atu i se isi taimi pe a tele tupe e sefe mai i i ua sii ai foi penisione a toeiina ma olomatutua. Ae o lo o vaaia pea le faaleagaina pea o tatou faailoilo nei.

E avatu ai se talosaga a lenei vaega ma le tatou faigamalo i le pule mamalu a alii ma faipule, ia, atonu e tasi lea vaega e fia maua ai se fesoasoani i la outou silasila ona o le faaleagaina o meatotino a le tatou Malo.

Ona ou oo mai lea i mea lava ia o road safety i le tulaga o moli faailoilo foi lea po o pecan lights. A maitau foi le tatou Maota i le taimi lenei, ua tele foi lava konekarate foi nei e faia galuega i luga o auala, ua fai lava ae le iloa atu lava se galuega la e fai ona o le leai o ni latou moli e faailoilo ma warn mai ai le atunuu o le galuega o lo o faia i luga. Tasi lena vaega ua ave i ai le faamamafa a le tatou Matagaluega, o le tulaga o le safety, e le gata i tagata faigaluega, a o le atunuu foi o lo o femalagaai i luga o auala. E oo foi la i nisi o Matagaluega o lo o faaaogaina moli nei, Matagaluega a le Malo, o lea ua taunuu atu lau tusi i ai i nisi o Matagaluega, ia utagia mai le faaaogaina o pecan lights ia sao ona tuuina i luga lanu ia ia sao lanu e tuu i luga o taavale. Afai e le sao, ona outou malilie lea e le pasia e le LTA taavale na. E molimauina lava ma outou silasila, o le lanu mumu lava lea e

faaaoga i mea o emergencies, lea e faaaoga e fuimu, o leoleo, ia ma falemai. E i ai taavale lau Afioga, ia leaga e le o afio mai le Afioga i le Minisita o le Soifua Maloloina. E i ai taavale foi a le Soifua Maloloina e lanumoana uma lava moli foi nei e taamilomilo i luga, ae tasi lava le Matagaluega e faaaogaina le lanumoana, na o le Matagaluega o Leoleo. O le mumu i lana emergency ma le lanumoana o le law enforcement e tatau ona na o leoleo latou te faaaogaina. Ia ua oo foi lava i isi taavale a le tatou atunuu ua emoemo solo mai ai ma moli. E le o taoto lelei le faiga lea. Ma ua i ai le manatu, e tatau ona tatou sosolo lelei i international standards, ia aua ne i omai tagata i fafo ula i le tatou atunuu e tatou te le iloa ni Tulafono i ituaiga mea faapea.

O le ala lea ua avatu ai foi le tulaga lea, ina ia utagia le faaaogaina o moli nei, aua le saogalemu o le mamalu o le tatou atunuu i luga o auala. O lea foi ua faafogafoaga mai konekarate, e tatau lava ona i ai lau moli i luga o tou taavale o faaaoga. E faapena foi i le matou Pulega o le LTA, o le Water Authority, o le EPC, ia, o lea ua matou amatamea atu se i faatau muamua matou moli ma tatou alu atu ai lava faapena. Ona o le tele foi lava o taimi aemaise lava lau Pulega o le EPC, o le tele o taimi e galulue ai i pou i uaea eletise malolosi, ae ao lava ona i ai le moli lea e faailoa mai ai i tagata le galuega lea e fai ia fua i ai lana fealualuai i luga o le auala.

Ia, o le tulaga lena o lo o...

**Afioga Hon Mulipola Anarosa Ale Molioo:** Lau Afioga i le Fofoga Fetalai...

**FOFOGA FETALAI:** Malie lava lau Afioga i le Minisita se i tuu atu le avanoa i le Afioga i le Minisita o Tupe. Tulai mai lau Afioga i le Minisita.

**Afioga Hon Mulipola Anarosa Ale Molioo:** Faafetai lava mo le avanoa. A o sausaunua le Afioga i le Minisita foi e tusa ai foi o le faamaninoga o le saogalemu i luga o le auala. Ou te fia faafesili foi i le tulaga lea o patupatu lea e i luga o auala tulou foi le gagana. O lea sa matou taamilo foi i Savaii i le aso Gafua e faatino foi le asiasiga. O le matou matau, e eseese uma lava le maualalo ma le maualuga o le patupatu. Pe i ai se fua, e mafai ai ona mautinoa le saogalemu, aua o lau pasese lea na ave, ia, ua alu i luga ina ua matou ae i luga o le... ma le isi itu, e le o valia tatou patupatu ma tatou faapatupatu ia. E tatalo atu i lau Afioga i le Minisita, o le taua ia o vaega ia, aua o se tasi lea o vaega e saogalemu ai le mamalu o le atunuu.

Lona lua lau Afioga i le Fofoga Fetalai, sa ou malaga i Savaii, e taunuu atu lau taavale i Salelologa, fetai ma le muamua atu o le maliu i le auala lava lea e amata atu lava i Salelologa e tau lava i o i le matou itumalo. Ia atonu e pei e sala ese le fesili, ae atonu o le Matagaluega o Leoleo. O le fesili, o se Tulafono le mulimuli atu lava i lo le pasia o le maliu? Aua o le

mea lena, sa ave lava le faaaloalo foi i le sologa taavale lea e maliu atu, ae i ai le talitonuga, o le main road lea e alu atu ai. Ia, ou te alu atu ua afa le sauniga a le matou itumalo, ona o lota faaaloalo tele i le maliu lea e avatu. Ae o le taua ia ole faailoa mai o tulaga ia. Ma le faaaloalo lau Afioga i le Fofoga Fetalai.

**FOFOGA FETALAI:** Malo faafetai.

**Afioga Fepuleai Faasavalu Faimata Sua:** Faamolemole pe maua se avanoa meamanu o lea fai se malologa a le Afioga i le Minisita.

**FOFOGA FETALAI:** Oi, ia tulai mai le sui usufono mo Salega 1.

**Afioga Fepuleai Faasavalu Faimata Sua:** Faafetai mo le avanoa. Ou te iloa o lea ua tau pasi laitiiti lava le Afioga i le Minisita ma le vaega lea, ae sa taumafai lava se i afu le saunoaga matagofie. Na ou taua i lau lauga le talosaga a si ou itumalo e ala i le vai lea o Siuvao, lea lava sa ou tagitagi lava ma pesepese atu, ia ona o lo o manaomia lava e tasi lea nuu o si ou itumalo e oo mai lava i le taimi lenei o loo... Faafetai i timuga lea ua i ai, ae a mugala loa, ia ua agai mai e tusa ma le 3-5 kilomita e agai mai i le aai i Fagafau e saili se suavai.

O le isi tulaga o le auala o si ou nuu lea o Faiaai, o lea na maua ua ataata mai, ae fia faalogologo atu i se tali a lau Afioga po o le a se tali mai. Faafetai.

**FOFOGA FETALAI:** Ia, se i tulai mai lau Afioga i le Minisita.

**Afioga Tagaloatele Pasi Poloa (Sagaga 4):** Lau Afioga pe...

**FOFOGA FETALAI:** Ia tulai maia lau Afioga i le sui usufono mamalu o Sagaga 4.

**Afioga Tagaloatele Pasi Poloa:** Lau Afioga i le Fofoga Fetalai faafetai mo le avanoa, ae talu ai o lea ua matau atu i le matagofie o le saunoaga a le Afioga i le Minisita. Sa faalogologo lava ma le totoa ona o lea sa ou talosagaina se tamai auala o si o matou itumalo a o faafofoga mai. Ae ou faalogologo pea ma ou matau atu, o lea ua pasi le saunoaga e uiga i auala ma... ona tau fua ai lava lea o le faamoemoe, ona ua ou vaai atu e matagofie lava tali e ave i isi sui usufono na i i. Ia ona ou usuina loa lea o le pese foi lele a le tauaso, ta fia faapei lava o outou na. Ua matagofie le tali a le Minisita, ae atonu lava o le matagofie pe a faalogologo mai si ou itumalo ae ne i te I ua..., leaga ou te latalata tele i le Afioga i le alii



Minisita, ai o faigata ai ona auau mai, ae sa ou manatu foi ua pasi le saunoaga e uiga i le asiasiga o vai. Ae o lou sui usufono e musu foi e tu soo, e faapena foi se lagona, ona o si o matou itumalo e tele tamai vai, ae afai o tulaga ia i asiasiga a le Matagaluega, ta te fia manao foi ta ita ia asia ia nai vaipuna o lo o i si o matou itumalo atonu foi e aoga. Pe faaletonu foi le vai a le Malo, a o lo o manatu ifo o la e i ai vai e mafai ona tua i ai lea vaega o le itumalo, e mafai ona faaaoga ifo. E pei o nai vaega ia, e pei o lea e faasafua ia le tulaga o asiasiga a le Matagaluega seia vagana ai ua faapea na o ....a o le matou itumalo ua taumamafa uma lava i vai a le Malo ae o lo o i ai lava vaitumaoti o lo o faaaoga e oo mai i le taimi nei, ma o lo o teuteuina pea, mo le fofoga taumafa ma le faaaogaina e le itumalo. E pei o nai vaega ia lau afioga i le Fofoga Fetalai. E pei ona saunoa le Minisita o le Soifua Maloloina o le tatou galuega e fai tele manu lea ua i ai so ta avanoa. Sa ou le manatu i le tulaga lea seia oo i le fononua ona lauga ai lea. A o lea lava na saunoa, a iai lava faaletonu e vaavaai i ai, e mafai lava ona talanoa pe talanoa foi i tulaga, aemaise o vaega o lo o i lalo o le vaaiga a le Minisita. E i ai le magatolu i uta i le mea e afio ai Asiata i uta, sa ou lipoti foi i le Ofisa Sili o le LTA, ina ia fai se fuafuaga agai i ai pe a i ai se tulaga ona e fai lava si dangerous laititi mo le feliiuaiga o taavale a tagata ne i te i ua i ai se afaina, ae na ona faamanatu i le Minisita, ma te le i talanoa ma le Minisita a o lea sa ou talanoa i le Ofisa Sili o le LTA e tusa ma ia vaega, ae faafetai mo le saunoaga matagofie a le Minisita. Manuia le fononua.

**FOFOGA FETALAI:** Ou te iloa o lea e manino lava le saunoaga a le afioga a le Minisita, o mataupu uma ia e lagalaga o lea ua faamau uma i lalo ma sauni loa e asiasi. O mataupu uma lea e lagalaga lea ua faamau uma i lalo ma sauni loa e asiasi. O le tulaga lea ou te talitonu lava aua tatou te popole o la ua uma ona faamau uma i lalo i le api a le Minisita. Aua e pau lava le popolega na o le Fofoga Fetalai e le o lagalaga sana auala i le Maota, e na o le tusi lea ua avatu i le Minisita. Ne i te i ua lavevea na o mataupu lagalaga, ae galo ai tusi la ua uma ona avatu i lau afioga i le Minisita. Ma le faaaloalo.

**Tofa Hon OLO FITI AFOA VAAI:** Faafetai lava i lau afioga, o le a ou muamua atu ia i le talosaga a lau afioga. O le faalavelave o lau talosaga o lo o e tusi i lau Failautusi e te le i tusi atu ia te au. O lona tonu lava lau afioga i le Fofoga Fetalai, e pei na maua i sau tala i le taimi ua sola, e faagasolo uma lava le matou asiasiga i alalafaga uma lava. E leai se alalafaga e misi i le matou asiasiga lenei. ma o se mea foi e ao ona faamalamalama, o galuega ia ua faasolo i le taimi lenei o galuega sa pasia mai i le tatou paketi o le main budget o le 2022/2023. O lea la e faagasolo galuega na. Ae o le supplementary lea ua aumai ai outou finagalo, lea o le

a matou o e asiasi, e pei lava ona ou fai atu ona fetuunai lea i le faamuamua e faagasolo i le tatou budget o le 2023/2024 lea o le a tatou agai atu i ai ia Iuni. E pei o le faiga lena e le mafai ona faatalaloe, ae faapena ona fai le tulaga lena ma posiposi atu ai ma le tatou seleni.

Ona ou toe oo mai lea i moli ia ma le tulaga o le saogalemu o luga o auala. E masalo foi o lena ua outou molimauina e oo foi i taxi ma pasi, ua lanumoana uma mai moli, e oo i le po ua omai ua lanumoana moli. E le o le faatamala la o pasiga taavale a le LTA, ae ua maua i le mea lea o le uma loa ona pasi toe o faapipii moli na i luga o taavale. Ua felanulanuai ua le iloa po o a le mea o le a fai atu i le mea lea. Ona silasila lea, po o ai lava po o le afioga i le Sui Palemia, i se tulaga o se tulafono i faleoloa ia latou te faatauina moli nei. E ao lava ona siaki lelei po o fea e faatau ai mea faapenei. Ae leaga ua faatau e faleoloa ia tatou ...i ni tau taugofie, ua fai la ma moli teuteu i taavale, ae ua tuu ai tulafono. Ou te manatu o lea e i le Matagaluega o Leoleo le tulafono foi lea o le Instances Fine, o lo outou vaivai lava e ticket ma faasala ia taavale ia e faia le amio lea, aua foi sa outou tupe maua. A o le mea lena pe a faapea e maua ia....

**FOFOGA FETALAI;** Ia malie lau afioga i le Minisita se i tuu atu le avanoa ia Aana Alofi 2.

**Afioga Aiono Tile Gafa:** E faafetai tele i le avanoa, e manatu e leai se agaga e faalavelave i le saunoaga matagofie i le saunoaga a le Minisita. Ae o lea ua oo tonu lava le saunoaga ale Minisita i le tulaga lea o le puipuiga o luga o aualatetele. Ou te iloa ou te faasaoina lava le saunoaga i tulaga ia o le tatou road safety, aemaise lava sign i le aualatele. O le tele lava o...ta te sau vaai atu ua pio i lalo le sign ae o le sign uamea, ituaiga tulaga na. Ou te iloa e faafetai o lea ua e saunoa e talosaga i alii ma faipule se isi fesoasoani, ae faafetai tele mo....

O le ala o lou tulai, ona o ;lea ua e saunoa i moli. Ae se i silasila po o le a le faiga i taavale ia e fai laau. E faapea lava ita ai o se taavale a le falemai la e sau i tua, ae pasi atu i luma, oka e leoleoa le laau. O se aso o le vaiaso lenei, sa ou matamata ai i le faasilasilaga a le afioga o Apia tulou foi le afioga. O le saunoaga a le afioga i le pulenuu i le tulaga lea o le tupulaga lava e faia ia mea. O le taimi o faigalotu, e oo lava i le aso Sa. Ae o le leo tetele ia o laau. Ou te talitonu lau afioga, o lea e i ai le tulafono e sa. Ae ou te iloa a oo i le taimi e ave ai e pasi, e oo foi i moli, ua fetagofi tatala ese ona ave lea e pasi, a toe foi mai ua pasi ona toe faapipii foi lea. E pei o le agaga lea o lou tulai atu, faamanatu atu, ona o lea ua oo tonu lava lau saunoaga ma lau folasaga i le tulaga lea, se i silasila ane i ai. Aua e ala ona ou fai atu, o taavale ia, aua ta te fiu e vaai aua o le po. E tele mea o le leai o ni moli i le number plate ae o le ee o le laau ae o le taimi o faigalotu ma le taimi o malologa.

E avatu le faafetai i le tatou auala lea e alu atu i Malua, ua manaia ma matagofie, o lea foi ua uma ona alu le laina paepae e tosi ai itu auala. Ua ou vaai o la ua uma ona faataoto atu tulaga o bus stop i Utualii ma faasolo atu i sisifo, malo faafetai. E pau lava le mea, tailo i ai pe...le a se fuafuaga, i mea ia o autu i autafa. A ou vaai atu i le alu atu o autu ia e alu atu i Malie, Afega e le loloto tele ia autu. A o o ia matou, o matou lumafale o le malae e taaalo ai le fanau, e faigata tele e fai o le vaiti o le alu o auala i totonu,...ona ua uma le galuega, ae pei o autu ia ou te talanoa atu ai, ona ua i ai taavale ua totofu ai, ou te iloa e faapena ona talosagaina i lau afioga, ona o lea ua oo tonu lava i ai lau saunoaga. Ae faafetai tele mo lau saunoaga.

**FOFOGA FETALAI:** Tulai mai lau afioga e faaauau lau saunoaga.

**Tofa Hon OLO FITI AFOA VAAI:** E momoli atu le faafetai tele i le faauilavea ma tulaga i fautuaga ua tuuina mai. E faafetai tele i finagalo o le afioga ia Aiono i le tulaga, e sao lelei lava, ma e i ai le manatu, o le a tuu faatasi lava moli ia ma laau ia, e tatou te toe foi lava i le tulafono ua leva ona i ai sa fai ai le mea lea. ae pei lava ona ou fai atu, o le a lafo atu lava i le Matagaluega o Leoleo, o lea ua aveese mai le traffic a le LTA sa i ai, ae o la ua nafa leoleo i le latou matafaioi mo le silasila totoa i tulaga ia. O autu o lea ua faafogafoga atu ia inisinia ma le afioga i le Ofisa Sili o Pulega i le tulaga lea. Ae pei lava e tau manatu atu, i le design lena, ona o gauta po o lou alalafaga lena, pei e tele ai le faataufusi i uta, a tetele timuga e tafea mai, ia lava se loloto e faaalu agai i ai le vai. Ae faafetai mo le mataupu lea, o le a toe silasila i ai le Ofisa Sili o Pulega ma inisinia i le tulaga e pei ona e taua.

E sao lelei lau afioga i le Fofoga Fetalai, ua uma ona avatu lau faamatalaga i le amataga, e onosai ma lavapapale mai o lea ou te faamaumau uma atu outou finagalo, ma o lea o le asiasi uma atu le pulega, e tusa ai ma talosaga.

O le vai lea e i Siuvao o lou uso a sui usufono o Salega 1. E vaavaai lava le tulaga i mea o lo o i ai aiga, pe fa ea aiga pe lima. A o le tulaga i le alu atu i le mea lea e i ai le suavai, e masalo pe o le sefulu maila faatoa oo atu i ina. E fua foi la le tulaga i le cost e mafai ai ona tai atu se paipa. Ae i ai lava le tulaga e fesoasoani ai i tanevai ma fesoasoani atu le pulega i le latou loli vai i se fesoasoani atu i le tulaga lena, e talitali ai i se fuafuaga pe a tele mai ni tatou tupe, e toso atu ai le paipa agai i Siuvao. E pei o le tulaga lena, e lavapapale mai pea, o lea o le a tatou feiloai i tua i outou alalafaga ma tatou talatalanoa po o le a se faiga e toe faaleleia atili ai se auaunaga, a le tatou Pulega.

O taligalu lau afioga i le Fofoga Fetalai, o lea sa saunoa ia le afioga i le Minisita o Siosiomaga, o lea foi e agai atu i ai. E masalo o lea ua outou silasila le atu Aleipata i tulaga i talosaga i taligalu, o lena ua maea ona

faatinoina taligalu i tua i ina, ona e fai lava si aia tele i le galu e pei ona faatoa tea atu nei. O le afioaga i le afioga i le sui usufono o Satupaitea, o le a matou asiasi atu i le tulaga e pei ona matou talosagaina. Ae pei lava o i i e Siosiomaga e talafeagai tonu lava. Ua ou le iloa po o le a le ituaiga mea ua oo i ai, talutalu outou i le tou fetagofi ave i o isi taligalu, ae aumai i i isi taligalu. Ae le afaina o le a ma o atu uma ma le Minisita o le Siosiomaga e asi lou taligalu.

Ona ou oo mai lea i le pulega o malosiaga faaeletise, a manatu lau afioga i le fofoga fetalai i le amataga mai i le faatuina o lenei pulega. Sa ou matau lava mai lena taimi, o se faiga e le i talia gofie e le afaigaluega i lena taimi, ona e amata i le leai o se tupe, i lau lena matau i le tulaga lena. Ae pei ua tuu i ai le finagalo o le Malo e fai e faapisinisi ai lenei Pulega. I lau matau i lena taimi, o tagata nei sa galulue i le amataga maia, o mea o toa, o toa manumanu o le atunuu sa galulue i na taimi, i le faafoefoega maiga o le pulega lenei, e aunoa ma se seleni na amata ai. E to ai foi lou pulou, i tamalii foi o lo tatou atunuu sa amata mai le latou galuega i le EPC.

Le tatou pulega, e avatu lava le tuualalo ia lava onosai, ou te iloa lava e i ai le mafatiaga ua feagai ma i tatou ona o le fetuunaiga o le finagalo o le Faigamalo. E faapea foi le finagalo o le Malo sa fai i toeiina i na taimi. Aua le avea o le taugata o le suauu ma mea tatou te fail ai i le tatou galuega ma tatou tiute, ma tau atu ai i le atunuu, ua uma se tomai ia i tatou e faatino ai se galuega. O le tele ia o isi options o lea ou te faatali atu, e tele options e fetuunai ai le mea lea. Ae pei lava o lea ou te vaai atu o le 20% lea e pau i lalo, lea e aumai pea aumai pea. Ae o lea ou te fiu e faatali atu le tou board e omai i i e vaai au i i, i le mea lena.

Lau afioga i le Fofoga Fetalai, o le upu moni lava i le pulega lea e i i, e leai se mea o lilo i lau vaai. E talu lava ona ou opposition ou alu atu i totonu, e leai ma se vaipanoa e lilo i lau vaai. O lea ua tatou oo mai nei, e pei ona laga mai e nisi o sui usufono ia le tulaga lava lea i le tau o le soifuaga. O lea sa i ai le manatu, a pau i lalo le luasefulu pasene lea o le eletise, sa tatau foi la ona pau i lalo ma le tau o le soifuaga. Aua e pei o le eletise lava lea e faapea mai ai, ua taugata le suauu, lea ua alu ai i luga le tau o oloa tuu aisa ma mea faapena. O lea la ua pau atu i lalo le 20% a le Malo ae o la e tumau lava. E tasi lea vaega o lea se i silasila i ai ia tatou faigamalo.

Ou toe foi mai i le matou pulega i le tulaga lea ua taugata ai le soifuaga, ua taugata le suauu, ua taugata le eletise ma mea faapena. Ona i ai laia o le fuafuaga foi a le Malo talu ai ma le tatou atunuu, ia aumai kamupani ia e faia renewable energies, mea ia o solar ma tulaga faapena. Lau afioga i le Fofoga Fetalai e le o toe umi, ona amata lea o le tauofoga o le fausiaina o so o se metotia o lea ua 12 kamupani ua agai mai le latou manaoga e fia galulue fai a latou atinae i totonu o Samoa. Ma o kamupani foi la ia, o lo o aumai a latou faamatalaga, e le manaomia ni tupe a lo tatou Malo e

fesoasoani atu ai ia i latou, e omai lava latou ma latou tupe e fai ai mea nei. Ae lagona le faanoanoa lau Afioga i le Fofoga Fetalai ona o lea e toalia le mataupu lenei. O lea e toalia le mataupu lea ina ua matou taunuu mai i totonu o le Faigamalo. O lea e toalia i se middle man company le green market. O lea e i ai le kamupani lea, o lea ua tu nei i le va o le EPC ma so o se kamupani e fia omai e fai ni latou solar. Lau afioga i le Fofoga Fetalai, na ou taunuu mai, aveese atu le isi middle man company sa i totonu o le EPC. Sa pologa ai foi le EPC i le fia o tausaga ae o lea foi ua toe onoono mai ma lea mea. O le mea lea ia lava onosai le tatou Palemene ma le mamalu o le tatou atunuu, se i ou taumafai atu e auli le maanuminumi lea e i totonu o le pulega lenei. E le logo malie i le faafogafoga a le atunuu ia le tulaga lea o le faifaipea o kamupani e tu faaogatotonu i i, ae ua le faaaogaina ia le tomai o le mamalu a le EPC.

O lea ua faafogafoga mai lau afioga i le Fofoga Fetalai, i le mea lea. Ae e manaomia lava ni tagata i totonu o le Matagaluega lenei e tetele fatu, tulou le faafogafoga a le atunuu ma le mamalu o le Palemene. A o le taimi lenei ia lava onosai mai. O kamupani nei o lea ua omai e sue o latou manuia i totonu o le tatou atunuu i resources a le atunuu lenei. O lea foi na aumai e manaomia le government guarantee. E faafefea ona tatou guarantee ina le 136 miliona tala Amerika? E faafefea ona tatou guarantee ina na tupe?

**FOFOGA FETALAI:** Ia malie lau afioga i le Minisita se i tuu atu le avanoa ia Faleata 4 atonu e fesoasoani mai lana guarantee i le mea lea e fai nei.

**Tofa Ale Vena Ale:** E faafetai i lau afioga i le Fofoga Fetalai mo le avanoa. E taua tele le matapu lea ua oo i ai le saunoaga a le Minisita. E pau lava le tulaga lea ou te tulai atu ai, se i saunoa mai le Minisita po o ai tonu kamupani ia lea e faaalatua i mea ia. Ni kamupani mai fafo pe ni local company? Ae na faafefea foi ona auai i totonu i mea ia ua e taumafai nei e tau foia le faafitauli lea? ona e taua tele le mataupu lea ua oo i ai lau saunoaga, mo le faafogafoga a le Palemene aemaise o le faafogafoga tapuai mai o le tatou atunuu. Ma le faaaloalo lava faafetai.

**Tofa Hon OLO FITI AFOA VAAI:** E faafetai tele mo le faafesili, e taua, e taua le faafesili a le sui usufono. Ma o se taimi ona taunuu mai lea o le lipoti i le mea lea. A o le kamupani lenei, o le kamupani mai fafo, ae aafia i totonu i i, o le kamupani lea o lea na saina mai le MOU i Amerika. Saina e ai? Na saina e tatou. O lea la ou te suea po o ai shareholders i le kamupani lea. Ae le o lesitalaina foi i totonu o le tatou atunuu. Ae a fua i ai i le galuega ia sa fai i solars ia, e malamalama lelei lava le aufaigaluega al e EPC i le faiga o mea ia o solar, sa fai muamua foi. Ae o le a la le mea lea ua tulai mai? E tutu ai le vaega lea i totonu. Ae maua le latou commission i

totonu o mea ia. E le talia e le Faigamalo, ni faiga faavalevatea tulou faapenei. O le agaga lena o lou Minisita, e ao ona ou faamalamalama le mamalu o le atunuu i ituaiga mea faapenei.

**FOFOGA FETALAI:** Lau afioga i le Minisita, se i tulai ai le sui usufono mo Falelatai ma Samatau.

**Afioga Lupematasila Galumalemana Tologata Togia Tile Leia:** E leai o lea sa faalogologo lava i le saunoaga matagofie a le Minisita. Ma e avatu foi le faamalo i le Minisita e vaai atu e lototele lava le Minisita. Ae ona talu ai, ona o au lea sa tulai mai e tauave le sa o le Faalapotopotoga i le 10 tausaga talu ai. E leaga e le o mafai ona auai mai le kamupani ma i latou o lo o tuuaina i le saunoaga a le Minisita. Ae ou te fia faamalamalama atu e faapea, o le kamupani lea e taua e le Minisita, atonu o la foi e faalogologo mai le kamupani. E leai o le tatou MOU lena sa saina e le tatou Malo i Niu Ioka ma le kamupani, o le fesoasoani mai i le tatou Faalapotopotoga ma le atunuu, ina ua upscale le tatou tauofoga, aua ua tatou fiu foi e fai tauofoga. Na fai tatou tauofoga e aumai lava e le taugofie lava le tau o le eletise. Na faitio foi le Faigamalo talu ai i le EPC pe aisea e taugata ai le renewable, ae o le tali lea na aumai. E ala ona taugata le tatou tender lea e fai o le renewables, ona e laititi le economy of scale lea e fai ai. O lea sa taumafai e tuufaaatasi uma le remaining, le vaega lea e totoe o le eletise lea e gaosi e le suauu, tuufaaatasi ina ia tele ona fai ai lea o le tatou tauofoga.

**FOFOGA FETALAI:** Ua ou manatu le sui mamalu atonu e taua foi lou finagalo, ae talu ai ona o mataupu ua laga e le Minisita, o lea foi ua saunoa manino o le a faamaea lelei saililiga ona tuu mai lea i le Maota. E i ai le manatu o le a le mafai ona ou faatagaina atu le talanoaina o le mataupu lea, ina ia faasolo pea le galuega a le Minisita ua maua ma lana Pulega ona faaoo mai lea i le Maota, atonu e i ai foi se fesoasoani a lau afioga o le foi sa tulai mai i le EPC i na vaitaimi, agai i le lipoti lea, ona aumai ai lea. Ou te le manao e toe toso le tatou taimi i le tulaga lea, ona o lea ua faagasolo le saunoaga a le Malo e faamalamalama nisi o mataupu sa lagalaga.

**Afioga Lupematasila Galumalemana Tologata Togia Tile Leia:** E faafetai i lau afioga i le Fofoga Fetalai, o le a usitaia foi le faatonuga a lau afioga i le Fofoga Fetalai ae pei o nai vaega na sa ou tulai atu ai, ona o la e faafogafoga mai i latou o lo o tuuaina i le mataupu, ae e ava tele atu i lau afioga i le Fofoga Fetalai.

**Tofa Hon OLO FITI AFOA VAAI:** Lau afioga i le Fofoga Fetalai, o le faamatalaga lena e tuuina atu i le tatou pulega lena. E faamalulu i le Ofisa

Sili o le Pulega a le Matagaluega, e leai lava ma se isi o outou o aafia i i, e na o luga atu lava o lea e aafia i i i le mataupu leni. E pei ona ou fai atu e iai se taimi ona aumai lea o se lipoti i i, se i silasila i ai le Maota.

Ona ou oo mai lea i le.....

**FOFOGA FETALAI:** Ia malie lau afioga i le Minisita, se i tuu atu i le Minisita o le Siosiomaga.

**Afioga Hon Toeolesulusulu Cedric Pose Salesa Schuster:** Faafetai lau afioga i le Fofoga Fetalai, o le fia fesoasoani atu, i le saunoaga a le Minisita, e pei ona maua foi i le carbon credit, e tasi lea mea o lea e manao ai le kamupani lea, e avatu le 18% o le carbon credit a Samoa, pe tusa i le iva i le sefululua tala Amerika i le tausaga. O vaega ia o lea e silasila i i, o lea e i ai faamaumauga i i, lau afioga pe afai ni feiloaiga i le taumafaiga o lea polokalame.

**FOFOGA FETALAI:** Manaia tele, sili ona tapena uma o nei lipoti ina ia manino ai le tatou Palemene ona tatou vaavaai totoa lea mo le agai i le lumanai. Tulai mai lau afioga i le Minisita.

**Tofa Hon OLO FITI AFOA VAAI:** Faafetai foi i lou uso a Minisita o lea ua fesoasoani mai i le mataupu lea, o le a le faalautele se faamatalaga, ae pei o lea ua ou fai atu, o le a oo mai le lipoti lea i totonu o le Palemene.

Ona ou oo mai lea i le Matagaluega e tasi a lau iva Pulega a le MWTI. Lau afioga i le Fofoga Fetalai o lo o lelei le faasologa o galuega uma a le MWTI. E tasi foi lea mea ua ta le iloa, e fai alavai ia au, e fai alavai foi ia le MNRE. Sa i ai le tulaga o le itulagi lea i “Apia, sa vaaia ai le tulaga, tulou le Maota, ua poloka ai alavai fou lava ia sa fai atu e le tatou LTA ma le MWTI. Ae aumai mea e poloka ai o taga lapisi, tulou lava le faafogafoga a le atunuu. E avatu lava se talosaga i le mamalu o le atunuu, ia malilie soia le lafoa taga lapisi i totonu o alavai o le mea lena e poloka ai tatou alavai ma sau i luga ma flood ai luga o auala, ma tulaga faapena.

I le taimi nei o se lipoti i galuega faatino a le MWTI, o lo ua faagasolo nei le process o le tulaga o le air service agreement, a le tatou atunuu, ma le talosaga mai a Amerika i le tulaga lea. o lo o faagasolo ai foi ma le talosaga mai o Tahiti ma Kiripati. E aoga ona tatou apoapoa ia atunuu ia e i ai latou kamupani vaalele, ona o le tulaga i network lea i atunuu laiti ia i turisi ma tulaga faapena. Ae pei o lea e faagasolo i ai fuafuaga a le tatou Ministry ma sei, ma le mea lava lea ma Amerika, se i faafaigofie ma tuusaoloto ai tatou Samoa Airways e lele ai i Tutuila. I le tulaga foi i le tatou naunau e aumai le vaalele, le tatou Samoa Airways ae tatou o poloka le mea e agai ai le tatou Samoa Airways i Tutuila, o lene ua toe faaleleia lena vaega.

E tasi le vaega lau afioga, o pemita o fale ma pemita a le PUMA. O lea ua faafogafoga mai le tatou atunuu i le tulaga lea. ua i ai tatou ofisa uma ia e lua i Salelologa, mo le motu tele i Salafai e faaoo ifo i ai a outou talosaga. Ma e avatu lava se lapataiga foi ma se tuualalo ia outou utagia, ia le tulafono e ao ona fai muamua a tatou pemita ae le i faatinoa se atinae. O isi foi vaeg o lo o matauina e ese lava ata o fale na aumai i totonu o le MWTI, avatu le pemita ese le mea lae fau tai lena mea o lea a vaiaso uma a o lea o atu le asiasiga a le tatou Matagaluega ma e ona aafia au ai i lalo o le tatou tulafono ia tulaga faapena ae nao se tuualalo ile mamalu o le tatou atunuu ia faapena ona utagia ia tulaga o le faiga o tatou pemita ma tatou tulafono ona foi mai lea se matou leo lau afioga ile fofog fetalai ae lei faauma atu so matou tala avea lenei taimi e momoli atu ai la'u faafetai tele lava i Ofisa Sili o Pulega uma ma Matagaluega o loo matou galulue faatasi faapea ia le mamalu o tupu ma ee o le afaigaluega i soo se pulega i la outou galuega ua mafai ai ona faafaigofie ia sa'u galuega aemaise foi o le tuualalo i aso uma aso uma i la outou fesoasoani e faapena ona tatou galulue faatasi i tulaga lea , o le upu moni e le pau fua lo outou afu liligi o loo silasila fofoga o le Atua ile auauna e galue faamaoni ma faamanuia foi ile galuega e pei ona outou fita ituga iai, lua afioga i Minisita Lagolago momoli atu lau faafetai tele i la oulua tuualalo ma le faamalosiua ua mafai ai foi ona folau mallie lo tatou sa mai le tausaga seiaoo mai ile taimi nei . E avea foi lenei avanoa ou te faafetaia ai le taouaiga a si ou itumalo Salega Nu 02 faamalo le folau manuia faafetai mo talosaga ma la outou tapuaiga lea o looo maua ai se manatu vaivai ma se vaivaiga o le tou auauna nei e faatino la tatou tautua i si o tatou atunuu pau o lea sei silasila ane le tatou ofisa e sei maua atu le tatou miliona pei a na fai si tuai alofagia foi ia le sii gasegase ile afioga ile tamaitai palemia ma uso a sui usufono i atunuu mamao tatlo pea ia vave faafoisia lo outou malosia ma tatou feiloai ai se taimi lata mai , ia agalelei le Atua ile tapuaiga a si o tatou atunuu , soifua ma ia manuia.

**FOFOGA FETALAI:** Ua faamalo saunoa lau afioga le minisita o galuega tetele sala umi fua le saunoaga ae fai lava se tele o manaoga foi o faamalamalamaga o le tatou maota lenei i lau afioga malo faafetai . O le agaga faafetai ona talu ai o le tatou palemene o loo iai le pulega faatonu le palemia male kapeneta aemaise foi o sui mamalu o itumalo uma , atonu o lea ua faafogafoga mai le atunuu aemaise a le mafuaaga o le taugata o le soifuaga o lea ua manaia le faamaninoga a le afioga ile Minisita i mafuaaga ua ala ai ona taugata le soifuaga ona o le siitia o le freight poo containers lea lau mai ai tatou oloa ma meauma o lea ua matau atu ia maloo mo le faamalamalamaga measili m a taua nao iinei a o le maota lenei e aumai ai mea moni ma mea ao ona talitonuiga e le tatou atunuu tele a tala i tua atu o le maota o lea ua faafogafoga mai le atunuu atonu o lea ua manino le suanoaga o le Minisita ile mafuaaga ua ala ai ona taugata le soiuaga i lenei



vaitaimi a lea foi ua tapena mai le tatou Vaa atonu e fesoasoani ai i ia tatou tau o le soifuaga ua iai nei, ae malie lau afioga ile Minisita ou tusi atu lau afioga na ou tusi atu i lau afioga ou te lei tusi atu i lau failautusi leaga o tusi uma a ia ou te tusi atu ai i lau afioga e kopi ai le pulenuu, o le sui tamaitai sui tina o le matou itumalo nei tei ua faapea mai le itumalo pai ua faapaole i lau afioga le talosaga a lenei itumalo o na e aluatu lau asiasiga tou alolofa ifo iina i Vaimaga faamau ifo a i lau api faamolemole Vaimaga toeititi a oo mai le sami ile aualatele lea faafogafoga mai lae soiso mai tamaitai o le LTA sei o outou alofa ane Vaimaga toeitii a oo mai le sami ile auala tele o la'u talosaga lena lea faafogafoga mai le itumalo ae faafetai tele mo lau saunoaga , manatu o le taimi lenei lau afioga le Minisita o Faatoaga ma Faiga Faiva le tele o au polokalame aua le manuia o le atunuu le tulaga ile tamaoiga taumafa mea eseese.

**Susuga Hon LAAULI LEUATEA POLATAIVAO FOSI:** E momoli le agag faafetai i le malelega momoli a lau afioga ile fofoga fetalai o le maota fono o le atunuu manatu foi lea ua faaliu le la i lona tau afiafi o loo faasolo pea le galuega a le tatou palemene e pei a o upu masani o le atunuu Samoa o le taimi e lelei ai lau malolo o lou galulue pea au auauna na e tofia mai aua le tautuaina o le atunuu ua oo mai le faasologa o le moliga fua a le tali a le Malo tali aloaia a le tatou kapeneta lau afioga ile fofoga fetalai amata mai i o le afioga mai le afioga ile Minisita o le Soifua Maloloina ma faasolo mai o lea ua taunuu mai ile saunoaga a le afioga ile Minisita o Galuega Tetele a le tatou malo manatu lea faaagatama o le Kirikiti Samoa toe ole masaga lea totoe toe o au ma le afioga ile alii palemia a lea ua agai mai lo tatou sa ile tolotolo i Mulinuu ona tatou agai loa lea e faatino le saunoaga momoli na tatou agai loa lea e faatini le saunoaga momoli a le afioga ile sui palemia o le matua o le lauga a le lenei Matagaluega sa maua mai lea ile Ioane 15 o au nei o le vine moni ao lou tama o le galue vine ia o la uma e le fua e aveeseina e ia ao la e fua lelei e teuteu ina ia fua mai ina ia fua mai ia te ia, ua uma ona ou faamamaina outou ile upu na ou tautala atu ia te outou, e faapei o lala o lala e le mafai ona fua a latou sei vagana ua pipii ile vine faapea outou pea afai tou te le tumau ia te au upu lena lau afioga lau afioga ile fofoga fetalai taui ai se upu a lenei Matagaluega o loo tausia fugalaa eseese ma fua o faaeleeleaga o manu felele ma manu vae fa , manu fafaga uma o lenei siosiomaga i Samoa o loo ma galulue ai ma le afioga ile Minisita lagolago ia Maiava o le a fai ta upu oute faapai atu ai lau afioga ile fofoga fetalai i lenei itu neva o le taeao na liugalua manatu o lea ua maea na fofola le fala saunoa manino le mamalu o le kapeneta aua le fuesina lea ua maea ona sausau ma fuaafa ua ta le paia ma le mamalu o Samoa ae muamua na momoli atu le faafetai tele lau afioga ile fofoga fetalai o le maota fono ona o le faafoefoaina o le tatou fono usu malo lou onosai malo lou faapalepale malo

lou faatoatoa malo foi lou faaaloalo ma lou faatamalii aua a le toa loa lou tofa ua lukaluka le gataifale ona le malu lea o le maota ua mamaioa ma mamaitaloa le maota o le atunuu o le faafetai lena faafetai i lau afioga tauaveina o le tatou fonotaga lau afioga ile failautusi ma le sui failautusi ma le tatou ofisa ua faamalo le galulue afioga le agai ma le satini o le maota tulaga eseese i Ofisa Sili o Pulega ma Sui Ofisa Sili o Pulega ma le tatou Ofisa ile fono faamalo le tai faamalo le tapuai i outou faiva alofi lima o loo o outoi tautua le fono sili ma le maota o le atunuu faafetai ua ou matau ua tele le suiga i luga o le tatou upega o faamatalaga faafetai tele le auaunaga lea tele le suiga i lau matau avega o faamatalaga aemaise le faamatalaina ile atunuu mai lea taimi i lea aso ma lea aso ma mea na tutupu ma le faalauiloain ao le mamalu o le palemene faafetai tele lau afioga ile fofoga fetalai faafetai lau afioga ile failautusi o le fono ma o outou faiva alofilima laga lea tapuai Samoa tapuai Samoa i Samoa nei ma soo se Samoa ile lalolagi atoa o lea suesue mai le latou faamalama ma tilotilo mai o le a tatou galuega lea fai lau faafetai muamu lena lau afioga ile fofoga fetalai.

Momoli lou agaga faafetai ile paia ma le mamalu o le palemene o lea ua tatou taunuu mai i lenei fonotaga o se tasi lenei fonotaga sili ona taua i tala faatatau aemaise o le faatulagaina o le mamalu o le palemene o le taimi tatou te talanoa ai ma lufilufi le tamaoiga o le atunuu atonu e iai nisi tatou fono i tulafono e iai nisi tatou fono tatou ai i isi mataupu eseese ae fono loa Tiafau ile tala o le Tupe ona faataatia uma loa lea o mataupu uma ae tatou agai e talanoa le tamaoiga o le atunuu.

Aisea le paia le maualuaga lena itu o le malu lau afioga ile sui taitai aemaise le ee papa aao o sui mamalu uma o le la itu o le maota tainane foi le ee tapuai a lea itu o le maota ile afio atu ile afioga ile sui palemia ma Minisita o le Kapeneta, Minisita Lagolago o le itu taua o le tatou galuega e fau faatasi ma e iai lou lagona e momoli atu ai lou agaga faafetai tele o le fono lenei lea la savali lo'u 20 tausaga ile maota e ese a lou lagona i le tatou fono lenei e leo ni upu e avane ai lau lagona ma lou manatu sa tatalo ile Atua alofa ia iai se taimi ma se laolao e faapea ai tatou upu ia iai se taimi toute saunoa mai ai ta te talia gofie , iai foi se taimi tou te tuualalo mai ai tate lagona ia iai foi se taimi toe te agai mai ai i saunoaga a le Malo e te tu lelei ma e vaai i upu ma tala lae faimai momoli atu ai le agaga faafetai tele i lena itu o le malu lau afioga ile sui taitai aemaise le maave eseese o tulatoa ma itumalo o loo outou afifio tala mai aao.

Momoli foi le agaga faafetai i lenei itu o le malu i lenei foi nofonono atu a lenei itu o le tatou faigamalo filifilia tusi aao iai Samoa e fai ma o matou tagata e omai e tauave le faigamalo o Samoa i lenei nofoaiga , lau afioga ile tamaitai Palemia o le malo o Samoa talofa e, e ui ina tatou le feiloai i lenei aso ao loo lagona pea le mafanafana o le Atua ona o le tatou sailiga malosia ae momoli le agaga faafetai male faamalo i lau afioga ile tamaitai

palemia ona o lou faatuatuaga o le uluai fono talu ona ou tulai ile maota lenei ua le saofai ai le Palemia ile lauliliuina o le tala o le tupe o le malo o Samoa ae ua ou faaupuina le mea lenei ua lava le faatuatuaga ua momoli mai ile afioga i le sui palemia male kapeneta ma o se fatu fou lenei ua ou lagona ma lou agaga loto maualalo leaga mea lelei o se faatuatuaga lau afioga le fofoga fetalai , because its never happen before e lei tupu muamua le mea lenei ae ua lagona le agaga faafetai i le malaga atu o le afioga ile tamaitai palemia e saili gasegase a ua aumai lona faatuatuaga i lau afioga ile fofoga fetalai afioga le sui palemia ma le kapeneta , le afioga ile sui taitai ole itu agai ma tatou uma tatou te omai e pasi la tatou tala o le tupe e leo se mea lea tatou te lagona ai le agaga o le loto maualalo ma le loto vivii atu ile Atua aua foi na faiatu muamua e le malaese iina malaese lenei itu o le maota. Samoa o le atunuu ua uma ona tofi e leo se atunuu faaloaloavale poo a tatou loto ma agaga afai o le finagalo lea o le Atua i lenei nofoaiga o le mea lava lena e tupu ae momoli lou agaga faafetai tele lou agaga loto maualalo ma le lagona e ia te au lava ia ma lou sui usufono momoli ai le agaga faafetai i lea tulaga faafetai i lau afioga ile sui palemia o ou faiva alofilima e le tau faiatu tagata a ma lona taimi aso foi ma le filiga o le aso foi ma le mataigatila ae faafetai ile Atua o lena e te talitonu i lou valaauina aemaise foi le paia ma le mamalu maualuga o lou auvaa le tatou kapeneta lea lava matou te apefoe faatasi ma tilotilo atu i lau taitaiga male talitonu o tatou a lea United we stand divided we fall faapena foi le na itu o le maota ao nei meauma lau afioga ile fofoga fetalai ma le tatou galuega tatou te fetu a le too ma tepa ile faamalumu lea o le aufaugaluega tofofi o le tatou Malo outou lava paia ma mamalu o tupu ma ee tamalii ma failauga, faletua ma tausii , sauao ma tamaitai o outou o vae ma lima o le tatou malo e iai le itu aso o le tagata foi ma lona taimi leiloa pe oo atu ile lumanai ua saofia se isi o outou i nofoa nei matou te saofafai ai ao le tatalo lava ia faafetai le galulue , malo le onosai i o outou faiva alofi lima malo le galulue, ma e leai se iota o lo outou afu e maligi fua o le fua foi tou te lulu tou te selesese aua le faigamalo a Samoa ua outou faafofoga ua tausii le faasoa aumai avatu saunoa toe itutaia o le maota what we need is to stand together the government of the day ia see ma autafeloa le sao o Samoa uma taimi o tatou fefulituaiga mavae atu vasa o le tusi atu tusi mai ae omaia tatou galulue faatasi aua se manuia o si tatou atunuu o lau o le fiso o lau o le tolo e tasi le mauga e olo e le tau saili so tatou ala i malo o polokiki e uma nei ao tatou e faasaga mai e faasaga atu e alofa le maota e alo mai alo ifo alo ane alo atu Samoa o le aiga ia fai tatou ma lamepa susulu ile silafaga o le Atua ma le vasa pasefika tatou te agai e faataumuaava lo tatou sa tausii o le filemu male fealofani lau afioga ile sui taitai o le itu agai e le taufaafuluina lou tofa ile fonotaga lenei momoli atu a lou agaga faafetai tele a ou nofonono ma ou matau lelei i vai laina o au saunoaga o au upu ma upu lafo momolil ai lou agaga faafetai e le tau faafulu atu leaga e te

muamua ia te au ile maota ma e fesili a mulimai ia muamai o ou foi faiva alofilima nao le Atua na te silafia a ia e manatua o lau galuega e mulimuli ia te ia oe lava pea lau onosai a lea ua matau ile taimi lenei o loo e tu pea ia matagi olo ma e onosai oa ma upu ma tala ma Tuilaepa taatia pea le ma va tulou Samoa ae sagai ae oe e te silafia lelei meauma mai le amataga o le tatou mafutaga pau a le mea lea e faaoloolo maau ai tausi le filemu ina ia filemu Samoa pau a lea , aea lea na ou le malolo i luga o le TV o le tali o le tali leaga o le tali mulimuli lea ua outou faafofoga ile aso o le tali a Samoa o le tali lena a le malo lea ua outou saunoa mai nei tatou tausi le filemu o le fatu lena o le aiga o le o le FAST ae fai ifo se galuega e le tau aoaia e laupuaa tamafaiga o lena iina le tofa ma le faautautaga tatou te tutu faatasi e tausi le filemu o le atunuu o le tatalo lena o le tuualalo lena ole fautuaga lena ia outou uso uma tuafafine sui usufono ua tatou mafuta ao le faafetai faapitoa i lenei aso o le faafetai ile tapuaiga a Samoa , Samoa lea atunuu pele o lau outou faatuatuaaga na aumai ile faigamalo matou te tulai ai e tauave le atunuu o lea matou te oloolo pito vaa ua matou alepuna ma aleana ina ia manuia Samoa e leo faigofie le faigamalaga o luitau o faigata , o faigata o upu ma tala a lea folo le oona o mea faaletonu ae faaali atu pea le filemu o le Atua ina ia sao i maau le folauga a Samoa taialalo pea le ia a Sasaumani ma ia saili i lalo malo , lena tou te vaai e leai a se gagana a le afioga ile tamaitai palemia aisea? Tausi le mamalu tausi le maualuga tausi le faaaloalo o le agaga lena le tatou maota faafetai Samoa o outou faiva alofilima o lea lauliliu e lou palemene o le palemene na e filifilia palemene o Samoa matou te omai lenei nofoaiga sei tau faufau le atunuu faafetai i o outou faiva alofilima le aufaigaluega tofofi a le Atua i la outou tatalo ma la outou faamanuia o la outou anapogi ia viia le Atua o outou faiva alofilima o loo ae ai i manu faiva o le tatou faigamalo ma lau palemene faafetai foi ile pule mamalu a Alii ma Faipule itumalo e fia aua Aiga ma latou ma latou Tama ,Tama ma latou Aiga le usoga Tumua ma Pule, Ituau ma Alataua , Aiga ile Tai ma le Vaa o Fonoti ia viia le Atua ona o la outou tapuaiga aemaise le faafetai tele ona o la outou faatuatuaaga na momoli mai le tatou faigamalo filifilia matou te omai e tauave le atunuu o lea faatoa 16 , 17 masina talu na tulai lau faigamalo e tauave le galuega lea taumafai atu nei lea foi ua tou faafogafoga uma i tali a sui usufono lauga sui usufono tainane tali atu a afioga i Alii Minisita faamalamalama ,faapulapula faamanino faamalamalama lo outo finagalo o lea ua aumai ai la outou tuualalo mo le tatou faigamalo , momoli le agaga faafetai Samoa i lau tapuaiga , lo tatou va feagai ai ia Tutuila ma Manua ile atoa o Samoa Tutuila mna Manua tatou foi o le aiga tasi le tama tasi le tina uso tatou faafetai lea ua fusi le fau ua malo le atoa o Samoa ua matala a tatou feosiosiaiga , ua matala tatou fefaatauaiga ua faaulufale lo tatou fealolofa ai lo outou manatu mai i lou malo tutoatasi amuia outou tou te tua ile vao ola aua le malo tele o Amerika ao nei meauma tatou te faafetai pea ona o le

alofa faaaualu ma le alofa tulai lau afioga ile fofoga fetalai le tapuaiga mau a le afioga ile Ao mamalu o le Ao o le malo ma lana Masiofo, faapena foi le afioga ile Sui o le Fono sui Tofia le paia male mamalu o le Faamasinoga i ona tulaga faalupe faapena na ou avatu ai foi sa matou faafetai faaleauau ile ala o la outou faiva alofilima ma la outou galuega faatino o lou tulai i lenei aso sei tau avatu se faamalamalamaaga lau afioga ile fofoga fetalai e ala i lenei Matagaluega na tofia ai au e le Palemia male Kapeneta manatu ua malamalama meauma i la outou faafofoga i meauma tau Faatoaga Faigafaiva o nei le taeao e tui loa lou pelaue o lea ou oso ile taavale ae vili mai si ou atalii e vaai le matou faatoaga faimai Papa ua fanau le tatou povi faiatu ea ea son ua fanau le povi faiatu tua manaia lau news o lea ou alu ma au i tai le palemene o lea folafola ile tatou palemene ua fanau le tatou povi muamua o le povi na faamealofa mai e le afioga Minisita o Falemai e leai ni tupe na faatau ai e aumai le povi ae ou aveia iai le 4 afe tiapula o se tala lelei mo au le Minisita o Faatoaga ma Faigafaiva leaga o lea e momoli atu lava lau feau i aso uma ma aso uma le paia e o le palemene ma Samoa e foia uma atuagaluega lea tatou te iai le tauagata o le soifuaga sioki meaai pea tatou o lava tatou e toto a tatou mea taumafa , ma o le feau lava lena lea foi ou te momoli atu le paia e o le palemene tuu le tatou ola faalagolago i mea mai fafo ae faapea ua siokki agiagi lea na saunoa ai Sula ma Peseta faaoga le fiu faaoga le moegalo ia ma isi mea na toute silafia aua tatou te faalagolago tele i mea na mai fafo o le auga a lea avatu toto mea i tatou lima ina ia tatou gafa taulimaina ai pea tulaga tau taumafa lea ua outou faafofoga mai saunoaga a Minisita e tataua ona fai le substitution o le import lea tele ai le tatou tupe lea alu fafo e tau totogi ai oloa lea tatou te taumamafa ai i aso uma aso uma faatoa foi anapo le kamupani moa lea sa ou tautala soo ai lava e omai le assessment pe faafefea ona replace le fia sefulu container 40 ft lea tatou te taumamafa ai i vaiaso uma o lea le tali na aumai 51 itumalo la ua tofi ma le Ofisa o le fono faavae ia amata loa lea iina , fafaga a tatou moa , fafaga a tatou puua, fafaga a tatou povi fafaga a tatou mamoe , toto ia lava tatou meaai o le tagi a le ou mate ia te au o le Minisita o Faatoaga vae ane le afioga ile Minisita lagolago lau afioga ile fofoga fetalai e uma ai le mea lea tatou te pisa ai e matua uma lava te leiloa poo lea le isi mea tatou te tagisa ai o lea i o tatou lima le fofo o le mataupu, saunoa le minsita o galuega tatou o e matua lau mai ni kamupani e tapue le eletise mai le la e sau ai le tau o le eletise mai le tala i le 40 sene faapea e le mafai ona fai e mafai , faataavalevale atu nei lau afioga ile fofoga fetalai aua a pau mea ia ona uma loa lea o le vevesi saunoa le minisita o le siosiomaga lea a tatou te nonofo ma le **carbon credit** oka se tupe ao lea a tatou te sasa pala le Minisita o Tupe Maua e ala ile aoga o tiute ma taxation o le tatou atunuu manatu lea avatu lau faamalosiua ile paia male mamalu o le tatou palemene o le i o tatou lima le fofo o le mataupu o le tatalo e tuuina atu i lou leo vaivai le atunuu atoa faamolemole Samoa a outou

faafofoga uma tatou fai faatoaga uma a Nuu ma Itumalo o le faafitauli o le taaloa o puaa ma povi ma mea eseese lea agai toe faaleaga mea toto a le au fai faatoaga faamolemole faamalosi tulaga o tulafono i tatou Nuu ina ia toe tuupa uma tulaga o tatou mea fafaga ma meauma na lea tupu ai , o au ia ma lou itumalo ua matou tapena e ituaiga uaea eseese e fai uma ai pa nei e puipui ai meatoto ma mea fafaga ma meauma na aua e pau lea o le auala tatou maua ai le aano lea tatou te naunau ai ua lipotia e le FAO o le freight lea ua iai nei ile lalolagi o le food security matua popole le malo taupulega o taumafa o le lalolagi i alualu le lalolagi leai se meaai e maua fesili a lea o tatou ia tatou o lea le tatou auala e fai o le tatou tali lea ua faasolo atu lena ua outou silafia faamolemoel lo outou paia ma lo outou mamalu e lei ni a outou uluai seleselega faamolemole faailoa mai ile Matagaluega tatou unai le mea lena tatalo lena a Matagaluega o Faatoaga ma Faigafaiva atinae a e outou tulaga tau meaano mea fafaga o ia o le sami o faafailelega lea ia te tatou ona leai a lea se mea tatou te popole ai i taualumaga o loo fai ua uma foi ona aumai e le FAO ile fono mulimuli le na fai iinei masina ua tuanai atu le 10 miliona mo tatou uma na allocate le mea la e toe fai ai nisi a tatou ..... e pei ona oyu faiatu ai ile atu Aleipata , Falefa , Vaimauga toe faaopopo ai nisi .....o le matagaluega leaga ua vava mamao tele ae tasi le auga ia faatupulaia tulaga tau hunting materials ina ia tupu pea le faamoemoe.

O le talosaga lona lua lau Afioga i le Fofoga Fetalai, faamolemole le aufaifaatoaga manupapalagi, ua leai ma se tatou fuainumera o tupu ona o le malosi o le tatou fasi faa-Samoa. E sau loa le faalavelave faa-Samoa, e le toe i ai lava se popole tasi na o le faasolo lava, ua le mafai ai ona tupu le tatou atinae o manupapalagi. A o le tatalo, se i taumafai atu le tatou pepa lea e ave i le Kapeneta e fautuaina le atunuu tatou faaliutupe le tulaga o le faaaloaloga e tau ai le manupapalagi, \$500, ua tau lena o le suatalisua. Ia a fia tele tele e le \$1000. A o la e lava ua i ai tatou pusa pisupo po o le taitai ola loa. A ia alolofa le paia ma le mamalu o le tatou aufaifaatoaga manupapalagi, o lea ua matala mai tatou maketi mai fafo e ave ai le meat lelei i fafo, faatoa faalalo lava lau povi i se tupe lelei ua e maua, ona e iloa loa lea o lau atinae o lo o tupu i luga. Ae a fai pea le tatou mentality masani, se e ala ona fafaga povi o faalavelave. Ia tatou te au i le tauola au i le fagota, ona o tulaga e leai la se atinae e tupu i le tatou manupapalagi, ae faamoemoe e avatu pea le tuualalo i le tulaga o le faamoemoe ina ia tupu le tatou atinae o manupapalagi.

O le tulaga o le tatou fesoasoani sili i le mechanisation, ia lea ua ou fai atu, tele outou na omai e talosaga mai taavale, farm cars, ia e tau aumai mai fafo ae leaga o lea e tapu le mea i le 10 tausaga. O lea ua ave le talosaga i le afioga i le Minisita o Tiute ma le Minisita o Galuega, tatala laitiiti atu i tua i le isi 10 tausaga, a ia aumai taavale lelei four wheel drive lelei, kapalaika, points, sipaka. O le tele o taavale ia e aumai le taimi lenei o mea

o electronic, na ona vaivai lava o le maa tu i tua i le taloloa e le toe migoi. A o la e iai lava taavale lelei mo faatoaga lava ia, mamafa, V8, V12, V10. E aoga e fetosoai solo ai mea ia tatou te o ai i auala, ae onosai mai. Ou te iloa ua 20+ saina ua ou saina ai i le Minisita o Tiute, e tasi lava le tala a le Minisita o Tiute, sui le Tulafono. Ia o lea o le a sui. Ae fai i o tatou aiga uma la e i fafo, onosai mai e aua le aumaia se taavale aua na o le ave lava ma toe faafoi. Ae lava mai le onosai, e faatulaga atu lava le faamoemoe lena mo le tatou aufaifaatoaga ma le aufaifaiva.

O le tulaga o le gataifale, ia o lena ua silafia le tulaga o lo o i ai tatou kamupani i'a e lua la e i tai i le uafu, o le Huanang ma le Deep Sea o lo o i ai nei le faamoemoe, tapena se isi mea e ave i ai le kamupani i'a ua tumu tele ai le uafu, la ua manaia le sosolo mai o tatou meli. Oka le mau meli. Ia, o le agaga faafetai lena. A ua faalavelave tele le mea ua lalaoa uma ai tai i le uafu i tulaga o mea tau i'a, ae a fai lava le uafu e ave uma i ai tulaga o mea tau i'a, ona faigofie lava lea ona fai i ai le tulaga o le loading ma le off loading.

**Afioga Peseta Vaifou Tevagaena:** Lau Afioga i le Fofoga Fetalai mo se avanoa lau Afioga...

**FOFOGA FETALAI:** Ia malie lau Afioga i le Minisita se i fai sau malologa se i tuu atu le avanoa i si au uo mai Faasaleleaga 5.

**Afioga Peseta Vaifou Tevagaena:** Ioe. O taliga lava e fia faalogo i lenei foi Palemene le matagofie o le sausaunoaga foi a le Afioga i le Minisita o Faatoaga. Aua e pei lava ona ou fai atu, e saunoa loa le Minisita o Faatoaga, e ese le manaia, e faalologo uma lava le Palemene, aua foi o mea lava e saunoa i ai le Minisita, e talitonu uma lava foi i le saunoaga a le Minisita. O le agaga lea e momoli atu ai lau faafetai i lau Afioga, ae sa ou talitali pea ia sao ma ia matagofie foi le saunoaga a lau Afioga i le tulaga lava lea tau i meaai tau faatoaga.

Ae ona o lea sa ou talanoa atu foi i lau Afioga i le tulaga lava lea ona o lea sa taua foi i le saunoaga a le Afioga i le Minisita o Tupe i mea foi ia o fuamoia. O lea lava e le mafai ona alu ese ma lou mafaufau lau Afioga i lau saunoaga muamua i le isi foi Tala o le Tupe, o le ua iinei i Samoa nisi foi o kamupani e aumai ai fuamoia foi ia e tai 3 lava itula ma toe fananau le fia selau moa. A o lea foi ua ou faalogologo atu nei i lau Afioga, o lea foi ua toe taunuu mai le isi kamupani e omai e omai foi latou e toe tau faamanino ma toe tau faataitai le faiga o pamoia. Pei o le mea lea lau Afioga ua ala ai ona ou toe tuliloa le tulaga lea, po o fea tonu lava le sao o le tulaga lea.

E pei o si vaega lea lau Afioga i le Fofoga Fetalai o lea e fia faamanino. Ma lou faaloalo lava.

**FOFOGA FETALAI:** Mo le faasaoina o le taimi o lau Afioga i le Minisita, se i tuu atu le avanoa ia Aleipata Itupa i Luga.

**Afioga Fuaava Suluimalo Amataga:** Faafetai tele mo le avanoa. Ou te le agai i le fuamoia ona e le i lavea i se lauga a Aleipata Itupa i Luga, ae na o le vaega lea i tatou nursery ia ua taua e le Afioga i le Minisita lea ua tea ese ai. E avatu le agaga faafetai, o lea foi sa faalia e lenei itumalo, le one stop shop i le Itupa i Luga, e maua ai le falemai, o le fuimu, o leoleo, Ministry of Agriculture. O lea ua uma ona matou tapena ma faamama le elele o le MNRE, ae faafetai o lea ua maua atu, e \$10 miliona lea na aumai e le FAO mo tapenaga ia, atonu e maua ai se refund o matou tapenaga lea ua uma ona faamama le elele, aua foi le agai atu o le Matagaluega.

Ia pei o le tulaga lea e momoli atu ai le agaga faafetai, ia ua matou tapenapena mai foi i le vaega lea e tatou te milo faatasi ai ma le Komiti a le matou itumalo e maua ai foi le faamama-avega, o lo o i ai le vaega 10 eka e tapenapena ai tulaga o nursery aemaise foi o le faafailele o manupapalagi aemaise foi meaituaolo mo le auina atu lea i le matou itumalo. Ma le agaga faaloalo. Faafetai.

**FOFOGA FETALAI:** Malie lau Afioga i le Fofoga Fetalai se i tuu atu le avanoa i le sui usufono mo Sagaga 2, Tuisamau.

**Susuga Maulolo Tavita Aмоса (Sagaga 2):** Faafetai lava mo le saunoaga matagofie. Sa ou taua le tulaga lea ou te ioe ma amene tatou te tua lava i le toe faaleleia o le tau o le soifuaga i meatoto ma mea fafaga, se i tulou le faafofoga a le atunuu.

Ua ou tulai atu o le vaega o lau saunoaga lea e faapea e taumafai se pepa i le Kapeneta e \$500 e sui ai le povi. O se fuafuaga e ese le manaia i le faalogo atu. A ua toe seu foi ua toe sau foi pe a le \$1000. Ae a mafai ona ave le \$500 leaga o le tatou atunuu, o le atunuu, tulou o le upu e to ia te au, e fiatagata iloa. A aveatu le \$500, o le sua lea o le povi po o le... ae \$500 ona faapea lea, e faiupu i ai. Ana o se mea lea ua taimua mai le Malo, o le \$500, o le value lea o le povi. O le a toe feteenai lau saunoaga lau Afioga i le Minisita i le isi foi au saunoaga faapea ia pe o la e i ai le pusa pisupo. Ae silasila foi, e moni lava le saunoaga a lau Afioga, a pusa pisupo, ua alu i fafo le tatou tupe ma atili tele ai le trade deficit lea sa taua ou muamua. Ae manaia ia o le tofa lea ua aumai, faatupe, sui faiga ae tumau faavae. Ma le faaloalo lava.

**FOFOGA FETALAI:** Se i tulai mai lau Afioga i le Minisita.



**Susuga Hon LAAULI LEUATEA POLATAIVAO FOSI:** Malo faafetai. Ia o le tali i le saunoaga a Aleipata Itupa i Luga, ia e faapena sou lagona, leaga ua mamao tele le va o Poutasi ma le atu Lepa ma Aleipata, ae leaga o lea foi ua uma ona taunuu mai le talanoaga a Aleipata Itupa i Lalo. Ioe. O le a ou alu atu ou te matamata lelei po o fea tonu le mea e tatau ona tu ai le tatou nursery, a o oulua lava o le uso, o Aleipata o Aleipata. Ioe. Ia, ae pei e faapena se lagona, ne i te i ua ou fusi oe ae faamamulu le isi uso. Ia ae lafo maia, lafo maia o lea ua maua o le o le a fai le tatou one stop shop.

Tuisamau, o lagona na ma manatu na, ta te musu ne i te i ua tilotilo mai Samoa ua ou aoai le atunuu, tulou le gagana. A o le faaupuga, ave pea le avanoa, e \$500 le tapulaa a le tatou Malo. A o le tagata, tatala le avanoa. Afai o le atunuu o le atunuu fulufulele, ne i te i ua tuu le povi na tuu e ave ai le sua e \$2,000 le tau o le povi, a o lea o le a faatupe i le \$500. Faitalia le aiga po o le a lana teutusi e fai. O lena e te silafia o oe foi o le tootoo fetalai o le atunuu. A alu atu nei Le Ao o le Malo e \$500 lana povi? O lena e i ina le tofa, ae tasi lava le auga o le Matagaluega, ia taofiofi le fasi faaletatau o tatou manupapalagi, ua leai se breeding. Ua o atu nei le asosi a le aufaipovi ua manaomia se isi uta povi e aumai. Ou fai atu, o le a le tou galuega lena e fai? E leai se mea. E manao e aumai le isi uta povi ona alu lava lea i le channel lea a pigi lava pigi. A fasi lava nei fasi nei, ae tatau ona fai se tapulaa ma se tuualalo a le Malo e puipuia ai. A faapea nei o lau povi lea o le a fai e fai ai lou faalavelave, ia ona ou alu lea saili se isi e aumai sau \$1,000 ae avatu le mea lea e faasao ae aumai lau \$1,000 ma au, ona faapena lea ona faigofie, ae taofiofi le fuainumera o tatou manupapalagi. A o lena e i ina le tofa. Ta te musu ne i te i foi ua pea mai ua faatonu e Laauli le aufaifaatoaga. O le faaoololomaau ma le tuualalo, ia tupu le atinae povi i le atunuu. A o le taimi lena, tulou lava, o le fili numera tasi lea o lea e i ai nei ia Samoa, o le fasi i tatou faalavelave Samoa. E matua leai ma se atinae povi e tupu, aua o lena ua tatou iloa faalavelave. O le isi faalavelave e 30 povi i le maliu e tasi. O nisi faalavelave, saofai ma mea uma, e le i lalo ifo o le 10. A outou vaai i le fuainumera, na o le nutimomoia o le loto o le aufaifaatoaga o le mea lea. E ui o lea, ia o le tuualalo lena, ae faafetai o lea ua aumai la outou tuualalo.

Peseta, e le uma lava, si ou uso e talofa e. Ia aua e te atugalu, o oe lava ia e te le talitonu ia te au, a o lea ua ou fai atu, a e fia matamata i le fale fasimoa lea o le a uma, ona e sau lea ta o. O le fale lena ua tapena e Frankie, o ana moa uma ia o breeders ia e maua mai ai le fuamoia, lea o le a aumai e ave e fasi. A o le kamupani lea faatoa o atu anapo, o le kamupani la lena, o le kamupani lena e aumai fuamoia ona aumai lea ave i totonu o masini e tau o incubators, incubators. Ua e maua mai lau tala? O totonu o masini na, e faafofoa ai fertile eggs ia e aumai. E tatou te aumaia tai 10,000 i le tai 20,000 fuamoia e aumai, ona aumai loa lea faafailele i i ma fofoa ma

maua ai loa le tamai moa lea one day hope, ona tausila lea o le tamaimoa lea one day hope mo le tasi le vaiaso, a matua loa ona ave loa i tua i lima o le aufaifaatoaga e fafaga e latou. Fa vaiaso toe foi mai le moa ua 2 kilo le tele. O le moa la lina, ia ona aumai loa le ave i totonu fasi. Understand? Ia, e le o ni talaole laia leaga e te tulai mai lava faapea e fesiligia pea, fesiligia pea au upu ma au tala lea e fai atu, ae le afaina, e aoga foi lou saunoa mai.

O isi tulaga lau Afioga i mea tau faigafaiva, ia o lea ua outou silasila iai, ua alu atu le tatou limu, le limu lea e numera tasi ai le itumalo o Peseta i le mea lea e tau o le limufuafua. Le limu foi lea e iai le talafaasolopito fai mai o le lei na aumai Falelatai na avatu ma masaa i le ava lea. O lina e maua ai le anae lea e mumu lona sope. O le talafaasolopito lina o le tatou sootaga, o le tagi a le tamaitai o Meto tagivale e fia pae lona fale i le lei lea mai le Aiga Tauaana, ae avatu e le i oo i uta na masaa i i, lea la e feilafi lelei ai lou gataifale, lea la e ala ai ona fua lelei lau limu, lea e ala ai ona fua lelei ma fetiitii le limufuafua lea e maua i le tatou nuu. O le limu lea lau Afioga i le Fofoga Fetalai, lea ua faasafua uma atu lava i le tatou itumalo, a i ai se isi e manaomia le faafailelega limu, logo lau Matagaluega, o le tatou limufuafua lea crates, e le o limu lala foi ia lea e maua foi i nai isi itu o le tatou atunuu.

O tatou faafailelega faisua, o tatou faafailelega aliao, ia ma le tatou tilapia. E le i mamao tele atu na tatala le tatou nursery lea i Mulifanua i Toloa, faaopoopo ai nisi tanevai se tele, o lo o faafailele ai mea nei e tufatufa atu mo le tatou atunuu. A oo la i tatou uluai seleselega, e avatu foi ma mea na mo le tatou uluai seleselega. Ua uma ona foai ia Lufilufi lana 200 faisua, lana 200 tilapia ma ana aliao pule ia po o le a le taimi e ready ai lana fuafuaga. A o mea na o lea ua foai, ma le anoanoai o koko, o niu, o fualaaaina, fualaaui aina taumafa mata, fualaaui faisua, koko ma mea uma, ma ana meafaiglauega eseese e \$7,000 le tau, o suo, o samala, fao, mea uma. Ma lana \$3,000 e pule ai ia po o le a le tulaga e faasoa ai i lana uluai seleselega. Ae ua ou manatu e faamalamalama mo lo outou silafia ina ia outou iloa ona aumai lea o le tulaga o le faailoa mai i le tatou Matagaluega ona faatino ai lea o tulaga mo outou.

**FOFOGA FETALAI:** Malie lau Afioga i le Minisita, ua manaia lava le faamalamalama ma lau saunoaga, ae peitai, ia, ua tatau foi ona fai sina au malologa. Atonu o lea ua faafogafoga foi le auvaega ia e le i faia lava ni uluai seleselega, ia lea ua taua foi lau faasilasilaga o lenei aso, ua maua foi le malosi ma faamoemoe aua le faamoemoe o le Matagaluega.

O le mea lea, o le a faataatiaese Galuega a le Fono Aoa mo sina malologa, tatou toe feiloai ai...

*Na faataatiaese Taualumaga a le Fono Aoa mo lana malologa i le itula e 3:45 i le afiafi ma toe faauau i le itula e 4:20 i le afiafi.*

**FOFOGA FETALAI:** E faasilasila atu aua toe amatalia nei Taualumaga a le Fono Aoa Faitulafono .

Ua saausi lava le faafofoga o le tatou maota ile saunoaga tali fuaitau a le kapeneta tusa i laasaga u aoo iai le tatou felafolafoaiga e faaleo pea se tuualalo a le nofoa ia alofa sui usufono e fia faauilavea ina ia agai sao ia outou faauilavea i mataupu sa laga ia outou saunoaga. E le toe moomia se saunoaga faalauaitale o le agaga maualuga o le lelei faagasolo o le tatou galuega e faataatia ese tatou taualumaga mo le malologa o loo saunoa le Minisita o Faatoaga ma Faiga Faiva lea ou te tapa ma le agaga faaaloalo lau afioga i le Minisita faauaua mai lau saunoaga.

**Afioga Alaiasa Moefaauouo Malagaitutogiai Sepulona Moananu:** Lau afioga ile fofoga fetalai.

**FOFOGA FETALAI :** malie a lau afioga i le Minisita sei tuu atu le avanoa ile sui mamalu mai nAnoamaa Nu 01.

**Afioga Alaiasa Moefaauouo Malagaitutogiai Sepulona Moananu:** Ia faamalo faafetai i le lea foi ua saoialo le faamalosi tino sa alo iai le paia o le maota mai le paia o lou ofisa. Lea ua faalogologo a male fiafia i le saunoaga i le afioga ile Minisita ma tau ai si o matou itumalo. Ia o lenei la le faiga ai lea na fai nei toatele a sui na fesilisili mai ia te au pe mata e faamaonia ia saunoaga a le afioga i le Minisita o Faatoaga. O lau tali iai ou te manatua a le tali a le isi ulugalii i tua ia matou, faiatu a le toaina e lei uma atu tala ae faimai lona toalua, sao lelei Papa. Ia te au ia o lau a lea tali i le vaega lea, o e fai ni tou talomua ona outou iloa lea ole manaia le mea lea saunoa iai, a o lea sao lelei a o la o le a fau le pa ona lau atu loa le mea lea o le faasao ona alu atu lea o le limu male tulaga uma lea na saunoa. A o le anae lea a le Tuiatua lea na ave ile Faasaleleaga 5 lea ala nai na mumu luma sei ou tala atu le gafa i se isi taimi o muamua ia ma le agaga faaaloalo.

**FOFOGA FETALAI:** Malo faafetai, faafetai foi i lau afioga i sui mamalu mai Anoamaa 1, faafetai o lena ua e faamaonia saunoaga a le Minisita o Faatoaga ma Faiga Faiva i nisi foi o uso o loo taumafai mai aua lo tatou uluai seleselga o le mea lea malo faafetai le faasoa, lau afioga i le Minisita tulai maia faauau saunoaga.

**Susuga Hon LAAULI LEAUTEA POLATAIVAO FOSI:** Faafetai manatu ua malu i fau le taliga o le sua o le autautega aua se faasiligamalosi

aua lenei vaega o le aso. Lufilufi leaga e tele ou pulou, o oe o le Tumua e toa i ai le atunuu ae a tatou o loa i le itu faaleagaga ona e lauga faaaposetolo amuia e le vaai mai ae talitonu mai pea feasoasoani ifo i nai ou uso atonu lava e alualu a lelei faasoai iai le tamaoaiga lenei ua e maua talu le tatou mafutaga faasoai iai le tamaoaiga talu ona e usitaia lelei le miliona tala ma mea o le tatou Nuua ia lea ua see ile maa o malie ma e mapu i Niafane ona o le a? O lou alofa i lou itumalo fai le tatou malologa ua oo atu lau faamatalaga ile aanoa ma le manulauti le au fai faatoaga tasi lava le aua ia lava taumafa i le atunuu lava meaai aano lava mealelei e inai ai pau a lea o le fesoasoani lea ua taumafai le Matagaluega e fai mo le au fai faatoaga o manatua outou o le faletupe lea o le DBS o iina sa fai ma faletupe o le au fai faatoaga ma le au fai faiva peitai e oo mai ile taimi ua fao malo le mea lenei ua tumu i isi pisinisi eseese ae tuu le mafuaaga na alai ai ona fai ii le mea lea o le development bank e particularly i faatoaga ma faiga faiva o tagata e leai ni aseta o tagata lima vaivai o tagata taumafai o tagata pito sili ona mafatia i aso uma peitai lea ou te taumafai nei le aua Ofisa Sili o le Pulega le Minisita o Tupe male Matagaluega e toe ave le 5 miliona lea ua ave lenei etoe amata le mea lea , lenei ua outou vaai ile tele o faafitauli i isi commercial loans la iai o loan na ua o atu uma fao le tupe ae valiano le au fai faatoga ma le au fai faiva ao faafofoga mai le tatou ai fai faatoaga lava mai le onosai lea tau togafiti atu nei le aua e mafai ona sau le tagata 20 afe au kiapula e fua ile isi 4 masina o guarantee lenei a foi o le tatou guarantee e o atu le asiasiga a le development bank sa mafai ona loan ai pasi loan ai loli ae leaga o le mea lenei sa ola ai lo matou aiga mo direct discussion ile va o le fai faatoaga ma le matagaluega ua liliu liliu a ua faacommercial bank le mea ua sau lea tagata fai faatoaga leai se aseta leai ni tulou lava e le oo lona tomai ile mea tau pna iai sau loa lavevea solo atu ii i regulation ua sii le level regulation policy o le bank ao ii a manao nei a le fai faatoaga e uu le 10 afe e uu nei a, a lea ua tatou vaai ile tau o le pusa talo 80 tatou o ile maketi 4 talo \$20 its the best time for the farmers taimi lenei ao le agaga lea molimoli atu ia lava taumafa o le atunuu o le faasiliga la lau aua ile fofoga fetalai o lea alu le faatalanoaga ma se tasi o faletupe e te iloa foi o lea alala iinei nisi e aafia ile faletupe lea samoa national bank o loo tau fai ai se skeem tele lava o loo faaiuu nei e o la iai le au fai faatoaga manaomia loan e leai ni guarantee ile va o le 5 afe ile 10 afe lae faaiuu talanoaga ile taimi lenei e o la iai nai tagata nei pitosili ona manaomia tagata nei o la iai fua o faaeleleaga e fua mai i le isi 4-3 masina a ua le mafai ona faaopopo pe afai na manaomia mai isi tulaga o mea faapena a o faafofoga mai peresitene uma o le tatou asosi le au fai faatoaga Upolu ma Savaii ua uma ona tatou talanoa ae onosai tulituli o lea ua alofa mai le tatou faletupe fesoasoani mo tatou lima vaivai o loo iai foi nisi scale laiti ile va o le 500-5000 mo nai tagata fai fualaaui aina fai fualaaui tauamafa mata ma isi tulaga faapena o tulaga tatou maketi ua ona pasi e le

tatou kapeneta le vaiaso lea na tea atu nei tatou itu tino o le export authority o le tatou matagaluega fou lenei o lea gafa e fesoasoani i le au exporters uma lava e ave a tatou fua o faaeleleaga i fafo , e leo se tamai Matagaluega e tele sa faamoemoe e tuu ai totonu ma le imports ma le exports a ua amata muamua ile mea lea o le exports e lilifa i fua o faaeleleaga ,fualaaaina, ia ona o le mea lea lilifa iai le malosi o le atunuu e mafai ona latou faia , la ua filifili le sitete tausi e faatu ai se vaega e amata ai ona lola le mataupu lea e ave i fafo e iai le tatou fale i Aukilani e le faigamalo ua uma nei la e tutu e lei faia ma se mea tasi iai , o lea la o atu le tatou faigamalo fou tatou fuafuaaga fou ia e fai ma toomaga o le lauina o tatou oloa i fafo ua iai foi nisi o tamalii o le atunuu ua omai tatou atunuu nei faailoa mai foi lo latou plan o le mea na pitosili ona vave ai le atinae a Fiti o le network a Fiti e fesootai lelei le fai faatoaga i Fiti ma le fai pisinisi i Niu Sila poo Ausetalia lea iai le store chain lea tau o le four corner e soo se carry lava a Niu Sila e pule uma e le au Fiti Initia nei ae kogeki sao mai a i Niu Sila poo Ausetalia i Fiti le aga faigofie lena avatu oloa a Fiti e avatu ave sao a luga o fata o faleoloa o Fiti ao tatou ia leai ma nisi ae fesili i Niu Sila atoa poo Ausetalia few , very few ae leai se fesootaiga vava lalata ma le mea la iai tulou ua ou faaoga le suafa o Fiti ona o le latou chain lena o lae pitosili ona vave ai le taavili o le faatauga o oloa o Fiti e le gata i fua o faaeleleaga , o ia , o fualaaaina ma nisi mea meataulima ma nisi products uma o mea tau Fiti faatau mai i latou faleoloa ia ,ua omai la se tasi o alo o le atunuu la ua amata nei le taumafaiga le mea lena friend.....shop lae fai nei i totonu o Niu Sila e tau o le tasi market o le susuga ile faafeagaiga ia Toleafoa ua fitu nei ona faleoloa la ua set up i Niu Sila 7 ana pamu penisini o le faamoemoe ina ia lava a tatou ..... e sell ai tatou products o le buying power la i Niu Sila ma Ausetalia e toatele i tatou tagata latou faatau uma tatou mea ia avatu ao le mea lae tupu e leo lava le tatou sapaalai e e ave ai mea i o a avatu foi ni mea mai i tatou tagata ia iinei e avatu tuu i lalo o fata seiloga e uma ona faatau mea a isi atunuu ona faatoa avifo tatou i luga e uma ane ua leai se lifetime o le products ua pala pe u ua tuai le taimi e faatau ai ao le faamoemoe lena o loo ogatusa lelei ma le tatou faamoemoe lea auina atu ile tatou exports authority ina ia mafai ona oo le oloa ile taimi sao ma oo oloa i lima o tatou tagata e taumafafa uma ai oute taunuu mai 2016 pe nao le 5 container ile masina ou te faamavae ua le va ile 50-30 container taimi lenei o lea faatavale le mea lena ua oo i o le tatou ulu frozen tatou ufi frozen tatou talo frozen tatou manioka frozen tatou taamu frozen ia ma tatou talo felesi , faatoa mai nei e Ausetalia le tatou fresh taro ao le metotia lea ua sao ai tatou oloa i o o le talo faaaisa leaga o le talo faaaisa e ova atu ma le 6 masina o faatau ai le container e umi ona tuu its a message e mafai ai ona umi le life shelf o tatou meatotino o le tulaga ile tatou esetete tausi lena ua ou faiatu o se tasi o faalapotopotoga sa le tataua a ona tuua tataua a ona tatou onosai e faaoga

peitai ua aumai uma e le malo eleele o le esetete tausi ave ile MNRE ma ave ile Samoa Land na fai ai laia ae tiai le esetete tutu ai a i o nao le 7 afe eka la i Mulifanua fai le fesuiaiga ii ma le Airport authority ave le fanua ile ile airport authority ae fesui ai ma le fanua o le esetete ae leai se tupe o le esetete o maua ai ae faafetai ile tatou faigamalo ona o lea faatoa avatu se uluai miliona ma le miliona lona lua le na avatu nei ile paketi sei taumafai ai le esetete tausi se tasi o mea o loo taumafai nei ona o le tulaga o le tou talosaga i fanua e pei ona faiatu o le laasaga lena na oo iai ia fuafuaga a le tatou malo o fanua a le tatou malo e leo toe faaogaina ao loo tuaoi ma Nuu toe tuu atu e fesoasoani o loo faasolo nei talanoaga ma Fuailoloo Mulifanua faasolosolo atu Manono Uta ,Manono Tai ,Apolima-uta , Apolima-tai , Samatau , Siufaga , Falelatai , Lefaga ma Satapuala pau a lea o lau tatalo faafofoga uma tatou Nuu tuaoi ia outou finagalo malilie aua tou te toe laasia tulaga e lei faaiugafonoina iai lava le taimi ou te oo atu ai avatu la outou sui faipule tatou talanoa lelei ile mea e toe faamatuu atu mo otou ae faavagavaga le ogaeeleeele sei toe tau fai tulaga o tatou faatoaga e ala ile tatou faagaosi mea ma nai mea ia tau faatulaga atu nei e maua ai se tupe o le tatou esetete tausi , tatou SROS e le toe tele se upu ua uma foi ona outou faafofoga ile tele ma anoanoai o mea uma o loo faatulaga i lenei foi atinae tele o le tatou malo avatu foi le agaga faafetai ile Ofisa Sili o le Pulega le afaigaluega ia ma outou uma o loo galulue tamaitai alo ma fanau o le atunuu o loo ia outou le tomai e faapitoa suesuega faasaaienisi mafuaaga lena ana ave ai outou tou te aoga tou te omai e fai ni mea mo le atunuu ave iai lo outou fai mea lelei ave iai lo outou malosi tou te o e suesue mea eseese uma aua le manuia o lenei foi faalapotopotoga o le atunuu. Momoli le agaha faafetai i lau Matagaluega Faatoaga ma Faigafaiva ile susuga ile Ofisa Silil o le Pulega ia Tilafono David Hunters na ou manatu o lea ua faaali mai lana faamavaega ile totonu o le Matagaluega ae ave lenei itula e momoli ai le faafetai i lea foi tamalii o le atunuu ma ona faiva alofilima tautua oo tautua ile Matagaluega ile tele o tausaga Tilafono mai le taele o le agaga o au nei o le Minsita ma le Minisita Lagolago ona o tulaga mataupu faaleaiga ua motusia ai le tatou mafutaga ae silafia e le Atua lau tautua sa fai mo le tatou Matagaluega nei taimi e tele taimi na ou uluai Minisita ai na ou sau ai piki oe e tate galulue ao lea ua ou toe taunuu mai ao lea olea e alu ui i lea faamanuia le Atua i fuafuaga uma o le a gafa ma oe le uso oa fuafuaga o nei ma le lumanai ia oe ma lou aiga momoli le agaga faafetai i galuega uma sa feagai ma oe male Matagaluega e le faagaloina foi se tasi o tamalii le atunuu ia Magele sa matou faigaluega i le tulaga o Faiga Fagota ona o tulaga lava i faaiuga a le PSC e le au lava le pule ao ile pule po ae sa naunau pea ile tulaga e tatau ai ona nei tulaga fetuunai ai tulaga masani ui i lea e le uma le faiaso o le Alii ma e le uma le fai avanoa o le Atua ae momoli foi le agaga faafetai ma le agaga faamalo ona o lau tautua foi ile Matagaluega e le uma le faiaso se

taimi foi tatou toe feiloai ae silafia e le Atua la outou galuega sa fai faapea le Ofisa Sili o le Pulega , faapea foi le pule o le tatou polokalame o le SAFPROM, ..... e momoli atu le faafetai ai te oe ona lea foi ua faailoa mai fuafuaaga mo oe ma le lumanai o mea le maalofia momoli atu foi le agaga faafetai tele lava tulaga o laasaga ma fuafuaga mo le lumanai we wish you the very best ae aua le popole e one tagata le tatou Matagaluega soo le fau ma le fau iai nisi ua e silafia e sosoo ai le galuega o le tatou SAFPROM se tasi foi o Matagaluega sili i totonu o le tatou Matagaluega ao outou manuia na isi Ofisa Sili o le Pulega uma tatou Matagaluega uma i Savaii Upolu malo faafetai i lo outou galulue malu ma upu ma le Minisita lagolago na o la outou lagolago ile tatou galuega e le faigofie leaga o tatou lea feagai ma le atunuu na foi tou te silafia e ala ona le ofi lo'u ofisa o le tau faamalieina o atu male omai lava la outou onosai se taimi 'foi e sii ai lou leo ia o upu a ia faasao o le aiga ma upu faatama e avatu pea ia te outou ina ia outou lagona e leai se isi Matagaluega o loo feulufai ai le atunuu o le Matagaluega o Faatoaga ma Faiga Faiva na ou taunuu mai lea lau afioga nai mea laiti lea leaga o lea faatoa afio mai le afioga ile Minisita o Fesootaiga Toelupe faafetai o lea ua toe taunuu mai ae sa ou taputapu ai ma tapuaia le tatou Matagaluega tasi a si mea na ona tuu atu i ou tafatafa sa ou valaauina le Ofisa Sili o le Vodafone o le Ofisa Sili o e Digicel e omai sei faimai se tali ua matuai lau email ma tagata vilil atu ile faitioga o le network ua ou fesiligia ai poo lea le mea lea tupu lea foi ua e faafofoga i saunoaga a sui e lei faia ni galuega ae matua ova le taugata o le pili lea foi ua e silasila e oo foi ile potu o le kapeneta se o lo ta ma nei mea potu o le kapeneta a ua outou vaai iai le network na ua outou silafia outou o Minisita o le kapeneta o le potu sili lea na numera tasi e tataua ona masau poo le saosaoa o le light le mea ao le tatou mea tate fiu e faatalitali ae na ona avatu faapena lau afioga ina nei omai ni kamupani e taaalo iinei ia tatou a iai ni tulaga faapea o loo avanoa pea nisi network e omai e service le atunuu ini tulaga lelei ma faasagatonu ma faamaoni mo le kilivaina o le mataupu lea a tuu faapea e fai la matou feiloaiga ma le regulator ae laga o lea ua e taunuu mai ae lafo atu afai e iai ni tulaga e unsatisfactory ai le service na iina le tofa i lau afioga na ona ou tuitui malofie ao lau vaai o au ile masina e le lalo ifo ile afe lau pili e totogi ile internet ma lau telefoni its one of the most expensive network ever ile atunuu ma le pasefika ae tatou o ile ... 50 tala amerika ile masina unlimited ao lea le mea le iai tatou e le afaina la le taugata oa le mea lea e le work lelei i Savaii ma meauma na ona faapena atu ou te le soona faia se tala lau afioga ile Minisita leaga o lea sa ou nofonofo ma tapuai are tuu atu i ou tafatafa e te silasila lelei iai pei a ua taalo le toalua lea ma lou agaga faaaloalo , lau afioga ile minisita o tupe o le komiti o le miliona le paia e o lona itu o le maota ua uma ona fai tatou lets move forward tatou agai luma lea ua saunoa atu le minisita o tupe a e alofa i lou itumalo lagolago le tatou poloketi 5 tausaga 5 miliona mo oe ma

lou itumalo e atinae ai lou itumalo never happen before ua lava ia taimi ao le tatou fonono lenei ou te tautino atu lava ua lava taimi nei sa tatou feuuuui ai lau mai lau atu lea le taimi lenei tatou o e fusi le fau o malo lea ua uma ona faamanuia ile amomua a le Tuiatua na ma malaga male amomua a le Tuiatua si ma malaga na ma o faatasi o lea uma le fofoga fetalai ae sui palemia o ma upu nei na fai ou tele manao e tuu i lalo le mea lea na ou faamanuia ile tulai mai o le afioga tofa le aumua o le Tuiatua pei ona faiatu Fonotoe i will suport you 100% a o ta iai faatasi iina ona o lou talitonuga o tofiga o mea mai ile Atua fai ai iai ia e talitonu i lou valaauina o lea ua e sui taitai ma e sui palemia talitonu leai ma se mea e tasi e ela ile finagalo ole Atua e leai se mea e tau o le sui taitai le taitai aua foi o le sikepu lena la ua e vaai ile alofa o le Atua mo moe uso, saunia e le Atua lou taimi and you have to be leave in it lau faamanuiaga o lea foi ou te iloa e fai soo lua tala ma Olo e te lua fiu e lalafi ma Olo oute iloa a le fai lua tala ma Olo lea foi ua faamanuia atu le tama matua ia Tea.

**Tofa Hon LAUOFO FONOTOE NUA FESILI PIERRE LAUOFO:**  
Lau afioga ile fofoga fetalai.

**FOFOGA FETALAI:** Se i tuu atu le avanoa ile taitai.

**Tofa Hon LAUOFO FONOTOE NUA FESILI PIERRE LAUOFO:**  
faafetai nofonono lenei foi tauaofiaga pei ma te nofonono atu ii ae tofi mai matou i o , ua ou tulai faamanatu atu lau afioga ile Minsita sao lelei le ta malaga sa ta feiloai ai iel atunuu i Saina ae ou te fia faamanatu atu sa tatou o faatasi ma Peseta , lea la ou te fia fesili atu pe sa e faamanuia foi ia Peseta aua na tatou foi mai loa fai loa ma lua faamasinoga .

**FOFOGA FETALAI:** ia sei tulai mai lau afioga ile Minisita.

**Susuga Hon LAAULI LEUATEA POLATAIVAO FOSI:** its a long story ae na o oe na ou faamanuia iai na ou iloa le taunuuga o mea nei a foi faigofie lau malaga e lei faigofie ae ua e vaai ile tali a le Atua poo a fenuiaiga ma fesuaiga e fai e le tagata tapena e le Atua le taeao a lea aua foi nei tenaia i lou finagalo faapea e te le amanaia tala ma upu ia avatu leaga ua tatau o ai se isi sili ua talafeagai lelei ma oe leaga o le faalogologo le Atua ia matou upu ma tala pai a lea lau augani lau afioga ile sui taitai tausii lo tatou va nonofo fautua ane i lena itu ua lava lea lau afioga ile amomua ale Tuiatua ua lava lea lea foi ua e faafofoga mau lea foi e ave le tualalo ile au lagolago uma a lenei vaega aua a la ona tali atu o le sau oea iina a na iina le tofa ma le faautaga i lau afioga se taeao fou tatou faafilemu le atunuu ile mea lea alu luga facebook folo a le oona o upu e gata ai upu ua oo a lota ola ua pule tagata i lota ola lae silasila mai le mea lea fai lea a



folo le oona upu e lafo ile tamaitai palemia o au nei ma kapeneta ma le faigamalo a lea olo a le fua alofa ia Samoa aua nei toe laga se maa pe manunu se mea lea foi faafofoga mai lenei aiga ile FAST tatou maua le agaga o le loto faamagalo male onosai tatou anava masani lototetele tatou onosai pea a lea faali mai a le Atua le auala , lea ale auala ? 800 miliona le foreign exchange reserve , 4.7% o le siitia o le tamaoaiga aluese aitalafu mai le 1.2 ile 900 miliona o le tali lena mai le Atua galulue punouai ma onosai pea lea ua outou faafofoga mai lea ua ave lau faamalosi ile la itu o le malu ua lava ii a faafofoga mai foi le lalolagi atoa le au lagolago uma FAST ia outou alofagia tatalo ina ia tatou susue se laupepa fou ma se moemoe fou ina ia filemu Samoa momoli le agaga faafetai mulimuli tapuaiga a si ou Minisita Lagolago ia Maiava malo faafetai ia e sauni ma lou passport nao lou malaga a lau mea lea la fai alu take uma ta fonotaga ma mea ia i have to stay home ma fesoasoani ile kapeneta leaga e leo iinei le afioga ile tamaitai palemia o uso pele ia Ale ma Tuuu ma Mauu o le upu a le pese a le EFKS e le tutupu fua mea faapena o lau faamalosi sa matou nonofo foi iina ma Olo ma Leatinuu male afioga ile sao faapito ile ala lava lea ile manuia le ala lea ua outou malaga ai pau a lea ia outou o male Atua ma lo outou talitonu o loo o outou finau ile mea e manuia ai outou ma outou itumalo aua tou te amanaia fua upu a Sula faapena a upu a uso e faamalosiau ae a maua le avanoa toso iai le maea pea faapea e manaomia se fesoasoani mulimuli aua tou te tuulafoaina ao le agaga lau tofa le igoa Matua fetalaiga foi ia Tuuu ma Mauu ou te tapuaia a outou faiva ina ia manuia la outou aiatatau e fetuunai ai nai tulafono na lape ai foi le taimi na ou taimi o muamua ia ma ia maua lo outou malosi aua le faafoefoeina o meauma ua finagalo ai lo tatou itumalo faaiu mai sau tala i lenei aiga ile FAST faamalo le onosai tatou le faatasi male tatou taitai ae o loo afio le afioga ile sui palemia faamalo lo outou onosai faamalo lo outu faapalepale faamalo lo outou usufono faamalo lo outou lagolago i meauma lava o loo tatou taumafai ai o le faatuatuaga o Samoa aumai tatou te tauave ai le atunuu aua nei galo tate lei faanonoi i se pule tatou faanonoi ia Samoa e aumai le faatuatuaga o le faatuatuaga lea aua nei tatou vale tuulima poo lea le fesouaina o le olaga lenei o upu ma tala o meauma o loo tatou folau ai tatou folau male faatuatua ua aumai le faatuatuaga a Samoa ia tatou ia faaiu sau tala lou itumalo pele Aiga Sa Tupua ma Aiga Sa Malietoa Aiga o Mavaega Tuua Falelima o Sa na eseese i ou tama ma tama faaleagaga i soo se itu taulagi tatou itumalo aua le afio o outou sao aemaise faleupolu o tofiga e momoli atu le agaga faaftai tele ona la outou faaaloalo lau outou pule ma la outou faatuatuaga o lea ua lagona ai lou leo i tiafau o le malae e le soona taele tapisipisi ai se isi o le malae na saili ai le lauga a Samoa na ai le tupu pea maua lona nofoaga o le Tia na fafau le taga mamanu a Samoa ae faafetai la outou faaaloalo o loo maua lou malosi ne tauave ai lo tatou itumalo onosai , tulaga foi i tatou atinae ia ua tele foi le vavao o le

tatou fale komiti ma tatou atinae ae onosai o le mea sao lava tatou te maua ai le filemu ia lea foi ua tapisa i tatou masini onosai, i tulaga o le va faafeagai ai e sau a taeao malama .

**FOFOGA FETALAI :** ia malie lau afioga ile Minisita , o lea ua fou male sa o faleata Nu 04.

**Tofa Ale Vena Ale:** Faafetai lau afioga ile fofoga fetalai mole avanoa ua ou tulai atu ma le faaaloalo tele lea faalavelaveina le saunoaga matagofie le afioga ile alii Minisita o Faatoaga aepetai ua lagona foi le faatauvaa ile pai mai ole saunoaga faamafanafana a le afioga ile Minisita, o lea a saunoa mai le minisita e faamanuia mai ia matou ae lea faimai le au alii ma Sula ma Leaana e sauni e toe fai matou palota ia Leaana ma le au alii ia toatolu ao lou tulai atu lau afioga ile minisita o Faatoaga Laauli faafetai tele i au faamanuiaga faafetai matou te loto tetele ma matou te le o foi e masalosalo i le tulaga ua matou iai ile taimi ma e iai a la matou talitonuga o lo o sisila fofoga alofa o le Atua, i le tulaga o le matou faamoemoe. E pei lava ona ou tautala atu i totonu o le Palemene i le Tulafono lea, ae ui i lea, o lea ua i luga o...ae faafetai i lau afioga Fonotoe, lau tofa i le amomua a le Tuiatua, lau tofa Lauofo, faafetai tele i au faamanuiaga, faafetai foi i lau saunoaga foi ma ua uma ona ta talanoa ma ua e saunoa mai o oe o le loia, e manuia le matou faamoemoe. Aua o oe o le loia e te interpreting ina ia mea i o le court. Manuia tele le fonousu a Samoa faafetai.

**Tofa Hon Lauofo Fonotoe Nuafesili Pierre Lauofo:** Lau afioga i le Fofoga Fetalai, ina ia silafia ma ia nofo malamalama foi le Maota, e sao na ma talanoa, ae le o sau fautuaga lea na mafua ai ona faamavae, e le o sau fautuaga o le tulafono. E pau lava le mea lea e manino, e tatau lava ona toe fai palota, ia malilie ia, ou te le o iloa po o le a le mea lea e saga nonofo mai ai sui ia i totonu o le Maota, ua tatau ona o e tapena ia le palota. Ae ou te iloa lava lua te manuia ia oulua palota.

**Tofa Ale Vena Ale:** Lau afioga i le Fofoga Fetalai, sina minute lava e tasi faamolemole...e leai ou te le o fai atu i se isi itu, e sao na ma talanoa, a o lana tuualalo mai ia te au, o la e silafia lelei le tulafono ma e manuia le...ma ou te fia peki atu i se isi o outou ia e i i, i le faamasinoga lea e malo le case lenei, manuia le fonu.

**FOFOGA FETALAI:** Vaimauga Nu 1.

**Afioga Sulamanaia Fetaiai Tauiiili Tuivasa:** E momoli le agaga faafetai i lenei foi aso ma le usugafono a le paia o lenei Maota. E matau lava ma le totoa e lenei sui usufono le faauuga ia outou afioga i Minisita i

lauga. E amata mai lava i le Minisita o le Siosiomaga e alu atua i lava lea, ua malele foi ma saunoa le Afioga i le Minisita o Faatoaga, a mea o le auga lena o le faamoemoe. E tatou te galulue faatasi, ae...ona o lea ua afea lenei itumalo e nai sui ia, e pei e i ai le agaga foi lea, ana faapea o se musumusuga mai le Agaga o le Atua e faamavae, e le feei ma toe talanoa i le Atua. Ae ua fai lava le latou faaiuga ae le i fesili i le Atua. Ia Laauli, faafetai mo le saunoaga matagofie ua opea i le Maota. Olo o outou o Minisita, e lagona lava le faagaetia. Ae o lou tulai e leai se mea o gase i lenei itu. E pei o lea e fai mai matou te o atu, ua leva ona matou fia o atu, ma o lea lava tatou te i ai lava. Ae ona o lena itu lea e ...a o lenei taeao ma le faalogologo ma le totoa i saunoaga a Minisita o lenei Maota, e lagona lava le agaga faafetai, e leai lava se mea o gase i lenei aso, malo malo malele, e lagona lava i tino matagi lelei, le i ai o le Agaga o le Atua, Laauli malo saunoa, ou te masalo o oe lava lea e faamoemoe i ai lo tatou itumalo, i le tatou miliona faamolemole. Se i e alofa ifo o lena e te i ai i ina o oe o le Minisita Sinia ia e alofa mai, i le ta itumalo. Lau afioga i le Fofoga Fetalai e pau lena o le matou tala. Nai ou uso ia manuia le faamoemoe o le a alo atu i ai. O le matou agaga lena ma le faafetai lau afioga i le Fofoga Fetalai.

**FOFOGA FETALAI:** Se i tulai mai le sui usufono o le Vaa o Fonoti.

**Tofa Mauu Siaosi Puepuemai:** Ou te manatu foi o lea ua faafogafoga foi le Maota, matagofie foi ia saunoaga foi aemaise o le tofa femolita. O le ala o le tulai atu lau afioga i le Fofoga Fetalai, ia ona o lea sa saunoa lou uso a faipule o Vaimauga, ana faapea matou te mafuta i le Atua matou te le feei. E iloa le upu foi lele, o le ua fiafia ina pese ia ma le leotele. O lea la sa pese ai le tofa i le igoa matua ia Ale. Ae o le faaiuga lava o matou, sa matou tatalo i le Atua, ao ma le po, ona aumai lea o le tali, musumusuina i matou. Ona ou toe fesili lea ia Sula, ae fai mai Sula, Mauu ua matua sao lava la outou mea lena ua fai. Ma le agaga faaaloalo. Manuia le fonu.

**FOFOGA FETALAI:** Tulai mai lau afioga i le Minisita.

**Susuga Hon LAAULI LEUATEA POLATAIVAO FOSI:** O lea ua sooula le fala e tusa foi o faamanuiaga. Ale, Mauu ma Tuuu, o lea ua ou fai atu, e tapena e le Atua le avanoa ma le auala. Afai e le tau lau o le faamasinoga, tatou fai i le palota, aua ne i o tatou o masalosalo. O le auala e faafoliga e faigata e tapena e le Atua, leaga o lea na fai la outou faaiuga mai le fatu, its not by the mind, by the heart. O lau tuualalo na avatu, safe yourself first, the constituency the authority na aumaia outou. Aua ne i outou taumulimuli i le ala, a lea ua faamanuia atu Sula ma le vaega, o tala faauso. Ae aua ne i galo, e i ai le soo o Iesu e tau o Toma, seiloga e pai

faatoa talitonu. O le toatolu lea e i luma o Toma uma lava ia. Seiloga e faapea mai le Alii Faaola, tuu mai le lima i le manua ona faatoa talitonu lea.

E faaiu sau...e faafetai i lou itumalo pele, le tapuaiga a outou o le tatou nuu, tupu ma ee tamalii ma failauga faletua ma tausī. Ave pea lou ola ia aoga e tautua lo tatou itumalo, pule outou e le fai mo au le Maota lenei. E sau foi le taeao e afu ai lau tautua ma i, a o lo o ou tapena pea mo le e mulimuli mai, ou te le iloa po o ai, ae ou te tapena mo le e mulimuli mai, ina ia alu pea le atinaeina o lo tatou itumalo. Ae pule i ina, o lēna e i ina le tofa ma le faautautaga. A o la outou tatalo ma la outou tapuaiga, e ui ina afatia la tatou malaga, tapena pea e le Atua vaimalu i puega e asuasū mai i lou gutu i taimi uma, e maua ai le lototele, lotomauualalo ma le agaga o le talitonu i le Atua.

Si ou toalua pele ma si au fanau, mom silafia e le Atua mea uma i lou loto i lou alofa faamaoni ia te au ma le tautuaina o le ta tofi mai le Atua. Lau fanau ia outou onosai, folo mea na tou te vaai i ai, inu i ai, inu i mea uma na tou te vaai i ai. Tou te talitonu a ou le inu, tou te inu. Ae ave o tatou aoga mo le atunuu ma le Atua, that was papa's desire, ia outou talitonu. E avatu lau faamanuiaga ma lau faafetai tele mo galuega uma, o e o e toto tatou koko ma fai ma popo ma vaai le tatou povi e tasi lēna faatoa fanau, tausī faalelei ma vaai mea uma mo le aso. Ma o e aoga ina ia popoto, o lea e lau lau solo au, ou te le iloa ona fai se mea. O le alofa o le Atua ma le tamaoiga o le Atua e foi mai le atamai i le tagata. O le potō ma le atamai o le mea a le Atua, doesn't have to be in paper or in special qualification to be written, e tuu mai e le Atua le fesoasoani, ona o le a? O le ala i le pule o le tautua.

Ia foi mai sau tala i lenei itula afiafi lau afioga i le Fofoga Fetalai, ma le mamalu o le Palemene o sau upu ua paopapa, ia lafo ifo i fogavaa tele. A o le faamoemoe i lenei afiafi, faafofogaaga a lo tatou atunuu le faafofoga tapuai mai foi a o tatou aiga, paolo ma gafa i atunuu mamao ma Samoa o lo o taape i le lalolagi atoa, e silafia e le Atua la outou tautua i lo tatou atunuu. Ae ia manuteleina lenei afiafia ma le pasiaina o le tatou Tala o le tupe. Faa-soifua ia ma ia manuia.

**FOFOGA FETALAI:** Se i tulai mai le Minisita o le Soifua Maloloina.

**Afioga Hon Valasi Luapitofanua Togamaga Tafito Selesele:** E leai lau afioga i le Fofoga Fetalai, e ese le ...e tau maligi loimata i le lauga faamomoloto. E na ona ou tulai atu ona ua uma le lauga a le Minisita, ae ou te faamanuia i lana povi na ou avatu i ai. O lea ua ou maua le tala, ua fanau le povi. Laauli, o le povi lēna e talatala pea lona gafa ma maua ai au povi. Faafetai mo tiapula, e pau lava le mea e le o fetauī le tau o tiapula ma le povi. Ia manuia, faafetai lauga.

**FOFOGA FETALAI:** Ua faamalo saunoa i le afioga i le Minisita o Faatoaga ma Faiga Faiva. Ua manino le Maota i le tofa aemaise foi lou soifua tautua ma lou soifua auauana i lo tatou Malo, o lo o atagia ai foi le tulaga o le alofa i le atunuu ma taumafaiga o lo o taumafai nei i ai. O le mea lea e le tau selu atu, leaga e tele ou pulou, a pau foi i le itu faale-agaga leaga o oe o le aoao sinia ua lava foi lou silafia, ma tulaga uma o le tautua, malo faafetai. E talitonu o lea ua faamalieina le faafofogaaga a le maota i nisi foi o mataupu sa laga, atonu ua oooo uma i ai le saunoaga ia faatasi ai ma le faalaeiau ma le faaloto tele aua lava le agai i luma o le tatou atunuu, o le mea lea malo faafetai. Ia maua pea le malosi ma le soifua aua le tautua ma le auaunaga, e le gata i le Matagaluega a lo tatou Malo a o le atunuu atoa, ma le galuega a le Atua. ia faamanuia foi i lau Matagaluega o Faatoaga ma Faiga Faiva, o le faamoemoe lea o le atunuu i le lumanai, o tatou faatoaga, aua le lumanai o Samoa.

O lea ua tatou oo mai i le siui o le Sui Palemia, o ia lea o lo o faatautaia foi le Kapeneta i lenei vaitaimi, ia ou te talitonu lava, o lea ua tele ina folasia e le Kapeneta, ae lafo atu ia i lau afioga e sum up mai le tatou Kapeneta ma mea uma ona faagasolo lea o le tatou Tala Faaopoopo o le Tupe.

Lau afioga i le Sui Palemia....

**Afioga Hon TUALA TEVAGA IOSEFO PONIFASIO:** E faafetai i lau afioga i le Fofoga Fetalai. E muamua pea ona toe sii le faafetai i le Atua i lenei itula o le aso. O lea ua tele nai aso o folau mai pea le fonu o le tatou Palemene. E lagona lava le faatasi mai o le Agaga o le Agaga Paia aua le lauliliuina o le tofa a le faautaga. E talitonu ua ula le aso, aua foi le fesilafaiga mamalu a lo tatou Palemene saunoaga aemaise o tulaga faatamalii uma ua oo i ai le tatou Palemene i le aso. E lagona lava e le tino le mafanafana, e lagona foi le filemu, e lagona foi le fiafia. E momoli atu ai le agaga faafetai i lau afioga i le Fofoga Fetalai, aemaise foi ia le tatou Palemene, aemaise foi o le Kapeneta sa faapea ona sausaunoa i le aso.

E manatu o le a mamalu pea ia le aitu i le aoa lau afioga i le Fofoga Fetalai, aemaise foi o le tapuaiga i Le Ao Mamalu o le Malo, le afioga ia Tuimalealiifano Vaaletoa Sualauvi II ma lau Masiofo. Afio lau afioga i le Sui o le Fonu o Sui Tofia ma lou faletua. Le tapuaiga a le Tamaitai Palemia o Samoa, e ui lava ua tatou le faatasi, ae tapuaia atu lava e le usugafono ma le Palemene le tulaga o lo o toesea ai lau afioga.

Eetai ia le paia ma papaaao le mamalu i susuga a faafeagaiga taulagi i so o se Fatafaitaulaga e fia, o lo o faafale le malu ai i so o se tafa o Samoa aemaise lenei lalolagi atoa. Le afio o le mamalu i Minisita o le Kapeneta, afioga i Minisita Lagolago. Afio lau afioga i le Sui Taitai o lena Itu, aemaise foi le mamalu o sui usufono uma o Samoa. Afio le afioga i le Faamasino sili, susu Alii ma Tamaitai faamasino o le Faamasinoga

maualuga. E a lau afioga i le Peresetene o le Faamasinoga o Fanua ma Suafa ma le Ofisa o Faamasinoga. O le mamalu o le Ofisa o le Fono, o e o lo o vae ma lima i ai galuega faatino i aso uma, o le tatou ofisa o le Fonousu a le Malo o Samoa, faafetai. Ae susu le mamalu o Ofisa Sili o Pulega o Matagaluega a le Malo, le aufaipisinisi faapea le mamalu o Faauluuluga o Ofisa Tumaoti a lo tatou Malo o Samoa.

E fia faatalofa atu i si ou itumalo o Gagaemauga 1. Le matua ia oe Saleaula aua le afifio o alii e lua. Tautaiolefue ma Tauiliili. Afifio maopu o Fepuleai ma Toiaivao, alalatai lou mamalu Saleaula, nofofale Tufuga ma lou faatufugaga. O oe o le pule, o le Tufuga ita, po o le Tufuga toatamai, o oe o le Tufuga alofa,

Le afioaga o Lealatele le nuu o Samalaeulu Mauga faapea ma Patamea, ma le nuu o Tuala ma Sala ma le nuu o tama suafa. Tulouna Lealatele aua le afio o le aiga sa Tuala, afio le faalagilagi ia Tuala lau afioga i le Saoalii, o le tootoo o le filemu ma lou falesefulu. Afio le sao fetalai, lau afioga Sala ma le aiga sa Sala ma lou Falevalu. Ae alalatai le mamalu ma lo la toalua Tevaga ma Vaifale ma lo la faleupolu ma Samuliaga.

I le afioga o Patamea i le afio o Aiga i le soo malo ia Lauano ma le aiga Sa :Lauano. Taofia o alii suafa o Ae Toleafoa ma Salima, le mamalu o le toafa i nofo ituaiga le tofi i le Tofi i le Tuua ma le mamalu o le Faleaana. O paia ia o si ou itumalo. ae o paia silisili o paia faale-ekalesia i aulotu taitasi i totonu o si ou itumalo. I le susu i faafeagaiga faifeau toeaina ia Palemia, faapea faifeau ma faafeagaiga uma i totonu o le matou itumalo, e tainane le afio o le Afioga ia Patele.

E momoli atu alofaaga i si ou itumalo, e amata mai e matutua seia oo lava i e iti, tapuai maia.

Ua faapoopo ae ua ni aso ua, a ua le tuua foi ni aso folau. E ui ina tatou i ai i vaitaimi tetele o timuga ma lagilagia o le tau. Ae o lo o sosolo malie pea le sa o Samoa, a o tatou tapena folau foi i galuega o lenei tausaga. O lea ua faataumuliai nei le tele o faafitauli ma faafatiamai sa tatou feagai ai, ae ua faataumuaava atu nei lo tatou sa, i le tau faamaeaina o nisi o galuega o le fono, aemaise foi le faamautuina ma le pasiaina o le Tala Faatatau Faaopoopo o le Tupe 2022/2023 faapea foi ma nisi o Tulafono o le Maota e pei ona tatou i ai nei.

Tatou laga laia o le vaa o manu ae faafao le vaa o mala. Aua ua to i tua Apolima, ua tino lo outou soifua laulelei. Papae ia i paga tia o le tautiaga, e faigata oe Samoa o le ao mamala. O ou paia faale-Talalelei ma ou paia faale-Malo ma paia faale-atunuu, o le a ou le toe oo i ai, aua e taoto a o se alaoo. E leai se tautai e toe fagota sagolegole i ai, aua o Samoa o le atunuu tofi, o le laau foi ua maea tofi tofa.

Ae o le a fagatonu ia le malama ma vili tonu le ifi a Maina e tusa ai ma nisi o saunoga a le mamalu o sui usufono o le Maota nei, e fia faalauaitelaina ma toe fiapupulaina i se motugaafa a si ou nei sui usufono.

Ua maea ona ou fofola nisi o vaega e uiga i mataupu nei, sa saunoa i ai le Maota, aemaise o mataupu e faatatau i le aufaigaluega a le Malo. Sa faapea mai, e tau lava ona faapupula atu, e na ona otooto atu, ae sa faapena ona ou talanoa atu ai i lo outou paia i se taimi ua mavae, ae ao pea ona ou toe faapupula.

I nisi foi o saunoaga ma faafesili ma tuualalo ua tuuina mai, e i ai le mataupu lea i se siitaga i le aufaigaluega o le Malo.

Na saunoa foi nisi o sui usufono, ua taofi le faafaigaluegaina o tagata ua le tutumuina avanoa, leai ni alauni ovataimi ponesi, leai ni malaga, valiano i latou ua iu mai ma faailoga ua le maua ni avanoa. O nisi foi ua maua i le anxiety po o ua faaosofia foi le tulaga o le le toa ma le popole, pe a tulai mai ni tulaga o le le mautonu i tulaga i galuega. O nisi foi sa saunoa a le lava tagata faigaluega o le a maua foi e o lo o tauavaeina i le overload pe o le a mamafa le avega. Sa tuuina mai foi saunoaga i le tulaga o sikolasipi, faafetai o le isi lea mea taua, e pei ona saunoaina i le tulaga o sikolasipi.

Lau afioga i le Fofoga Fetalai, ua maea ona ou talanoa atu i le tele o vaega ia, ua maea foi ona faamalamalama ma tali atu foi i nisi o saunoaga e pei ona tuuina mai. Aepeitai ina ua ou taua le review e pei o i ina sa foliga mai ua tau maua ai le toa o le Maota, O le toatele foi o nisi sui ua toe saunoa mai ma ioeina le tulaga lea. Ae manatu e i ai lava nisi o lo o fesiligia pea le tulaga o le iloiloga lea o lo o faatino e le Malo i le PSC, e ao pea ona avatu pea se otootoga o nisi o vaega mo le faalauteleina foi o le silafia.

Ou te fia talanoa la i le review lau afioga. O le review o le toe iloiloga lea o tulaga o lo o faafaigaluega ai nei tagata faigaluega a le Malo i avanoa principal ona sau ai le i le senior officer ma alu ifo ai i lalo i le officer level, e le o aofia ai ia Ofisa Sili o Pulega ma sui Ofisa sili Lagolago i le iloiloga lea, ona o i latou o lo o faakonekarate e pei ona silafia. O le faataotoga mai o le taiala o le lumanai manuia o Samoa e pei ona saunoa ai foi le Minisita o tupe, o lo o faamuamua mai ai e le Malo ia a latou strategic outcomes o lo o faapea mai, faaleleia le atinaega o le soifuaga lautele. O lo o vaevae foi nei vaega o lo o ave i ai le faamuamua. O le isi vaega o lo o ave ai le faamuamua e faapea, faaauepegaina o tagata mo avanoa i le soifuaga manuia, people development. O le isi vaega o lo o ave i ai le faamuamua, tulaga maualuga o tomai ma agavaa o tagata faigaluega, a skill work force.

O vaega ia o lo o i ai le manaoga e tataui nei loa ona minoi. O le PSC ona faatino le iloiloga, ma faataoto mai loa se fuafuaga mo le aufaigaluega a le Malo o Samoa mo le isi sefulu tausaga ina ia tino mai se tatou National Workforce Plan, o le aim lea. E mo le silafia o le taimi mulimuli, na i ai se fuafuaga faapea o le tausaga e 1992 agai i le 2007, e tusa ma le sefuluono tausaga e le o i ai se tatou National Workforce Plan. O lo o vaavaai foi le iloiloga i le aufaigaluega, Faalapotopotoga Tumaoti a le Malo ma pisinisi

Tumaoti ae o lo o faamuamua le Matagaluega ma le aufaigaluega a le malo.

O lenei iloiloga o lo o agai tonu lava i tagata faigaluega a le Malo, e aafia lea i le level o le principal agai i le senior officers ma officers. O le level lea o lo o aafia ai le valusefulu pasene o tagata faigaluega a le Malo. I le 2009 i le 2003 e tus ma le fa o tausaga ma faamauiina ai le vave ona siitia o tagata faigaluega i le malo i le 11.2 pasene. O le aofaiga o tagata faaopoopo i se fuainumera e tusa lea ma le ivaselau i totonu o le fa tausaga na tea nei. ma e tusa i se vaega faatusatusa o se tupe e limasefulu valu miliona le tupe ua alu ai. O nei siitaga e le o ni siitaga na fuafuaina, was an unplanned increase. O le manatu foi lele i le eseese o Matagaluega, a lelei lava le CEO i le uunaiga ia maua tagata faigaluega o lana ia Matagaluega, ua faapena lava ona siisii le fuainumera, o lo o i ai pea isi Matagaluega, o lo o tumau lava le le faaopoopo o tagata faigaluega.

Lau afioga i le Fofoga Fetalai, e i ai le upu a le atunuu e faapea e sama se mago, tautai se potu ae saili i le tai se agavaa. Ae o le upu foi a le Atua ia Kitiona, i le taimi o tau Kitiona ma le nuu lea o Mitiana, fai mai le Atua, Kitiona, se ua toatele naua le nuu. Ae ave le vai e faafeinu, ona vaai lea o le vaega lena e inu fao, e toe faafoi, ae piki na o tagata na e inu etoeto o tagata tonu na o le taua. O le tagata inu etoeto o le tagata mataala lena, e inu ma vaavaai i pito po o fea e oso mai ai le fili. O le tagata foi lena ua i ai lona loto i lona faiva ma faataua lona tiute ua tofi ai.

O le isi lea itu taua o le toe iloiloga o lo o fai nei, ua manaomia e lo tatou Malo le toe faatulaga ma tapena lelei le aufaigaluega a lo tatou Malo, e feagai ma luitau o lenei vaitau. E latou te tauaveina galuega faatino a le Malo, mo le agai atu mo le lumanai. E le aoga le toatele ae manaia le toaititi ae maini. Ia maua se aufaigaluega e efficient e effective and productive. O lona uiga e galulue ina ia aua ne i faamaumau se taimi. Ia maea galuega ua faatulagaina i lea aso ma lea aso.

E masani le atunuu lea o Spain e i ai le latou gagana na e fai soo lava, maniana, maniana, o le uiga o lena upu, taeao, taeao. E te fai atu loa e fai se mea fai mai taeao, a o lea e te manao e fai nei. E pei o le upu lea e fai soo e tatou o taeao le isi aso, e fai aso le Alii. O le mea la e tulai mai, e le mafai ona efficient, e le mafai ona faamaeaea galuega i le tulaga o le alualu i luma. O le tulaga la ina ia tulai mai, o le upu lea o le productive, o i e fua mai ai galuega pe a faapea e mafai ona tatou efficient ma tatou effective ona maua lea e tatou o le fua mai o galuega, aua le alualu i luma o le auaunaga.

A o faafofoga mai le aufaigaluega...

**FOFOGA FETALAI:** Ia malie lau afioga i le Sui Palemia, se i tuu atu le avanoa i le sui o Falelatai ma Samatau.



**Afioga Lupematasila Galumalemana Tologata Tile Leia:** E manatu se i fai foi se malologa i le afioga i le Sui Palemia po o le afioga i le Minisita. Ae malie lava i le faalogologo le saunoaga a le Minisita, ma sa i ai lava le manatu maualuga....sa faigaluega foi i totonu o le Malo, ma o le upu moni lava o Samoa o lo o vaavaai ma fai mai i ai tala a le Pasefika, e pitosili na maualuga o latou tagata faigaluega a Samoa, o le upu moni lea. E toatele foi nisi o atunuu o le Pasefika o lo o fia omai i Samoa e vaavaai pe faapefea ona fai galuega a tagata Samoa. O le galuega foi lea sa fai e le PSC, o le aoaoina, e provide le training, ongoing training mo tagata faigaluega. O le isi itu lea e matau atu, o lea e foliga mai e sao lelei le faamaumauga lea e aumai, e sefulutasi pasene e siitia ai avanoa o tagata faigaluega a le Malo. O le isi vaega tele lesa e i ai i le sefulutasi pasene lea, o avanoa sa fai e le Malo, aua e tasi lea avanoa sa fai e le Malo, o le saili o avanoa, e faafaigaluega ai tagata. O lea faatoa maea atu foi le isi saunoaga e toatele tamaiti e iu mai le Iunivesite ae ua leai ni galuega. Ae tasi lea mea sa gafa ma le faigamalo, o le sailiga o ni avanoa e faafaigaluega ai. O le tele la o isi avanoa lea sa maua, faataitaiga o le Matagaluega o le MNRE, e tasi lea Matagaluega o le window, e sau ai grants mai fafo, lea e ala ai ona toatele tagata faigaluega a le Matagaluega lea MNRE. E leai se tupe a le Malo e alu ai, o tupe e aumai faameaalofa, lea e totogi ai tagata faigaluega. Ae pau na o si mea e tau tei ai le faalogo, e foliga mai o lea e taumafai le Malo e faaitiitia tagata faigaluega, ia ae o lea foi e tilotilo i le Malo e tatau ona maua ni galuega mo tagata.

**FOFOGA FETALAI:** O lea ua maua atu le agaga o le sui usufono...

**Afioga Hon TUALA TEVAGA IOSEFO PONIFASIO:** Lau afioga i le Fofoga Fetalai...

**Afioga Lupematasila Galumalemana Tologata Togia Tile Leia:** ma le agaga faaaloalo...

**FOFOGA FETALAI:** Ia ae silasila foi, o lea ua saunoa faalauaitete le Sui Palemia e faamalamalama le review lea ua tapena. E tele lava ia itu e silasila i ai le Faigamalo. Ae e manatu, ua oo lava i le taimi o le Faigamalo ua i ai nei, se i saili foi latou ia nisi auala. Ia ae ua i ai le manatu, taatia ia na taimi ua tuanai, tatou o i le mea lea ua sagai foi i ai le Faigamalo o i ai nei, ia ma le latou foi review, le iloa pe taunuu i se taunuuga lelei.

Ia ae aua tatou te toe tepa i tua, se i tau tau fai foi ia le review. Ia aua e le mafai ona agai i luma le review, ia pe a tau tosotoso i tua. Ia e pei o le agaga lena, ua manatu tele, o lea ua saunoa manino le Sui Palemia i le faamoemoe. Ia tatou tapuaia, e le uma lava ia le tatou fa'ifa'i i ai, ia ma fesoasoani i ai i le agai i luma.

Ia ona o lea o le a poloka ia le saunoaga a le Sui Palemia, ia ao lea e tau faafofo atu nisi auala e faapena. Se i tulai mai ia le sui usufono o Vaimauga Nu.1.

**Afioga Sulamanaia Fetaiai Tauilili Tuivasa:** Faafetai i lau afioga i le Fofoga Fetalai, sa le faalavelave lava i le saunoaga matagofie a le Minisita po o le Sui Palemia. Ia e pei ona ou fai atu e lagona lava i tino matagi lelei i saunoaga a Minisita. Ia ae e pei ua... o le mea tonu lava lea sa popole i ai le sui usufono ia o lea ua saunoa foi ia le afioga i le Sui Palemia ia ma saunoa i le inu etoeto. A inu etoeto o lona uiga o le a vaea le isi autau, e pei o le agaga lena sa popole ai lava lou sui usufono.

E pei ona ou fai atu ou te lagolagoina ia le review ae e pei la e foliga mai o lona uiga e uma ifo... leaga o lea na faatusa i ai i le autau lea na o e feinu i le vai o... e pei o le agaga na e pei na popole ai le sui usufono, ina ne i uma ane ifo ina... o lona uiga la aua o lea na ave i lalo le autau lea i le vai, se i iloa ai po o le vai lea o Ioritana, po o ai ia e... o i ina na vaea ai le isi vaega o le autau. O lona uiga o le popolega lena o lou sui usufono, lona uiga e uma ifo le review lea, ua vaea ma le maua galuega a isi.

**FOFOGA FETALAI:** Ia, aua le popole...

**Afioga Sulamanaia Fetaiai Tauilili Tuivasa:** E pei o le agaga lena lau afioga i le Fofoga Fetalai, e avatu ai le popolega o lenei itumalo...

**FOFOGA FETALAI:** Aua le popole, a outou maua mai ia le saunoaga a le Sui Palemia, e inu etoeto, ma vaavaai solo i autafa po o lelei ma... e faapena. E le o i ai se mea o le a pauu atu i lalo o la e... e faafogafoga lelei mai i le saunoaga a le afioga a le Sui Palemia.

Faaauau mai lau saunoaga lau afioga i le Sui Palemia...

**Afioga Hon TUALA TEVAGA IOSEFO PONIFASIO:** Faafetai lau afioga... malilie mai sui usufono, ou te lagona o atugaluga na e i ina, atonu o le a manino pe a uma atu se faamatalaga. E taua le tulaga o le tatou aufaigaluega a le Malo, e le o i ai se agaga e vaea le aufaigaluega le sui usufono mamalu. Ua uma foi ona ou faamanino ia le tulaga lena, masalo ua outou malamalama tou te silafia le agaga o le Malo, ina ia faaleleia le auaunaga.

O lea sa tau fai atu lau tala, o le galuega lenei o le iloiloga, e lelei mo le aufaigaluega a le Malo. E lelei mo le Malo, e lelei mo le atunuu. Leaga foi o le iloiloga e mapuna mai ai isi mea lelei. O i e iloa ai le faaletonu ao i foi e faataoto mai ai le polokalame a le Malo, ia faaauau tulaga o aoaoga faaauau, continuing education, semina, malaga e ave i fafo i fonu,

faalauaitete le silafia o le aufaigaluega. O mea uma na, o lo o i totonu o le iloiloga lenei. E aofia ai foi ma totogi.

Ae ou te le manao e faatelevave lau talanoa i le va lea, ae se i taumafai atu pea lau faatulagana lea ua i ai, ina ia manino ma silafia le tatou Maota nei. E ao pea ona ou avatua isi faataitaiga ia, so o se Faalapotopotoga lava, e i ai tagata faigaluega e toatele lava latou e galulue punouai. E faatino ma unai fuafuaga faataatia, e tatau ona ausia e se Faalapotopotoga po o se Kamupani, e le faalogologo tiga ae galue fiafia, e mataala. Ae i totonu o se aufaigaluega, e i ai lava sina vaega laiti lava nei, e tosoa le ausia o le Faalapotopotoga o ni manulauti maoae. O i ina la lea e pei e agai i ai le isi vaega o le iloiloga, se i vaai tagata nei po o sao le galuega le galuega lea e faigaluega ai. Po o sao foi le avanoa lea e faigaluega ai e fua i lona tomai ma lana tusipasi na sau ma ia. O mea uma lava faapena ou te le tau tolaulauina atu o lona ua outou silafia le mea e tau o le review.

O lo o vaavaai foi lenei iloiloga i le tulaga o le performance. E le natia le tulaga lea leaga e maua so o se Faalapotopotoga, e i ai lava isi e unai, ae i ai foi isi e toso tulou le Maota. O lo o vaavaai le tulaga o le performance po o ausia le tulaga i galuega e tatau ona oo ai le faatinoga o le tagata faigaluega. Ia ma tausisia aiaiga o le avanoa o lo o faigaluega ai, le tinou ma le agaga atoa, mafaufau atoa, ma lona loto i ona tiute fai, ina ia ausia ma fua mai le galuega i lona faatinoina. O le performance, ua tou silafia le uiga o lea upu.

Ou te talitonu ua toatele tagata latou te le o gafatia ia tiute ia avanoa ma galuega fai, i latou matafaioi o lo o galulue ai. Ua ou iloa, ou te iloa ua lava nai masina ia o lo o ou i ai i totonu o le Malo ua ou vaai ai i le tulaga lona. O lo o i ai tagata ua tofia i totonu o avanoa, e le mafai ona o latou faatinoina. E pei o le isi lona vaega taua e tatau lava ona tuu se avanoa se i silasila le iloiloga, o le a la le mea e fai i i? O le a la le mea e fai i i le vala lea. Pe sui ai se galuega pe o le a le tulaga e i ai. Ae e le mafai ona faapea e vaea.

E faatoa vaea lava le tagata faigaluega a le Malo, ia o lona ua outou silafia. Pe a le perform. O lona uiga, ua le mafai ona faatino le galuega. Pe a le usitaia Faiga Faavae po o Tulafono foi a le Matagaluega e faafaigaluegaina tagata faigaluega o le tatou Malo. Ia o lona ua outou silafia uiga foi ia o le solitulafono ma mea faapena. O lenei iloiloga, e mafai ai e le Malo ona faataatia ni alafua, e fua ai ni agavaa o le tagata i lana galuega o lo o fai. O lo o vaavaai foi le review, e tuu tagata fetau i lona tomai. Ia talafeagai foi lona totogi e ave i ai.

O le tulaga foi na outou faafesili ai i le tulaga o le Bond, o le tele o tamaiti ua iu mai, ua omai ma o latou degrees ma mea faapena o lo o tatala pea le avanoa. E moi lava o lea na saunoa nisi o sui usufono faapea ua le maua ni galuega, ia a foi la o le tulaga na. Ua sau le tagata ua iu mai, ae lea ua faigaluega le tagata e le i iu mai i le avanoa lea. So o mea uma lava nei e

fetuutuunai ma vaavaai foi le iloiloga i le mea e tatau ona fai. Ia ma ia faataoto ia ni Faiga Faavae, ia e maua ai foi ia ni faamanuiaga.

E ao foi ona silasila le review, ni faamanuiaga po o ni awards, alauni, ponesi, ovataimi, o mea uma lava faapenei i totonu o iloiloga nei leaga e taua. E taua ia le tulaga o le toe aoaoina o le afaigaluega a le Malo. O mea uma nei o le a i totonu uma o lenei iloiloga.

Lau afiga i le Fofoga Fetalai, o lo o i ai tomai o lo o sioti e le o maua i Samoa. Fomai e faia ia taotoga o e maliliu ia ma suesuega o Pathologist. O lo o manaomia foi ni fomai o le manava ma le tulaga o mama po o Respiratory and Lungs. Ia manaomia foi nisi Loia, o nisi Policy Makers, nisi Saienitisi, ia aemaise foi ia ni Inisinia. Ia o VETS, tagata e galulue i le falemanu ia ma mea uma faapena o lo o manaomia ao le taimi lenei, e le o maua i Samoa nei tomai.

O tomai manaomia ia e tatau ai ona fuafua i ai le vaevaeina o sikolasipi ia ma isi faamanuiaga a le tatou Malo i le isi 5 i le 10 tausaga ina ia fua mai vaega o lo o ave i ai le faamuamua a le Malo, i lalo o lana taiala. O lo o i ai foi avanoa i totonu o le Matagaluega e le o toe manaomia. E pei o avanoa foi ia ua redundant. Ua ese foi ua shift foi ia le focus o le strategic focus o le Matagaluega, o i ina foi ua tatau ona toe realign ai, i le faatulagana o isi avanoa.

O le tele o Matagaluega e le o faatumuina avanoa ae ua tatau ona aveese ia avanoa. O le mafuaaga ia ae o la e totogi lava. Ua uma lea ua uma le tausaga, ona faaoga loa lea e latou ia savings ia, ia e fai ai isi fuafuaga a le Matagaluega. Ao le mea moni lava, e le tatau ona i ai ni saving i ni avanoa e le o faaogaina ae o la e pei e ave pea i ai le totogi. Ia o lo o toe iloilo foi ia le tulaga o totogi ia aemaise foi o le tupe faaalu a le Malo i lana Human Resource po o tagata faigaluega o le itu taua lea. Ma a maea iloiloga, ona tulai mai lea o le tatou National Workforce Plan ia e limataitaiina ai ia le faafaigaluegaina o tagata o le tatou Malo, mo le isi 10 tausaga. Ia o mea ia tau good governance po o Pulega lelei na o atu le tatou Malo e fai, ia o lea ua faatino e pei ona i ai le tatou taiala mo le lumanai.

O le tulaga e pei ona taua i le tatou Renumeration Tribunal po o le Salaries Tribunal, ia o lo o nafa latou ma le faatonutonuina ia ma le fuafuaina o totogi a le afaigaluega a le Malo. O i latou foi o lo o vaavaai ma iloiloia le tau o le soifuaga e fua i ai totogi o le Malo. O lo o tapena foi ia le latou pitolaau, lea ua maea ona faamautu sui o le Tribunal e pei ona outou silafia, ua tofia ai foi nisi o tamalii ua agavaa mo lea galuega. Ae i ai le manatu, a maea le fuafuaga o le tatou review, ia ona faatino loa lea o le galuega a le RT, ia e fua i le faatulagana mautu faavae o le a tuuina atu i lalo o le tatou review.

Lau afiga i le Fofoga Fetalai ou te fia talanoa i sikolasipi, ia o se mataupu taua. Ia mo le silafia, o sikolasipi sa i lalo o le Matagaluega o le Va i Fafu le MFAT. O le taimi nei ia, lea ua tuuina atoa i lalo o le Komisi o

Tagata Faigaluega a le Malo i lona fuafuaina lelei ma le faatinoina. Sa saunoa ia le sui usufono o Siumu, o tamaiti ua ausia maka, ua tataua ona agavaa i se sikolasipi, ae e le maua se sikolasipi. Atonu e sao, ona e i ai ia mafuaaga, se i ou taumafai e faamalamalama atu le tulaga lea.

O le sikolasipi ia ua taua o le MANAAKI, o le sikolasipi a Niu Sila, ia e faatatau mo tamaiti aoga ua manino, ua i ai latou uiga lelei po o qualities, uiga taualoa latou te mafaia ai ia aoga i Niu Sila, ia aemaise ai lo latou malaga atu nonofo i Niu Sila i le soifuaga o lo o faapena ona soifua ai tagata Niu Sila, e le o tutusa ma Samoa. O lona uiga, o lo o tilotilo latou i le well rounded i le tulaga foi lea i mea fai ao malaga atu e faatino le aoga, pasi toe foi mai i Samoa. E ese foi la le screening a Niu Sila o lo o fai. O lona uiga, e le o agai tele Niu Sila i maka. E pei o maka o le mea muamua lava lena.

O lea o lo o i ai le faatulagana o criterias a le sikolasipi a Niu Sila, e tataua pea ona ou tau atu mo le silafia. Ae o lo o i ai le mea muamua o le academic performance. O i la e fua i ai ia maka ia o lo o taua nei. E tataua lava ona muamua ausia ia tulaga o le maka i le 85 agai i luga. Na sosoo ai lea ma le isi criteria, o le application form. O le application form, e uma loa le Semester muamua, ona faatumu loa lea e le tamaitiiti o le application form. E faatumu la lau form, ae ua e ausia ia maka pasi ia... maka ia e pasi o le 75% agai luga. E lavea ai ia le Igilisi ia ma isi mataupu e 3. A maea loa le Semester muamua ua pasi au mataupu ia e 4, i luga atu o le 75, ia ua e agavaa loa e faatumu ia le application form. Ia o lo o i ai foi criteria o le application form ia, i le tulaga foi ia ia talafeagai ia mataupu ma le atinae o Samoa. O le isi na mea, e fua i le mataupu e manao ia le tamaitiiti e fai. Ia e vaai foi ia le faatumuga o le application form i tamaiti foi ia e mafai lava e latou ona unai latou the self drive. Ia o tamaiti foi e iloa le va ma isi tagata i le tulaga foi lea o le relationship management. O le tetele ia o nei mea, ou te... ia au lava ia e aoga ae ou te le iloa pe o iloa e nai tamaiti po o silafia e nai matua nei criterias.

O lo o i ai foi le tulaga o le Abstract Reasoning Test. Ia a tau ia le Abstract, ia o se mea foi lea o le talatalaga i tua atu o le mafaufau o le tamaitiiti ina ia iloa reasons. O le isi tamaiti e pese mai lava e a 2 x 2 ua 4, 2 x 4 ua 8, a x 8 32, le pese mai i timestable foi ia, o le matua lelei lava e tau i le 15. Ae a e fesili loa i ai e faavasega mai o le a le uiga o le 2 x 2 + 2 e faigata la ona talatala ia le tulaga lena, ona e ese lava le pese ma iloa le mea na e fai, ese le mea e faavae ai po o le talatalaga o le mea lea e na te iloa, lea e pese ai. E pei o mea na e tilotilo foi i ai Niu Sila i tua atu o le malamalama o le tamaitiiti o lo o i ai.

Ia ma le vaega lona 4, e 20% ia le maka o mea na. Ia, o le isi 20%, ia o le interview. O le interview la, o i la e faatalatalanoa ai le tamaitiiti pe a faapea la na avatu le application form na faatumu e matua, ona alu atu lea o le tamaitiiti e fai le interview i luga o le application form, e faigata i le

tamaitiiti ona tali nisi o mea o i luga o le application form. E pei la o i, faapea mai loa Niu Sila, leai la e pei e le o tutusa le tali mai, ma mea ia na tusia.

O mea ia, e ao i le aufaisikolasipi, ona faamalamalama i matua, faamalamalama i tamaiti pe a faapea o lea e i ai i criteria.. Ou te le o iloa pe o ave i tamaiti nei criteria ia o lo o i ai i le taimi nei. Ae mo le silafia, ia e 32 sikolasipi ua maea ona faatulaga mo le 2023. E 26 ia sikolasipi a Niu Sila, ia ae 6 ia sikolasipi e ave i Fiti. E 32 le total le aofai o sikolasipi o Niu Sila. I le tulaga o Ausetalia, ia ma e o le isi mea, e na o tatou o tagata Samoa e agavaa i sikolasipi nei.

O Ausetalia, e na o le tulaga foi lea o maka o le aoga. O le academic ranking e sao ai. O lona uiga e leai se isi test e faia e Ausetalia e na o Niu Sila lea e i ai le mea lea. Ae o lo o i ai foi ia le sui o Samoa, o lo o i totonu o le Interviewing Panel lea i le taimi e faatalatalanoa ai. Ia o le tulaga lena o Ausetalia, ia e 5 ia tamaiti e o i Ausetalia, ia ae 8 e o i Fiti. Ia e 13 i lona aofai.

O lo o i ai foi ia isi sikolasipi e pei ona taua e le afioga i le Minisita o Tupe, o lo o lalo lava i totonu o Samoa nei. E pei o sikolasipi ia ua taua o Government Funded Scholarships, lea o lo o i i le NUS. Ia, o lo o taoto foi se talosaga mai i le PSC, o lo o i ai se vaegatupe o lo o fia talosaga mai ai i le Kapeneta o lo o avanoa, ina ia auina atu nisi tamaiti e 50 mo aoaoga i Fiti, mo sikolasipi i Fiti mo le tausaga nei lava. Ae e pei ona silafia, e 50 awards, tamaiti o lo o tuuina atu i le NUS, Foundation, faapena e 60 ia partial awards, ia o lo o tatala pea i le lautele, e le gata i le Malo ae faapena foi ia Kamupani Tumaoti ias ma NGOs. Ia e 60 foi ia faamanuiga o sikolasipi o le TVET, ia o lo o i ai foi isi faamanuiga o sikolasipi e 10 mo le Aoga Faafomai, po o le School of Medicine i le NUS. Ia o lo o i ai foi ia avanoa faasikolasipi e 20 i le undergraduate ia po o le 1st Degree i le USP i Alafua. Ia o le tau atoa o na sikolasipi, ia e \$3.2 miliona.

Ia masalo ua faamaea i i lau tala i le tulaga lava o sikolasipi aemaise foi o le iloiloga o faatino nei. Ae ou te fia talanoa lava i nisi foi o mea na laga e pei o le saogalemu o le Susuga ia Tuilaepa, ia ma nisi foi mea o le saogalemu o le atunuu i lana taligamalo i Faauluuluga o le Malo o Taupulega o loma nei. Ia faapea foi le tulaga o le Laisene o Pisinisi, ia ma tulaga foi o le atoa o Samoa ma femalagaiga i le va o Tutuila ma Samoa nei.

O le... lau afioga i le Fofoga Fetalai...

**Susuga Maulolo Tavita Amosa:** Lau afioga i le Fofoga o le Fono pe maua se avanoa...

**FOFOGA FETALAI:** Malie lau afioga i le Sui Palemia se i tuu atu le avanoa i le sui usufono o Sagaga Nu.2...

**Susuga Maulolo Tavita Amosa:** Faafetai tele mo le folasaga manino i le tulaga lea o le review a Public Servants, ona o au le isi sa tele na afea le vaega lea. Ae semeamanu lava o lea ua tele ina amata le galuega, atonu o le a le afaina i le Taitaifono o le matou Komiti lau faaali matua foi sa Taitaifono i le tatou Komiti, ao toesea ia le Taitaifono le Susuga i le Sui Fofoga Fetalai. O na ua alu atu ia le matou Lipoti, o se taimi talanoa, ae ua ala la ona ou laga i le taimi lenei, o le tatou pitolaau e faasoa.

Ia aua o lea ua fai le review, o lona uiga ua redundant, ua le toe i ai se aoga e toe talanoa ai le vaega lea o le matou lipoti ona o le mea tonu lava lea ua taua. O le uiga o lau faamatalaga, o le Komiti lenei sa silasila foi i Annual Plans ia sa aumai I mean Annual Reports ia sa aumai ai nisi o Matagaluega ma e aofia ai le PSC. Sa matou vaai ai i Performance a le afaigaluega, ma aumai ia matou recommendation, la lea la ua tagofia e le PSC le vaega lea. Atonu e aoga se matou faasoa atu, semeamanu lava le tautuauega se sao foi a le tatou Palemene i lea vaega taua.

O le mea na o matou mataua, manatua foi pe o le ogatotonu o le 1990s, sa amata mai ai le Reform vaega lea a le Public Servants sa fai ai. O le manaia ia...

**FOFOGA FETALAI:** Se faamolemole lava ia le sui usufono mamalu, se i faailoa mai le vaega o le lipoti lea sa outou talanoaina e le tou Komiti. Se lipoti o le a?

**Susuga Maulolo Tavita Amosa:** O le lipoti lea mo mea o lea e matou te vaavaai i ai Annual Reports ia lea e aumai lea ua alu atu ae e le i sau e le i talanoaina, ae talu ai ne i tautuauega leaga o lea ua tagofia le vaega lea, e ono aoga i ai le lipoti lea so might as well discuss i le taimi lenei. O le fesoasoani o le uiga lena o lau faamatalaga..

**FOFOGA FETALAI:** Oi masalo o lea ua maua le finagalo o le sui usufono mamalu. Ia o le review lea e talanoa ai ia le Sui Palemia, o le review agai i le lumanai.

**Susuga Maulolo Tavita Amosa:** Lau afioga i le Fofoga o le Fono...

**FOFOGA FETALAI:** Ia ma silasila mamao, ao mea na o Annual Reports, ia atonu e aoga foi i se isi taimi ia pe a te i ua tapa ia outou i se taimi ia le tou Komiti. O lea e faafogafoga mai ia le Taitaifono, ia ona maua lea o se fesoasoani ao le review lea, ia mo le faaitaiga...

**Susuga Maulolo Tavita Amosa:** Lau afioga i le Fofoga o le Fono...

**FOFOGA FETALAI:** Onosai mai se i fai atu le tala a le Nofoa. E lelei lo tatou o malamalama, leaga e leaga ia le toe toso i tua o tatou mea i le tou Lipoti. O lea ua saunoa ia le Sui Palemia, alaala mai i lalo, alaala mai i lalo. O le Tulafono e talanoa loa le Nofoa alaala mai i lalo le sui usufono.

**Susuga Maulolo Tavita Amosa:** Faamalulu atu...

**FOFOGA FETALAI:** Ia o le tulaga lena, tatou o malamalama leaga o le a toe toso i tua ia le tatou mataupu i mea sa outou talanoaina, ae o lea foi e le i table ina ia le tou Lipoti i luma o le Palemene. Ae onosai, o le fuafuaga lea, mo le agai i luma. O le review mo le agai i luma o le afaigaluega a le Malo.

Ia e pei o le mea lena ae atonu lava e aoga i se taimi, ia o lea e faafogafoga mai ia le tou Taitaifono, ia ona fesoasoani lea ne i te i ua toe toso i tua, ae o le review ia ua pasi o lea ua tea le review, lea ua uma atu ma sikolasipi ae o lea o le a e toe oso mai, ia o lona uiga o le a toe toso i tua ia le tatou mataupu.

Ae malie le sui usufono mamalu, ia se taimi ia tou talanoa ma le Taitaifono...

**Susuga Maulolo Tavita Amosa:** Ia faapea ia ona fai e pei ona e saunoa... ia a i ai foi nisi mea, ia o le mea sili ua magalo lenei sui usufono o lea e taumafai e faailoa atu ae faafetai lava.

**FOFOGA FETALAI:** Ia faaauau mai lau saunoaga i le mea lena ua e oo i ai lau afioga i le Sui Palemia.

**Afioga Hon TUALA TEVAGA IOSEFO PONIFASIO:** Faafetai foi i le fesoasoani i lau afioga i le Fofoga Fetalai. E le faatusatusaina ia Annual Reports i le Review lea. E pei ona ou taua, e le i i ai se review 16 nei tausaga, e le o i ai se review. E tau aofia atoa ai lava ia le vaega e pei ona taua o le afaigaluega, o totogi, o avanoa, o sikolasipi. Malie maia lau afioga.

O le mataupu o le saogalemu o le Taitai o le tatou Malo, ia lea ua silafia o le tulaga foi na tulai mai, e le aoga ona ou tau talatala ia vaega o le auiliiliina o le mea na tulai mai, a ua silafia ia o se tulaga foi lea o n i tamaitai sa faapena ona faaali lo latou gaulemalie foi i le Susuga ia Tuilaepa. Ia e mafua lava ona o ni saunoaga foi sa faapea o le talafo i luga o le ea po o faasalalauga foi ua tagofia foi e le toaina ia measina ia mea e patino i nai mafine nei, ia ae e le pai i ai.

E pei o le tulaga lena, e ui lava o le tulaga lea na tulai mai, o lea ua faatino lava e leoleo ia le saogalemu, ua auina atu se leoleo, ma nai aiaiga,



ia faapena ona puipui le soifua o le Susuga ia Tuilaepa. Mo le silafia, e le i i ai ni Faiga Faavae po o ni tulaga foi ia e agavaa ai se sa avea ma se Palemia, ia po o se Minisita foi i se sikulaki po o se leoleo foi e puipuia lona saogalemu. A faapea o le tulaga lea, ia e tatau foi ona toe silasila ia le tatou Kapeneta i se tulaga foi e ono agavaa ai ia le afioga i le Tuiatua Efi ia ona o ia foi sa avea ma Palemia aemaise foi le sui mamalu po o le Ao o le Malo i sona puipuiga. I le taimi nei, ia e leai se Sikulaki po o se leoleo o lo o faapena ona puipuia lona saogalemu. Ia o le tulaga la lena e pei ona i ai. E 3 masina o lo o tuuina atu ai le leoleo a ua uma ona tuuina mai ia le lipoti a leoleo, e leai se tulaga foi lea o se risk po o se tulaga e ono lamatia ai le soifua o le Susuga ia Tuilaepa, ia ae peitai ua faatino pea ona o tulaga lava, ma se i tau faatoafilemu le tulaga lea, ia ma sei fai foi se faaiuga a le Kapeneta, i tulaga foi o le saogalemu o le Tuiatua, ia aemaise foi o le Kapeneta, ia ma nisi foi o manaomia le puipuiga o le saogalemu.

Ia faapena foi ona tuuina atu le tusi a leoleo, ia ua lapataia ai foi le Susuga ia Tuilaepa, ina ia faaeteete, ina ia faaeteete aua o le mea foi lea o le taufaifai ma mea faapenei, e tiga ai loto o tagata ma lagalaga ai foi lagona, ia o le offense po o le solitulafono foi i lalo o le Police Offense Act, i le mea lava lea o le lepetia o le filemu. Ia o ia lava na amataina mea nei, ia ae peitai, o la ua avatu i ai le warning a leoleo, e alofa ina ia faaeteete ma aua le soona faia ni lafoga, ia ao lo o faafofoga le atunuu.

O le tulaga foi la lea o le saogalemu lava o lo o... i le teine la lea na faapea na sao atu i totonu o le malaevaalele ma tuuvaa atu i Fiti, ia ua maea foi ona tuuina mai ia le lipoti a le Matagaluega a Leoleo le afioga i le Komesina, ia o lo o auiliili mai foi nisi o vaega o lenei mataupu. Ma e moni lava au e pei ona tuu mai foi ia saunoaga, ia o lo o i ai sina sasi i totonu o le auaunaga.... ou te le faasinolima i le taimi lenei, ona ua i ai nei i le Ofisa o Leoleo ia le mataupu. O lo o silasila foi latou i lape o lea auaunaga ma e o le mea moni lava, ia o le mea foi lea ia tatou seiloga lava ua tupu se mea faatoa tei mai aumai le saogalemu.

Ou te iloa foi o le mafuaaga lea na saunoa ai se isi o sui usufono, le faasaina o telefoni ia i le malaevaalele lea na saunoa ai se tasi o tamaitai, ia ai ona o le taumafai e faali mai o la ua faatino le puipuiga i le malaevaalele. Ae o le tulaga lava o le tamaitai na sola atu, ia e i ai mafuaaga ua ala ai ona sola, ia ma ua faamatala auiliili mai foi e leoleo le sao atu i totonu, ia ua i ai nai lape o le auaunaga ma o le taimi lenei o lo o toe iloilo atoa foi le tulaga o le auaunaga, ina ia aua ne i i ai se faaletonu.

O le mataupu lava lea, e faamalie atu i le Minisita o le malaevaalele, e le o se mataupu e patino i leoleo, o le mataupu e patino lava i le Airport Authority. Masalo a fia faalatele ia le tulaga lea, ia o lea e afio mai ia le Minisita, ae o le tulaga o le auai o leoleo, ia o lea ua ou talanoa atu ai, o au o le Sui Minisita o le Matagaluega o Leoleo.

Ma e atonu lava e tomua mala, leaga o lea na saunoa manino le Taitai o lena Itu, ia o lo o tapena ia le Heads of Government Meeting iinei i Samoa lea na malo ai Samoa. Ia o se Fono e ao ona tatou mataituina, tatou mataala ma ia lelei ia le puipuiga o a tatou Malo. Ma e mo le silafia, e le i faataoto mai e le Tamaitai Palemia ia ana fuafuaga ae e mafai ona ou faapea atu, ua leva ona galulue le vaega eseese i le tapenaga aemaise lava le faamuamuaina lea o le tulaga i le saogalemu i le tatou Malo.

Ua leva ona galulue leoleo, ua tuu mai foi ia le pepa o le latou tapenaga i totonu o le Kapeneta, ia o lo o saili se tupe tele, e toe faaleleia uma ai lava sia tatou networks ia ma mea uma lava faapena, o lo o galulue ai ma le Malo o Ausetalia. E lagona lava le mafanafana e le o se mea e falagai ai lagona, ae o lo o galulue mai pea i le tulaga lea ua ave i ai le faamuamua, nofo silafia foi le Palemia ma le Kapeneta, ia ua maea ona auina mai se vaega e omai e asiasi le tatou atunuu i tulaga uma i facilities ia ma mea uma lava o le a faapea ona faatino ai le fono tele lenei. Ma ua maua mai foi le lipoti, o lo o mafai e Samoa ona o tatou talimalo i le tulaga o lo o i ai ia tatou facilities ia ma tatou faletalimalo. O le taimi la lenei, masalo o le mataupu tele lea o le a feagai ma le Palemia pe a afio mai, ia o le faatinoga loa po o le put in action le fuafuaga uma lava e pei ona saunoa ai foi nisi o sui usufono, e uiga i le tatou CHOGM.

Ia o nisi vaega o totoe o le tulaga ia tatou taavale e pei ona saunoa sui usufono i le leoleoa ia taavale nei o lo o feoi i le aualatele. O le aualatele o le aualatele a le Malo, ia o le vaaiga ia a leoleo, ia ua na o pasi ma taxi ia ma taavale foi ia laupasese public vehicles o lo o i ai le Tulafono e faasa ai ia latou nei. Ao tulaga o taavale umia lava e le tagata ia po o private vehicles, ia e le o i ai se malosiaga o leoleo seivagana ai le maua faalua e leoleo. A maua muamua ona lapatai laia, a maua lona 2, ia ua mafai loa ona molia e leoleo i lalo o le Traffic Ordinance, ia faapena foi ia le Police Offensive Act ona o le tulaga foi lea, o le lepetia o le filemu.

Ae mo le suiga po o le faasaina o taavale ia o private vehicles, ia e talosaga atu foi i le Minisita o le LTA, ia atonu o i ina, e aumai ai e latou ia se Tulafono, ia ina taofia ai foi ma le malomaloa tulou, o laau leotetele i totonu o nei taavale.

O le tulaga o le Atoa Samoa, ia e pei ona saunoa, ia o lo o aumai ai ia le tulaga foi lea o tatou Visa po o le saolotoga foi lea e ta te femalagaai ai i le va o Samoa ma Amerika Samoa. E pei ona silafia e le tatou Maota, o lo o faaauau pea ia feutanaiga po o le feiloaiga i le va o Samoa ma Amerika Samoa, ia o lea foi e loma le isi feiloaiga i le isi 2 masina o Aperila. Ae mo le silafia, ia na tafa ia le finagalo o le Malo o Amerika i le fono lea na auai mai, ina ua tatalo atu ia le tatou Malo ma faamalosi atu foi ia le talosaga, ia le tulaga lea o le Talofa Pass pe mafai ona relax teisi ina ia faafaigofie femalagaiga. Ia o le mea moni lava o la ua ioe mai, ia o mea foi ia ua vave le ioe, ae e ao foi ona o tatou onosai, ia e i ai nai tapenaga, e i ai lava nai

mea foi ia faaulugafau foi ia lavelave, e ao ona talatala teisi ina ia mafai ai ona faatino le ioe lea. Ia ou te iloa o le mataupu tele lea e toe aumai i totonu o le Fono ia Aperila, talosia ia ia mafai ona matala lea tulaga, ina ia faafaigofie ona o tatou malaga atu, ia faafaigofie foi ona malaga mai latou.

Ia semeamanu lea ou te i lalo pea i le tulaga lea o Visa, ia e pei ona saunoa foi ia le Taitai, i le tulaga o le Engagement le Visa lea a Ausetalia, le Visa lea ua offer mai, e o atu ai tagata mai i Samoa, mai i le Pasefika, mai i East Timor, e o atu e faigaluega ma nonofo i Ausetalia. O le Visa lea ua taua o le Engagement Visa a Ausetalia. E silafia foi ina ua malo le Faigamalo lea nei ia October i le Palota, ia e malo nei ae o le isi ua sau le faasalalauga, o le a offer atu 3,000 ia avanoa, ia Visa e malaga mai ai tagata i le Pasefika aemaise lava Samoa, e galulue ma nofo mau i Ausetalia. Na fai lava leni faaaliga e aunoa ma se consultation, se fesootaiga foi ma le tatou Malo. Ia ua tatala mai avanoa faavaitaimi, ia pei foi lea ua tatala lava ua leai se papuipui.

Ae o ananafi foi, na sau ai foi ia le isi faaaliga. O le aofaiga na faaagaga e Ausetalia e 35,000 mo so o se tagata, ae o le aso ananafi, ua sau ai ua 195,000 avanoa. Ua sioti lava le aufaigaluega i Ausetalia, ua sioti foi tagata e pei o le mafuaaga lena, ao le popolega lava o tatou ia, o le o o tatou tagata i galuega faavaitaimi, ma o atu ai lava e le toe omai. E pei o le isi lea mea o lea na saunoa i ai le Minisita, o lo o vaaia ia le tatou RSE. Ia o popolega ia ina ia fai fuafua lelei, le malaga atu o tatou tagata ma ia toe foi mai. Ae o le taimi leni, la ua 4,000 la ua alu atu, ia o le toatele lava ua o i le 3 tausaga, motusia mafutaga ma aiga, ia aemaise foi Ekalesia ma nuu. Ia ae atonu o lena ua tau faamalamalama atu le tulaga lena, ia e tau faamanino ai foi ia lena tulaga.

O le mataupu mulimuli, o le tulaga lava lea i tatou laisene pisinisi. E pei o le isi lea mea na matuai fuli i ai le faamamafa foi a sui usufono, ona o le tulaga faapea ua taofia le tulaga o laisene pisinisi. E faamalulu atu i lau afioga i le Fofoga Fetalai, o lo o i ai lava sina mataupu se i vavae foe i i. Ae se i tuina atu se talosaga i lau afioga...

E fia faatu le lafo e faauma le Tala o le Tupe i le po nei, pe a tusa ai ma le tofa a lau afioga.

**FOFOGA FETALAI:** O le avanoa nei e faatu mai ai le lafo lau afioga....

## **LAFO MO LE FAAAUAUINA O ITULA FONO**

**Afioga Hon TUALA TEVAGA IOSEFO PONIFASIO:** Ou te tulai ai lau afioga, e faatu le lafo, *E teuteu ina ia faaauau pea ia a tatou Taulumaga, seia maea ia le faitauga faatolu o le Tala Faatatau*

*Faaopoopo (Nu.1. 2022/2023, o le a talanoaina nei ona tatou tolopo ai lea. O le lafo lea ma le faaaloalo lau afioga.*

*Faaluaina e le Minisita o Faatoaga ma Faiga Faiva.*

*Na faamaonia le lafo.*

**FOFOGA FETALAI:** Ia faaauau le saunoaga a lau afioga i le Sui Palemia.

**Afioga Hon TUALA TEVAGA IOSEFO PONIFASIO:** E talitonu e le toe umi lau afioga i le Fofoga Fetalai ona o le tele foi o le tulaga o Laisene Pisinisi ua uma foi ona ou faamalamalamaina...

**Tofa Hon Lauofo Fonotoe Nuafesili Pierre Lauofo:** Lau afioga i le Fofoga Fetalai, pe maua se avanoa...

**FOFOGA FETALAI:** Ia malie lau afioga i le Sui Palemia se i tuu atu le avanoa i le Sui Taitai o le Itu Agai...

**Tofa Hon Lauofo Fonotoe Nuafesili Pierre Lauofo:** Ia ona o lea e matau atu o le a see ese ia le afioga i le Sui Palemia i le mataupu lea sa ou taua i lau lauga i tulaga nei o le a foi nei o le galuega lea faavaitaimi lea e taua ai ma le Pacific Engagement Visa.

Sa ou fesiligia le Minisita i le masina o Iuni i le Tala Faatatau Autu o le Tupe i le Pacific Engagement Visa. O le a le sao o le tulaga lea ona o la sa ou vaai, sa iinei ia le aumalaga mai Ausetalia, sa faatalanoa ma le MFAT ma le MCIL le Polokalame lea. O lea la ou te manatua le tali mai a le afioga i le Minisita le afioga ia Leatinuu, fai mai o le Polokalame lena a le isi vaega Faaupufai lea e fougou e o i le palota, a malo, tulai mai, ia ona faatino loa lea.

O lea la e pei ona maua atu, o le tulaga tonu na lea ua i ai, ae e pei o lau fesili foi lea pe o le a le... pe faaauau ese lava le Labour Mobility i galuega faavaitaimi, ia ae ese foi le polokalame lea. O lona uiga e pei e faaoga uma avanoa ia. Po o le mea o tagata o le Labour Mobility e agavaa foi i lalo o le Polokalame fou lea? A ona e pei lava o se manatu na folasia, ona o le manatu alofa foi lea e toatele, vaai fanau lea na faau nei e matua toatele lava alo ma fanau a le atunuu na faaoooga i aoga maualuluga ma Kolisi. O lona uiga la e toatele lava ia le tatou atunuu e pau lava le mea o le training e fia fai i le isi vaega fou, pe a faapea o le a o i fafo isi.

Ae e pei o le auga o le manatu, ia aua ne i maumau avanoa. O avanoa nei e leai ni avanoa e tua i ai nisi fanau ia ua faauu. Ao le eseese la o Polokalame e pei ona avatu ai le fesili faamolemole.

**FOFOGA FETALAI:** Ia se i tulai mai lau afioga i le Sui Palemia...

**Afioga Alaiasa Moefaauouo Malagaitutogiai Sepulona Moananu:**  
Lau afioga i le Fofoga Fetalai...

**FOFOGA FETALAI:** Ia mo le faasaoina o lou taimi, se i tulai mai ia le sui usufono o Anoamaa Nu.1.

**Afioga Alaiasa Moefaauouo Malagaitutogiai Sepulona Moananu:**  
Faafetai lava mo le avanoa, ia o lea sa taua foi i le isi au faamatalaga ia mea ia o tatou Visa ia asiasi. Sa oo i ai se matou... pe i ai sina fesoasoani foi lea i lenei vaitaimi e tau faafaigofie ai ia le tulaga lea.

Ia o lea foi ua taua e le afioga i le Sui Palemia ia le puipuiga lea ua ave i le taimi lenei i le Ofisa mo le afioga foi le Susuga ia Tuilaepa. Pe o le mea o se Faiga Faavae lea o le a i ai i Sui Taitai, mo Taitai o le Itu Agai mo le agai i luma. Ia o se tala lea e fia malamalama ai ona ua tele lava tagata o lo o faapenei i le tulaga o le tatou polokiki o lo o i ai. Ia e oo foi ia tatou e ono lamatia foi ia soifua o afioga i sui usufono i lenei taimi, e le o toe tutusa foi ia le tatou atunuu i le mea sa i ai.

Ia pe i ai se isi auala e puipua ai sui usufono mamalu o itumalo, ma le agaga faaaloalo.

**FOFOGA FETALAI:** Ia se i tulai mai lau afioga i le Sui Palemia...

**Afioga Hon TUALA TEVAGA IOSEFO PONIFASIO:** Ia se i ou tali muamua atu i le sui usufono lea o Anoamaa. O le tulaga foi lea i le security lea o taua, ia e faamalie atu e pei ona taua, o lea e tapena mai ia le Matagaluega o Leoleo i se pepa mo le Kapeneta se i iloilo ai le tulaga lea ona o le taimi nei e le o i ai ni Faiga Faavae.

Ua mafua ona ave ia le leoleo i uta ia Tuilaepa, ona o le auaunaga masani lava lea a leoleo. A i ai se threat foi lea ua e lagona ua tau lamatia ai ia lou soifua, ia ona mafai lea ona valaau i leoleo, e le faatamala la leoleo. Na auai mai lea o leoleo, e fai ni suesuega ma asi, test le level o le threat, ia ma tuuina atu se security foi lea a leoleo mo... po o ai lava e manaomia aemaise lava le mamalu o le Palemene. E pei o le mea lenei o lea e tulai mai ia Tuilaepa. O le taimi la lenei, ua leai se threat. O lea ua uma ona fai le faaaliga a leoleo e leai se tulaga e ono lamatia lona soifua ae o lea e 3 masina lea ua ave ai e leoleo. Ia o le tulaga foi lea se i maea lelei ia Faiga Faavae ia, ia atonu foi e agavaa uma tatou pe a soalaupule le Kapeneta, ia maua uma ia tatou leoleo. Ia po o le tulaga lea, faafetai.

O le saunoaga i le tulaga lea i le Engagement Visa, lau afioga, e le mafai e tatou ona taofia ia o tatou tagata mai i le o i Ausetalia e take up le avanoa

lea. A iu mai ia le tamaitiiti mai i le aoga ua fia faigaluega i Ausetalia, e mafai lava ona apply online. Ua mafai lava e le tamaitiiti ia ona apply online e alu i lalo o le avanoa lea. O le isi na mea o lea e i ai le popolega, ia aua e le mafai e tatou ona taofi o tatou tagata mai i le o i Ausetalia. E pule lava le tagata ia i le mea e migrate i ai pe malaga i ai. Ae pau le auala lea e tatou te tau taofiofia ai le malaga atu o tatou tagata o le RSE po o le scheme lea mai Ausetalia.

O le tulaga o le mobility, o lo o treat pe eseese le vaai a le Kapeneta po o le iloiloga lea o lo o fai nei o tatou faiga faavae ia Niu Sila, e ese foi le vaai ia Ausetalia. O lo o faapea ona separate mea ia e lua. Ae o le tulaga lava ia, o le mobility o tatou tagata e o i Niu Sila, e o i Ausetalia. Ia, atonu o le tali atu lea i le vaega lea. Ae o le popolega lena, e tataua ona vaavaai le tatou Malo i se tulaga e faatonutonu ai le agai atu o tatou tagata i fafo.

Ia, atonu o le a faaauau sau faamatalaga i le tatou laisene pisinisi ona faamuta ai lea o se vaivaiga i lenei afiafi. O le mea muamua lava i le laisene pisinisi, o le Tulafono. So o se isi lava e fia fai sana pisinisi, e tataua ona resitala ma sau e faatumu le form e apply i ai sana pisinisi ona avatu lea e le Matagaluega o Tupe Maua lau laisene ma tuu ai foi i lalo lau economic activity po o lau pisinisi lena o le a fai, ia, ona e resitala lea ma e oo atu loa e faatino lau pisinisi.

O le teuteuga lea na uma atu nei o le Tulafono lea ua tulai mai ai le suiga fou lea, o le Tulafono sa taatia, sa i ai le faaiuga a le Malo foi ua mavae atu ia Iuni i le tausaga 2020. Ma ua sau sau e le i mafai lava ona faatino, peitai ua tulai mai le Malo lenei ua uma ona commit le tatou Malo i le OECD po o le Faalapotopotoga lea mo le atinaeina o le tamaoaiga o le lalolagi, o latou foi lea na ou taua lea o lo o tuua tatou i totonu o le black list lea e i i le EU. O le tulaga lena ona ua uma ona ioe le tatou Malo sa i ai o le a faatino mea nei ona o le tulaga o le black list. Ia lea la na omai loa le tatou Malo nei ma tulai mai foi galuega tuua ua tataua ona faaauau. E pei o le mafuaaga lena na faaauau ai loa ma pasia.

Sa faafesili foi nisi o sui usufono why now? O le a le mea ua fai ai i lenei taimi. Ia au lava ia, ona o le tau tulituliina o le taimi e tataua ai ona faafou laisene pisinisi, o le vaitaimi lea o Tesema i le isi Tesema, 12 masina. O lea la ua pasia, o lea la ua faatino, atonu o i lea o lo o tulai mai ai le faigata lea ona o lea ua maua mai faamaumauga, o lo o gasolo atu lava le mamalu o le atunuu e faafou a latou pisinisi. O lo o toatele lava talosaga o lo o tuu atu pe tusa ma le 40% o lo o i ai, a o le afa o le 40% o i latou foi lele e le i mafai ona avatu uma pepa po o documentation o lo o manaomia e le Tulafono e faamaonia ai o latou e ona le pisinisi. Ia maitaulia foi o lea o lo o tuliloa lava le beneficial owner, o le kamupani po o le tagata lea e faatupeina le kamupani, po o le tagata foi lea e faatautaia le pisinisi. Ae o le tulaga ua tulai mai, ua malosia lava le masalomia o tatou tagata, e o atu tatou tagata e faatumu le form, saina latou, ia ae le o latou e ona le pisinisi,

e le o latou foi e faatupea le pisinisi. Na pau lava le mea o lo o manao i ai latou, o le o atu o tagata nei e ona le pisinisi e lisi mai le latou tamai fanua lea e maua ai le latou tupe. Ia, a o le popoto foi la o tagata nei ou te le o toe taua, o tagata mai fafo, ua aumai loa tagata faatu i luma o faleoloa, ua tau latou o cashiers. Ae fiafia tele tatou tagata e tau latou o cashiers. Ae a outou agai uma atu lava i le tele o faleoloa, o le tele lava o cashiers, o tamaitai talavou Samoa. E le pepelo lau tala lena. Ou te le fai atu o ni mafuaaga foi ia, ae o le vaaiga lea ua ou talanoa atu ai, o le mea lena o lo o tulai mai, o lo o i ai nai popolega. A o le tulaga faapea ua...

**Afioga Peseta Vaifou Tevagaena:** Lau Afioga i le Fofoga Fetalai...

**FOFOGA FETALAI:** Ia, se i tulai mai le sui usufono mo Faasaleleaga 5.

**Afioga Peseta Vaifou Tevagaena:** E momoli atu lau faafetai tele i lau Afioga i le Sui Palemia. Talu ai ona o le mataupu lea lea sa ou laga, e momoli atu ai le agaga faafetai, o lea ua manino foi ma malamalama lou sui usufono. Ia aua atonu o le taua ia o le mafuaaga lea ua faalogologo atu, i le mafuaaga o le poloka lea. Atonu o lea foi la e pei e foliga mai o lea o le a toe silasila po o le mea o le a toe tilotilo i se isi Tulafono faavae aua le tulaga lea i mea o pisinisi laisene. Ia atonu foi o se tulaga lelei lea, aua o lea e foliga mai o le tele lava foi o nisi o latou ua omai foi i totonu o le atunuu.

Ia pau lava lea o lau faafesili foi i lau Afioga, o tulaga foi lea i mea o shareholders o pisinisi po o le a se silasila i ai a lau Afioga ma le Matagaluega, ina ia maualuga shares o tatou local people ae le o tagata foi nei mai fafo.

Ia pau lea o se talosaga ma le agaga maualalo lau Afioga i le Fofoga Fetalai.

**Afioga Leana Ronnie Posini:** Lau Afioga i le Fofoga Fetalai...

**FOFOGA FETALAI:** Tulai mai le sui usufono mo Safata 1.

**Afioga Leana Ronnie Posini:** Faafetai tele lava i lau Afioga i le Fofoga Fetalai. Faafetai tele lava i lau Afioga i le Minisita o lea ua manino le folasaga a lau Afioga i le tulaga lea o pisinisi sa ou taua foi i lau lauga. O le matou nuu i Saanapu e faasa ona lisiina fanua o le matou nuu i so o se faipisinisi lava i mea ia o faleoloa. A o le tau faanoanoaga i matou faipisinisi i faleoloa o le matou nuu, ua latou autilo foi lea pei ua lilifa le silasila a lau Afioga i... ae pei ua aafia atu ai foi ma nai o matou faipisinisi i le tele o mea o lo o manaomia, manaomia le pepa o le fanua, manaomia le

faamaoniga a le matai. Ia o isi foi faipisinisi faatoa tau amata e leai ni tusitupe foi nei e manaomia le statement foi lele mai le faletupe. Foi lele o lea ua maua foi i saunoaga a le Minisita o Tupe, pisinisi laiti ia o lea e siitia ai le faatuputupulaia ai le tamaoaiga o le tatou atunuu. Ae afai o silasila lau Afioga i pisinisi tetele ia ma mea o lo o manaomia, se i e silasila ifo i pisinisi a le tatou lava atunuu i le tele o mea manaomia, ia pei o le a tau faavaivai ai foi le ola atinae o nai o tatou tagata. Ma le agaga faaaloalo.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, pe maua se avanoa...

**FOFOGA FETALAI:** Se i tulai mai le sui usufono o Vaimauga 1.

**Afioga Sulamanaia Fetaiai Tauiliili Tuivasa:** Mo le faasaoina o le taimi o le Afioga i le Sui Palemia. E lagolagoina e lenei itumalo le mataupu ona sa laga foi. O lea foi ua saunoa manino le Afioga i le Minisita po o le Afioga i le Sui Palemia e ona le Matagaluega, ia o le talosaga e tuuina atu pe mafai ona faagafua vaega foi na e faipisinisi laiti, sole traders e faafaigofie i si o tatou atunuu.

O lona lua o talosaga i lau Afioga i le Sui Palemia, pe le mafai ona tuu i tua due dates, ona o pisinisi uma e tataua ona faafou ia Ianuari a o lea ua leai ni aso o lenei masina, ae tuu ia Mati, aua o faafouga uma ia pe mafai ona tele se taimi ona o lea ua i ai suiga a lau Matagaluega. Ia o le isi malosiaga lena sa naunau ai faipisinisi faafou laisene ia Tesema, ia lea ua uma Tesema, Ianuari. A o le tatalo la a lenei itumalo, ia pe le mafai ona tuuina atu ia Mati, ina ia mafai ona o foi nai o tatou tagata e saili seleni ina ia mafai...

Ma le isi tulaga lau Afioga i le Sui Palemia, se i silasila ane i le tulaga lea leaga e i ai le faiga faavae a le Matagaluega ma le MCIL, mo mea lava nei o foreign investment lea e issue mai e le MCIL, ona tuuina atu lea i lau Matagaluega ona faamatuu lea i ai o laisene. Pe le o silasila totoa ona o lea e lilifa le tulaga i le faaogaina o tatou tagata se i tulou mai tagata i fafo. A o la e manino e i ai le reserve list foi lena a le MCIL, e le mafai ona faataunuaina e ni tagata mai fafo ni retail, na o wholesale ma mea faapena. Ia se i toe silasila ane, leaga o lena e gasea lava lau Matagaluega, ae leaga o le MCIL lea, ia ma toe silasila ane i le agaga lea na ou fai atu i le issue ina o mea o pemitā faigaluega i tagata ia i nuu ia mai fafo, pei o lea e faamatuu lava e le MCIL ma le vaega lea la e te vaaia o le Immigration, pe le mafai ona tau faafaigata ia tulaga na. Aua e omai i totonu o falefaigaluega tagata ia, e omai e toe faigaluega ai i latou lea e i inei, ae uma ane ifo ua... Ia pei o le agaga lena lau Afioga i le Minisita, ae lagolagoina e lenei itumalo e toe tuu atu i tua se taimi. Ia pei o le agaga sa naunau ai ina ia mafai ona faafaigofie i o tatou tagata, e alu ifo lava le mea



e pau lava i o tatou tagata le faafaigofieina. A o le lagona lava o le sui usufono sa ou faapea o faiga faavae e fai, fai mo pisinisi fou, new application, a o latou lava ia e o atu e faafou, foi na le na o le o atu lava o la e i ai latou records ma latou laisene. Ae o ituaiga faiga fou ina ia tuu atu i tagata. Ae lau Afioiga, e lagolagoina le finagalo toe tuu atu ia Mati due dates e toe faafou uma ai lava pisinisi a si o tatou atunuu. Ma lou agaga faaaloalo i lau...

**FOFOGA FETALAI:** Ia pe toe i ai se isi fesili, aua toe tasi lava le tali a le Sui Palemia ma alu atu ai loa ma le faitauga o le tatou... leaga o le a ova le tatou taimi e alofa atu i le tou soifua maloloina. Ia lea la ua leai se fesili, ia saunoa loa la lau Afioiga i le Sui Palemia ma alu atu ai loa ma le tatou Tala o le Tupe.

**Afioiga Hon TUALA TEVAGA IOSEFO PONIFASIO:** Malo le tai i lau Afioiga i le Fofoga Fetalai. O le tulaga o shareholders, o lo o taoto le mea lena i le MCIL. Ae silafia foi o le Matagaluega lea o Leipa ma Alamanuia, Pisinisi, o i latou na o lo o vaai i le tulaga foi lele o foreign investors po o investments, o i latou foi na o lo o issue ina le foreign investment certificate. A issue loa le mea lena, o lona uiga ua maea le galuega o le resitalaina o le pisinisi, ia ona agai atu loa lea e talosaga le laisene. O le taimi foi lenei, o lo o matou vaavaai foi i le matou va ma le MCIL i le tulaga foi o latou faatino ai le galuega, o le issue ina o foreign investment certificate. Ia o lo o faatalatalanoa pea ina ia mafai ona matou galulue faatasi, ia alofagia foi e le MCIL le taumafaiga lea o lo o taumafai atu ai le agaga o le Tulafono lea na pasia, ina ia tulai mai le beneficial owner, o ia lava lea e ona le pisinisi, o ia foi o lo o faatautaia le pisinisi. O le popolega foi lea ua ala ai ona outou maitau i lenei vaitaimi, o le tele lava o faleoloa o lo o i ai foi nai uso mai fafo ae ua faatino e latou le tulaga lea o pisinisi lea sa reserve mo tatou tagata. O le mafuaaga tonu lava lena o le omai o tatou tagata resitala i lalo o latou igoa, ae uma ifo e le o latou e ona le pisinisi. O lea la na ala ai ona tapa e le Matagaluega le bank account ma le ID ia moni faamaumauga nei e avatu e tau atu ai o ia moni e ona le pisinisi.

O le saunoa mai o le sui usufono faapea ua tele requirements. Lelei, e sao, ua aumai saina matai ma tulaga faapena, e ese le taua. E maitaulia foi a maua loa lou laisene pisinisi, a faapea o se faleoloa, o le isi mea e te alu e te laiseneina, o sau liquor license po o se laisene e te faataua ai le ava malosi. Aua o le mea moni lava, so o se faleoloa lava e leai se ava malosi, e seasea o i ai nisi, o le ava malosi lava ma le sikareti, o i ina e pei e agai i ai le faatau. O lea la o le galuega tele lena a le Komiti lea po o le Pulega o le Ava Malosi, o le iloiloaina o vaega ia, ae ua fai le matou faiga faavae, o le a tuu mai i le taimi lea e resitala ai le pisinisi, o i ina o le a tapa uma ai lava

faamaoniga nei, ona avatu loa lea i le matou pulega ua faafaigofie. Aua a le faia nei i i, e avatu foi i o, e toe fesili foi matou i tulaga uma lava faapena o le faamaoniga o ID, o le saina o pulega a alii ma faipule, o tulaga uma lava faapena.

O le tulaga o lo o i ai sole traders, e pito i tele lava sole traders o lo o resitala. Ae o lo o i ai foi le faafitauli lena, o sole traders, o le tagata Samoa a o la e faatino e isi le pisinisi. O le popolega lena, ona o lea lava o lo o omai o tatou uso mai fafo, e omai i lalo o le pemitā foi lea 3 masina to do business, it's a free visa. Ia, o le tulaga tonu lava lena, ae o lo o i ai le silafia i totonu o le tatou Matagaluega e fuafua lelei ai, ua silafia foi e latou le aufaipisinis, o tatou tagata Samoa lava ia ua masani, ua tatou iloa o tagata faipisinisi, e leai se taofiofiga o na tulaga, e vave lava ona process ma tulaga faapena. O lea foi ua logo mai au e le tamaitai o lo o vaaiā lau Matagaluega i le taimi lena, o lea o lo o gasolo lelei le avatuga o laisene, aemaise o nai sole traders, o tatou tagata Samoa lava nei o lo o masani ona faafou a latou pisinisi. Ae o pisinisi fou, ia ou te iloa e faafaigata le tulaga lena, ona ua tatau ona toe amata lelei ina ia manino le faila a le kamupani lava ia ia aua ne i i ai nisi information foi ia e misleading. Ma e fautuaina foi le au talosaga mai i le toe faafou o pisinisi ma pisinisi fou, o i ina o lo o i ai lau tautinoga e te saina loa ae sese faamatalaga o lo o e tuuina mai, ia o le isi lena mea ua agai i ai le Tulafono, e tele le aafiaga o oe. Ia e lelei lava le be upfront, ia tau mai uma tulaga o i ai, a i ai foi se mea fesili i le auaunaga, e mafai foi ona fesoasoani atu.

O le tulaga o le faaopoopoga o se aso, ia, manaia le aumaiga o le tausaga lea, o lo o taatia atu lava i le Matagaluega se i vaavaai. A faapea o le a le tulaga e i ai Ianuari, e faapena foi ona tatou faaopoopo atu Fepuari. A o le tulaga e tuliloaina pea ina ia manino le faatinoina o le Tulafono, iamanion le beneficial owner, ma i latou e ona pisinisi. Ia atonu foi e oo atu ia Mati e leai se faasalaga, ae ou te iloa e oo atu ia Fepuari, ua maea uma lava tulaga e pei ona manaomia e le tatou Tulafono.

Ia o le tali atu lea lau Afioga i le Fofoga Fetalai. O le a faauma atu la matou tala i lena aso lau Afioga i le Fofoga Fetalai, ua filemu le Fono i le aso, ua umi foi le Fono, ua tatala finagalo o sui usufono uma lava, ua saausi foi le liliuina o le tofa ma le faautaga. Sa tatou totoē foi i nisi o saunoaga matagofie. Ia, o le agaga lea ua ou matauina e lou sui usufono i le suiga tele pei ona tatou omai ai i le amataga o lena Paeaiga, lea na saunoa manino i ai le Afioga i le Minisita Faatoaga.

Ma ou te le toe faaumi sau faamatalaga i le tulaga lea, ae tau lava ina ou pai i ai, o lou agaga foi lena pei ona saunoa le Minisita o Faatoaga, i le tulaga e tatau ona tatou folau ai, ia, e tele ai mea lelei tatou te faia mo le atunuu. A o le tatou fetoi, ia e uma ifo lava le Fono e leai ma se isi e fiafia. E i ai foi lou talitonuga, ua tea lena taimi, o lea ua amata ona tatou talanoa i issues, lea ua tatou talanoa i mataupu lelei e aoga mo le tatou atunuu. Ia, e

le tuua ai foi se taimi e vevela ai le Fono lau Afioga i le Fofoga Fetalai, ae o lo o tatou faasoa i luga o mataupu ae le o luga o polokiki po o lagona faaletagata.

Ia, o le faafetai lea i le usugafono a Samoa i lenei vaiaso po o lenei aso. Ia faafetai mo le faatamalii o tulaga uma lava pei ona taua. Ia o le a se taimi o le a tatou taumavae lau Afioga, tau ia ina ia alofa le Atua pulepuletetele ia toe faafoisia le soifua maloloina i le Afioga i le Tamaitai Palemia, ia mamao ni aolealea i lau Afioga i le Fofoga Fetalai, ia mamao ni laumeatoli e savili i afioga i alii ma tamaitai Minisita, ia maua pea lo outou soifua lelei i le tino ma le maloloina aua le tautuaina o le mamalu o Samoa ma ona tagatanuu.

Ia manuia le mamalu ma le paia uma ua aofaga potopoto i lenei aso i totonu o lenei Maota ae ola la outou auauna. Soifua ma ia manuia.

**FOFOGA FETALAI:** Malo. Ia, malo le tanoa, malo foi saunoa i lau Afioga i le Sui Palemia. Ua avea lava lau Afioga o lo o tu i matagiolo i lenei foi vaitau a o tatou tapuaia foi le sailiga gasegase a le Tamaitai Palemia, ia malo lava i lou tulai mai, aemaise foi o le faatinoina o le galuega a le Kapeneta, aemaise lava o le talifuitau i manaoga o sui usufono mamalu o le atunuu e pei ona lagalaga. O le mea lea, malo le tofa malo foi le onosai faafetai i le tauavameaina o le tatou faamoemoe, ia aemaise o le tatou galuega o le Tala o le Tupe. Ia, e faamanatu atu, e maea le tatou Tala ole Tupe, o lo o i ai isi tatou galuega tuua. Ne it e i ua tatou faapea o le a uma, e leai e uma foi le tatou Tala o le Tupe, ae o lo o i ai tatou galuega tuua. O le mea lea, o le a tatou faagasolo atu i le tatou Tala o le Tupe.

Ua maea nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2022/2023 ma o le a tuuina atu loa le fesili.

*Na tuuina atu le fesili i le lafo e pei ona faatuina i le aso 20 Tesema 2022 ma ua faamaonia le faitauga faalua.*

### **TULAFONO TAU FAAOFI O LE FAATATAUINA O TUPE FAAOPOPO O TUPE 2022/2023 – Iloiloga Auiliili**

**FOFOGA FETALAI:** O le a sagai atu loa le Fono Aoao i le Iloiloga Auiliili o le Tulafono Tau Faaofi o le Faatatauina o Tupe Faaopopo (Nu.1) 2022/2023.

I le faagasologa o le Iloiloga Auiliili o le Tulafono Tau Faaofi e mafai ona saunoa faatepa sui usufono i Mataupu o lo o tusia i le Tala Faatatau o Tupe Faaopopo Muamua o Tupe Maua ma Tupe Totogi a le Malo mo le tausga

faaiuina aso 30 Iuni 2023, faapea le Lipoti a le Komiti o Tupe Maua ma Tupe Totogi i le Tala Faatatau Faaopoopo Muamua o Tupe 2022/2023, P.P.2022/2023 Nu.103.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i ona Faamatalaga.

## FAAMATALAGA MUAMUA

### VAEGATUPE MA TALA FAATATAU

#### FAAOPOOPOGA I TUPE FAATATAUINA

MATAGALUEGA	FAAMATALAGA	AOFAI TUPE ALU
-------------	-------------	----------------

PISINISI, ALAMANUIA MA LEIPA	Aofai Tupe Alu Faaopoopo	\$103,545.
------------------------------------	--------------------------	------------

*Faamaonia.*

FESOOTAIGA MA FAAMATALAGA TEKONOLOSI		\$100,000.
--	--	------------

*Faamaonia.*

<b>TUPE:</b>	<b>\$7,620,050.</b>
--------------	---------------------

**FOFOGA FETALAI:** O loo i ai le Faasaoga a le Komiti o lo o tuuina atu foi ile Pepa Faaopoopo o Galuega o le silafia. Ou te tapa lau Afioga i le Taitaifono o le Komiti o Tupe Maua ma Tupe Totogi.

Tulai mai lau Afioga i le Taitaifono.

**Afioga FALEOMAVEGA TITIMAEA TAFUA (Taitaifono, Komiti o Tupe Maua ma Tupe Totogi):** Lau Afioga i le Fofoga Fetalai ou te faatu le Faasaoga i lalo o le Faaulutala – Faaopoopoga i Galuega e Avea ai ma Sui o le Malo e faapea;

**“FAASAOGA:**

*Ia aveese upu “Pulega o Uafu ma Taulaga a Samoa, Galuega i luga o Uafu” ma suia i upu, “Pulega o Malae Vaalele a Samoa Galuega i le Malae Vaalele” ina ia faitauina e faapea, Pulega o Malae Vaalele a Samoa, “Galuega i Malae Vaalele-\$1 miliona.”*

Ma le agaga faaaloalo.

*Faamaonia le Faasaoga.*

*Faamaonia le \$7,620,050 mo Tupe.*

<b>MATAUPU TAU LE VA I FAFO MA FEFAATAUAIGA</b>	<b>\$100,000.</b>
---	-------------------

*Faamaonia.*

<b>FAAMASINO MA PULEGA TAU FAAMASINO</b>	<b>\$188,233.</b>
--	-------------------

*Faamaonia.*

<b>PUNAOA FAALENATURA MA LE SIOSIOMAGA</b>	<b>\$154,416</b>
--	------------------

*Faamaonia.*

<b>AOFAI FAAOPOPOGA I TUPE ALU AOA 2022/2023</b>	<b>\$8,266,244</b>
--	--------------------

*Faamaonia.*

**FAAMATALAGA LONA LUA**

**FAAITITIGA I TUPE FAATATAUINA**

<b>MATAGALUEGA FAAMATALAGA</b>	<b>AOFAI TUPE FAAITITIA</b>
--------------------------------	---------------------------------

<b>FESOOTAIGA MA FAAMATALAGA TEKONOLOSI</b>	<b>\$(100,000)</b>
---	--------------------

*Faamaonia.*

<b>TUPE:</b>	<b>\$(7,244,645)</b>
--------------	----------------------

*Faamaonia.*

<b>FAAMASINOGA MA PULEGA TAU FAAMASINOGA</b>	<b>\$(188,233)</b>
--	--------------------

*Faamaonia.*

<b>PUNAOA FAALENATURA MALE SIOSIOMAGA</b>	<b>\$(200,000)</b>
---	--------------------

*Faamaonia.*

<b>AOFAI FAAITITIGA AOAO I TUPE ALU 2022/2023</b>	<b>\$(7,732,878)</b>
---	----------------------

*Faamaonia.*

**FUAIUPU 2: Faamatuu atu ma le Faatatauina o le \$8,266,244 mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faaititiga o aofaiga na uluai faatatauina ma toe faasoaso atu i isi galuega faatino ma galuega faatino laiti.**

*Faamaonia.*

**FAAMATALAGA:**

*Faamaonia.*

**FUAIUPU 1 MA LE IGOA**

**FUAIUPU 1: Igoa puupuu ma le amataga.**

**IGOA: Faatatauina o Tupe Faaopoopo (Nu.1) 2022/2023.**

*Faamaonia.*

*Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2022/2023 faatasi ma le Faasaoga.*

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2022/2023 – faitauga faatolu**

**FOFOGA FETALAI:** Se i tulai mai lau Afioga i le Minisita o Tupe.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2022/2023 i lona faitauga faatolu.*

*Faaluaina e le Minisita o le Soifua Maloloina ma le Minisita o Faatoaga ma Faiga Faiva.*

*Na faamaonia le lafo ma faitauina le Tulafono Tau Faaofi i lona faitauga faatolu ma ua pasia le Fono Aoa Faitulafono.*

## **TOLOPOINA**

**FOFOGA FETALAI:** Ia o le agaga faafetai i lau afioga i le Minisita o Tupe, aemaise foi ia le Taitaifono o le Komiti ma la outou Komiti, ia aemaise foi le Pule Sili o le Matagaluega o Tupe ma le Matagaluega, ia malo le galulue. Faafetai o lea ua manino le ata, ia o lo o lelei lava ia le tamaoaiga o le atunuu.

O le mea lea ia faafetai, mo le faailoaina foi i totonu o le Palemene, o lea foi e faafogafoga mai ia le mamalu o le atunuu, ia o lo o sologa manuia lava le tamaoaiga o si o tatou atunuu. O le mea lea malo faafetai mo le galuega. Ia faamalo faafetai i le paia o le Palemene mo le tatou galuega i lenei aso. Malo le usufono, malo foi le onosai.

Faafetai Samoa i lau tapuaiga, a o alofaiva lau Palemene i lenei aso. Pe afai ua i ai se gagana ua sala a lau Palemene i lau faafogafoga mai i lenei aso, e matou te faamalulu atu, o lou finagalo faale-Atua o le a uimagalo ai se sese o lau Palemene. Ia agalelei le Alii i galuega o totoe o lenei afiafi.

Faafetai atu Ofisa Sili o Pulega o Matagaluega ma Faalapotopotoga Tumaoti a le tatou Malo, i la outou tapuaiga ma le lagolagosua i lenei aso, ia malo faafetai. Talosia ia le afifio atu o le paia o le Palemene i lenei afiafi.

Ae e tatou te le i tolopo, ou te talosaga atu i le afioga i le sui usufono mo Gagafomauga Nu.2, se i saunia se tatou tatalo e faaiu ai le tatou Fono.

*Na tolopo Taulumaga a le Fono Aoa Faitulafono i le itula e 6:40 i le afiafi seia aulia le Aso Faraile 27 o Ianuari 2023 i le itula e 9:30 i le taeao.*